

# KAALAM BATOK PAGTOO



Salamat, Igsoong Neville. Panalanginan ka sa Ginoo. Maayong buntag, maayong buntag. Igsoon . . .

<sup>2</sup> Maayong buntag, mga higala. [Adunay nagaingon, “Maayong buntag, Igsoong Branham.”—Ed.] Malipayon ako nga makabalik na usab sa balay sa Ginoo!

<sup>3</sup> Gitawgan ako, kaganina, aron iampo ang usa ka tigulang nga ministro. Ug nakuyapan lang siya, mora’g ingon-ana. Wala ma’y problema nga nakita diha kaniya. Usa siya ka tigulang na nga balaang tawo sa Ginoo. Sa anaa na ako sa dalan padulong dinhi, gisulayan ni Satanas nga himoong dili maayo ang akong paminaw, ug kasukaon, usab. Ingon ko, “Iampo na lang gyud nato ang usa’g usa.” Husto kana. Oo. Ug, si Igsoong Coggins kadto. Nakaila na kaayo ’ta kaniya, dinhi sa tabernakulo. Gikan pa siya sa Carolina. Ug grabe, grabe kaayo ang iyang gibati kaganina, nagatindog—nagatindog lang siya ug dayon nakuyapan. Apan wala ma’y ni usa ka problema nga nakita diha kaniya, wala ma’y problema sa iyang lawas. Busa, ang yawa lang kadto nga naninguhang sulayan siya. Mao nga, usa gayud ka dakung manunulay ang yawa, ug maayo siya sa niini, usab.

<sup>4</sup> Nadungog na ninyo siguro ang sugilanon mahitungod sa usa ka tigulang na nga igsoong babaye nga nagasimba dinhi, ayaw niyang mosulti og bisan unsa mang dautan mahitungod ni kinsa man. Gipangutana siya, “Unsa ma’y hunahuna nimo bahin sa yawa?” Ingon siya, “Bueno, usa siya ka maayo nga kaaway.” Busa ingon niana—ingon niana ang yawa.

<sup>5</sup> Malipayon kita, karong buntaga, nga maania pag-usab sa balay sa Ginoo, niining semanaha, nga nagahulat sa Pag-abot ni Ginoong Jesus.

<sup>6</sup> Ug karon, hisgotan ko unta, niining buntaga ang mahitungod sa hilisgotanan nga, “Nasilongan sa Dugo,” ug medyo giusab sa Balaang Espiritu ang akong hunahuna mahitungod niana. Ug mao nga aduna ko’y usa pa ka hilisgotanan, nga igatudlo. Tungod, kay, human niadtong, miingon ko, kagabii, “Ngano kaha nga giusab Niya ang akong hunahuna mahitungod niadtong hilisgotanan, ‘Nasilongan sa Dugo?’” Nasabtan na tingali ninyo kung hain ko igabasi ang maong teksto, “Ang Israel ilalum sa dugo, nga nagamartsa paingon sa saad,” nakita n’yo. Ug tingali pagahisgotan ko na lang kana, sa ubang panahon.

<sup>7</sup> Busa akong nahinumduman, sa usa ka damgo nga gidamgo ko, dili pa lang dugay. Ug ako, sa niini nga damgo, nagapundo kono ko og Pagkaon sa taberbakulo, nakita n’yo, dinhi sa niining damgo. Pila man ang nakahinumdom niini, pipila na ka semana ang milabay, nga nagdamgo ko niini? [Nagaingon

ang kongregasyon, “Amen.”—Ed.] Dili ko pa mahatag kaninyo ang hubad niini. Ug kung dili kaayo ko madugay, isulti ko na kaninyo, kung gusto ninyo nga madungog kini. [“Amen.”] Sige.

<sup>8</sup> Panagsa ra kong makadamgo og unsa man nga damgo nga sayon rang sabton. Kay, sa kasagaran, ulahi na kong matulog, ug dayon makamata ra pud. Ug kung nerbiyoso o gikapoy ka, magdamgo ka, dayon matulog na pud ug magdamgo, dayon makamata na pud. Kahibalo na mo kung unsa kini, sa usa ka nerbiyoso nga tawo nga sama nako.

<sup>9</sup> Ug atua ako kauban si Igsoong Wood ug si Igsoong Sothmann, ug ginapahayag gayud sa Ginoo ngadto sa mga tawo . . . pag-adto ko . . . didto . . . Ug sa Tucson, Arizona kadto. Ug bug-os gayud nga ginapahayag sa Ginoo, sa matag higayon, ang paghubad sa mga damgo.

<sup>10</sup> Karon, nakita n’yo, pag-adunay mohatag, mosulti kanako mahitungod sa usa ka damgo, ang bugtong paagi nga mahatag ko ang paghubad niini, kinahanglan ko una nga makita ang maong damgo. Ug daghan kaninyo dinhi ang nakahibalo, nga pipila kaninyo ang nagasulti kanako sa mga butang, ug dili ninyo ginasulti ang kinatibuk-an mahitungod, sa maong damgo. Apan sa dihang makita ko na kini, usab, mahibaloan ko na ang kung unsay wala ninyo gisulti. Kita n’yo? Ug busa kinahanglan gyud nga makita una kini, ug dayon igapadayag na Niya. Mao nga, usahay mahait kini. Usahay pud malisud kini, nga makapasakit sa tawo. Apan kinahanglan mong magmatinud-anon, tungod kay Pulong kini sa Ginoo. Kita n’yo? Tungod kay, nagalaum sila niini. Ug dili gyud Kini nagakasayup . . . ang Ginoo maayo gyud kanako kanunay, nga ginatugotan Kini nga mamahimong husto kanunay.

<sup>11</sup> Ug busa niadtong gabhiona ako—natulog na ko, ug nagdamgo ako, ako mismo. Ug nahunahunaan ko . . . Adunay usa ka kaubanan nato nga kaniadto akong nakauban sa pagboksing, pila na ka mga katuigan ang milabay. Daghan, kaninyo nga mga karaan na nga . . .

<sup>12</sup> Nahunahunaan ko si Igsoong Roy Slaughter, nga anaa nagatindog dinha sa pultahan. Kauban nato siya kaniadto pa, siguro usa siya sa pinaka-karaan na nga miyembro dinhi, sa iglesia. Si Igsoong Slaughter, sa hunahuna ko, usa siya sa mga pinaka-karaan na nga miyembro. Ug ako—ako gayud . . .

<sup>13</sup> Samtang nagahisgot ako mahitungod kaniya, adunay daghan kaayong maayo nga mga kinaiya si Roy Slaughter nga wala mahibalo-i sa mga tawo. Husto kana. Igsoon ko siya, ug mas gustohon ko pa nga hatagan siya og usa ka gamay’ng pungpong sa bulak karon, o usa ka udlot sa bulak, kaysa usa ka tibuok pongpong sa mga bulak pagmotaliwan na siya. Husto kana. Daghan kaayo siya og maayo nga mga kinaiya. Si Igsoong Roy usa gayud ka tinuod nga igsoon kanako, siya ug ang iyang

pamilya, nanginabuhi didto, ug naningkamot og ayo alang sa iyang gamay'ng pamilya, ug nga napadaku niya nga mga buutan ang iyang mga anak. Nakaila ko sa tanan niyang anak nga mga babaye ug mga anak niyang lalaki, ug nagwali ko kaniadto sa paglubong sa iyang anak nga lalaki niadtong mitaliwan kini.

<sup>14</sup> Ug nahinumduman ko, usa ka higayon dinhi, adunay usa ka tawo nga among gisuholan nga motrabaho dinhi sa iglesia. Ug ang . . . Ug siya unta ang angay'ng motrabaho niadto, ingon nga usa siya ka panday. Wala kami igong kuwarta kaniadto. Ug itaud na unta niya kadtong interyor dinhi. Ug aduna ma'y miabot nga gusto pud nga motrabaho, ug mao nga wala na niya gibuhat. Ug naglingkod-lingkod lang kini, miingon pa nga nakatrabaho na kono siya og tunga sa oras, o mora'g ingon-ana, ug nasamad pa kono ang iyang tiil. Ug busa, gigamit niya kadto aron mopasaka siya og sumbong batok sa iglesia, ug iya gyud kaming gipasakaan og kaso sa kantidad nga napulo ka libo ka dolyares. Bueno, wala gyud kami og unsa man kaniadto. Wala gyud kami nasayod hangtud nga aduna na diay sila og hukom bahin niadto. Nakita n'yo, mipasaka sila og sumbong. Ang—ang maong lalaki, tungod nga wala man siya'y insurance, ug busa kami ang nagkaadunay tulubagon. Wala gyud kami, og pangbayad.

<sup>15</sup> Ug dili ko gayud mahikalimtan kadto nga gabii, nanglingkod kami, sa luyo *didto*, sa diha nga mikuot si Roy sa iyang bulsa. Usa ka daan na . . . Pasayloa ko, Igsoong Roy. Daan nga, gisi-gisi na nga pitaka, ug mikuha siya og mga papel nga kuwarta nga natigum niya gikan sa iyang pagpanghakot og tai sa mga mananap, mga butang nga ingon-ana. Miingon, “Bueno, Igsoong Bill, idugang ko kini dinha.”

<sup>16</sup> Ang gamay'ng tigulang nga si Evelyn, nga igsoon niyang babaye, tingali'g nagalingkod siya dinhi karon, sa kon asa man. Ingon niya, “Igsoong Branham, ang akong gamay'ng daan na nga balay, nagkantidad lang og tulo ka gatus ka dolyares, apan idugang lang gihapon namo kini.” Kita n'yo? Lunsay kana, tinuod gyud nga tawo, kung pangutan-on ko ninyo. Kana'y para kanako, tinuod gayud.

<sup>17</sup> Nahinumduman ko usab, wala magdugay human niadto, atua ako sa una kong panagtigum sa gawas. Atua ako sa St. Louis kaniadto, sa usa sa akong mga unang dagkung panagtigum. Ug dunay miabot nga usa ka telegrama, “Ang anak kong babaye nagahigda nga naghimalatyon na. Si Igsoong Slaughter kini. Umari ka dayon.” Milakaw dayon ako, gisulod ko ang akong mga sinina sa maleta. Mao lang kadto. Dili ko gayud siya mahimong balibaran. Ug nangadto na kami. Pag-abot nako didto, misulod ko sa maong lawak. Ang mga nars, didto, niadtong maong ospital, sa Katoliko nga ospital sa New Albany, gisurender na nila ang iyang anak nga babaye. Apan sa pagsulod namo mismo sa maong lawak, giayo siya dayon ni Ginoong Jesus. Atua siya didto, nakita n'yo. Kita n'yo?

18 Ug sama sa tinapay nganha sa tubig, magabalik kini kanimo sa umaabot nga adlaw. Nahilayo na ko sa akong hilisgotanan; apan mobalik na kita sa sinugdanan.

19 Ug nagaboksing ako kaniadto. Ug adunay usa ka lalaki nga ilado gayud dinhi niini nga lungsod. Ang maong makaluluoy nga tawo grabe na kaayong maghuboghubog karon. Ang usa sa mga anak niyang lalaki anaa na sa puwersa sa kapulisan. Si Smith, George Smith, ginatawag nila siya nga, “Six-second Smith.” Siya mao ang mibansay kanako sa pagboksing, kaniadtong aduna pa kita’y . . . sa wala pa nagkaaduna og Golden Gloves. Dinhi kami nagapraktis sa bilding sa gobyerno kaniadto. Ug mao kadto, aba, siya mao ang pinakamabangis nga tawo nga akong nakita sukad. Igoon niya ako, ug malagpot gayud ako. Ug motindog ko. Moingon ko, “Dili mo man kinahanglan pa nga kusgon. Kita mo?” Miingon ko, “Mahutdan ako og ginhawa tungod sa imong sumbag.”

20 Ingon siya, “Sultihan ’ta ka, Billy,” miingon, “bisan unsa ka pa ka binansay og maayo, ug unsa pa ka daghan ang imong kasinatian sa dula, ug unsa ka pa ka kusgan, tungod sa imong kadak-on, o unsa man nga sama niana,” miingon, “pahunongon sa usa ka sumbag ang dugo pagmaigo ka nga sama *niadto*.” [Gipakpak ni Igsoong Branham ang iyang mga kamot sa makausa—Ed.] Ug miingon, “Mahimong masuko ka kanako karon, apan sa dihang anaa ka na didto sa ring, nga ikaw na lang,” miingon, “pasalamatan mo kini.” Ingon pa, “Ginapalig-on niini ang imong lawas, aron nga makabangon ka pa dayon. Kung maigo ka ug matumba, ug maghigda ka na lang didto ug dili ka na kabangon. Apan kung ang imong lawas lig-on ug makaagwanta sa mga sumbag,” miingon, “kung ingon-ana, pagmaigo man ka, maigo ka sa mga kusog nga sumbag,” miingon, “nan makabangon ka dayon,” miingon, “makabalik ka pa. Matumba man ka sa ring, makabangon ka ra dayon.” Bag-o lang niya akong gitumba didto sa ring tungod sa iyang sumbag niadtong tungora. Busa miingon siya, “Kinahanglan mo gayud nga masinati kana. Kita mo?” Ug halos mapatay na ko niya. Mga traynta o kuwarenta ka libras ang gibug-aton niya kay kanako. Ug mahimo niyang . . . Usa siya ka boksingiro ug nagatuon pa lang ako kaniadto, mao nga halos mapatay ko niya. Ingon siya, “Apan pasalamatan mo kini sa dihang anaa ka na sa ring.” Nahibaloan ko nga tinuod gyud diay kadto.

21 Dayon, nadungog ko usab kadtong mga sarhento sa kasundalohan nga ginabansay ang mga batang kalalaken-an didto, ug nga ginapalisud-lisud gyud. Ginadumtan nila kadto nga sarhento. Apan sa dihang anaa na sila sa pagpakiggubat, gihigugma nila ang maong sarhento, tungod sa malisud nga pagbansay kanila.

22 Ingon niana usab ang ginapaningkamotan ko nga mabansay ang mga Cristohanon. “Ayaw ninyo og putli ang inyong mga

buhok. Ayaw kamo pagpangmeyk-ap. Ayaw ninyo og buhata *kini*.” Mapalisud-lisud gyud. Pero pasalamatan ninyo ako pagmoabot na ako sa—sa katapusan niining panaw. Kita n’yo? Pagbansay, kita n’yo, kinahanglan nga husto gayud kana nga pagbansay. Ug magpabilin gyud kita—kita nga husto sa Pulong. Malisud man kini, pamutlon man niini ang denominasyonhong mga panagkalahi, apan pasalamatan ninyo kini pagmoabot na kamo sa katapusan niining panaw. Kita n’yo? Gibarugan man ninyo kung unsa lang ang nasulat sa Basahon.

Busa, ang akong asawa, gibutang, gipasandig niya ang akong bukton sa iyang bukton, ug milakaw na kami.

<sup>23</sup> Ug si George Smith karon, siya’y, siguro, usa siya ka ubanon na nga tawo. Sa hunahuna ko siya’y pito o walo, napulo ka tuig nga mas magwang kay kanako. Ug mibalik siya sa ring, ug nagpadayon siya sa pagboksing. Ug kadtong bag-ong mga batan-ong boksingero, bisan halapad kaayo og mga abaga, wala gani nila mahimong suklan siya, bisan unsaon. Sila gayud. . . Pila lang ka minuto tumba na sila. Ug adunay usa ka batan-on nga miingon, “Mahimo kong tumbahon kana nga tigulang. Kabalo ko nga mahimo ko gayud.” Busa siya, ingon nga daku kaayo ug atletiko nga batan-ong lalaki, misulod didto sa ring. Wala ra gani siya midugay og tunga sa minuto. Migawas siya, miingon, “Wala ako kahibalo kung asa kadto nga mga sumbag gikan, apan usa gayud siya ka kusgan nga tawo.”

<sup>24</sup> Ug niadtong tungora, gitan-aw ko ang akong asawa, sa maong damgo, ug ingon ko, “Palangga, kabalo ka, siya mao ang unang nagbansay kanako.”

<sup>25</sup> Ug dayon, kabalo na mo, nga talagsaon kaayo ang mga damgo. Miadto kono ko ngadto sa—sa daku nga dagat, ug grabe ka balod sa mga tubig. Ug ang tawong batid sa panakayan. . . Karon, dili ko na kauban si Meda kaniadto, ang akong asawa. Ug dayon, niadto, miduol kadtong—kadtong tawong batid sa panakayan, ug gihatagan niya ako og usa ka gamay’ng bangka nga mga duha ug tunga ka piye, tulo ka piye ang katas-on. Ug ingon siya. . . Puti kaayo kadto, nga plastik lang, ug puti gayud. Miingon siya, “Ania na ang imong bangka.”

“Oh,” ingon ko, “dili ako makatabok, niana, pinaagi niana.”

<sup>26</sup> Ingon siya, “Bueno,” miingon, “makadagan man kini og singkwenta ka milya kada oras, paingon-ug-paanhi *niining* direksyon.”

<sup>27</sup> Ingon ko, “Mamahimo tingali, paingon-ug-paanhi sa baybayon, apan dili kini makaabot *didto*. Kita mo?” Ingon ko.

<sup>28</sup> Miingon siya, “Bueno, pag-uban kanila.” Ug mitan-aw ako, ug atua naglingkod si Igsoong Wood, ug si Igsoong Fred Sothmann, ang duha ka igsoon nga kauban nako niadtong gabhiona nga gidamgo ko ang maong damgo. Ug nagasakay sila

sa usa ka berde nga bangka nga adunay daghang pisi, mga pisi sa pag-kamping, mga tolda, ug uban pa. Ug nagasakay sila didto. Miingon siya, “Umuban ka kanila.”

<sup>29</sup> Miingon ko, “Dili man sila batid sa panakayan.” Ingon ko, “Kahibalo ako niini.” Ingon ko, “Usa ako ka nahibalo sa panakayan. Ug ako—kahibalo ako niining bangka, kung unsaon sa pagpadagan niini. Apan,” ingon ko, “sila, dili gyud sila kahibalo. Dili sila makahibalo pagpadagan niini. Dili pud ako moadto nga ingon niana, bisan pa man.”

<sup>30</sup> “Bueno,” ingon siya, “gihigugma ka nila.” Ug miingon pa, “Nganong dili man ka mobalik dinhi ug magpondo usá?”

<sup>31</sup> Busa, mibalik ko. Ug kadtong gamay’ng dapit kung diin kami nangadto, usa ka gamay’ng dapit nga gitawag og Klondike, mga kuwarenta ka milya ang gilay-on gikan sa unsa man nga sibilisasyon, usa ka gamay’ng tindahan alang sa mga rantsero ug uban pa. Mora og sa Klondike kadto, ug nahitabo nga ang tabernakulo man diay kadto. Nagatindog ko dinhi mismo. Ginabira ko pasulod, ang dagkung mga tadyaw sa pinakamaanindot nga mga pagkaon nga akong nakita sukad-sukad. Mga rabanos, nga mora’g tulo ka piye ang katas-on; ug mga singkamas, ug mga gulayon, ug mga patatas, ug tanan na.

<sup>32</sup> Miingon siya, “Pagpondo og daghan niini.” Kita n’yo? Ug atua ako didto, nga nagapondo og mga niadto.

<sup>33</sup> Ug nakamata ko. Dili ko kadto masabtan. Abi ko og basta-basta lang kadto nga damgo, ug gipasagdan ra. Nabalaka si Igsoong Wood ug daghan kanila tungod niadto. Busa, ania na ang hubad niadto. Gikinahanglan ko unang maghulat, sama sa gikaingon ko na kaninyo sa makadaghang higayon. Kinahanglan nga mamahitabo una ang mga butang sa dili pa nimo mahimong hubaron; mga butang nga nagapahan-ay niini. Ania ang maong hubad. Sila . . .

<sup>34</sup> Dugay na kaming nagapaabot niadtong tungora nga moadto gawas sa nasud. Si Igsoong Miner Arganbright, nga usa ka suod kong higala, mao’y mobayad sa gasto sa akong asawa ug sa akong gasto, sa pagbiyahe didto sa Palestina. Ug moadto usab kami didto sa Switzerland, ug didto sa Africa, ug sa usa ka dakung buluhaton usab sa Hunyo. Ug ang akong asawa, ug si Rebekah, ug silang duha, nalipay gayud sila sa pagkahibalo nga makaadto sila sa Germany, England, Pransiya, ug Palestina. Maghulat ra una sila didto hangtud nga mahuman ko ang dakung buluhaton didto sa Africa, dayon hapiton ko sila aron sa pagpauli dinhi. Ug nagahinam-hinam gayud sila. Nadungog na ko ninyo nga nagaingon kaniadto, “Kung itugot sa Ginoo,” pirmi. “Kung itugot sa Ginoo, ginapaninguhaan ko gayud nga mahimo kanang dakung buluhaton sa gawas sa nasud. Wala pa ako masayod kung kanus-a gyud.” Busa ginahulat ko pa kini.

<sup>35</sup> Apan ania na kung unsa gyud kadto. Kining si Mr. Smith, George Smith, nga mao'y akong pinakauna nga tigbansay didto, ug wala gyu'y bisan kinsa nga mga batan-on sa kayutaan karon ang makatupong sa iyang abilidad, sa boksing. Mao'y akong unang pagbansay, diha sa linya sa pagpaampo. Kita n'yo?

<sup>36</sup> Sa makadaghang higayon, sa dihang ginatawag ko ang mga tawo, aduna gyu'y mga panan-awon. Ginahulat ko. Oo. *Dinhi*, adunay usa ka panan-awon. *Dinha*, adunay usa na pud ka panan-awon. Dili gayud kadto sayon. Dayon, niadtong nagsugod ako, wala gyud ko'y ginasayloan nga usa ka tawo. . . Gawas kung aduna ko'y makaplagan sa linya, nga dili gayud husto, ug pahunungon Niya ako, Siya Mismo, kita n'yo, ug sultihan ako mahitungod niadto, ug mopadayon na ko nga iampo ang mga tawo. Ug, grabe, ang—ang epekto daw sa usa ka gatus ka higayon, tungod kay kinahanglan ko man nga. . . iampo ang upat o lima ka gatus nga mga tawo sulod sa usa ka gabii. Sa karon, tingali'g baynte-singko o traynta ra, siguro dili na ingon-niana ka daghan. Tingali'g napulo o kinse ra ka mga panan-awon, ug ako'y. . . kinahanglan na ninyo akong kargahon, halos.

<sup>37</sup> Balikan nato kadtong atong gihisgotan, kita n'yo, balik ngadto sa pinakauna kong pagbansay. Busa, wala gyu'y bisan unsa sa natakad-sukad ang milabaw Niini, o mahimong molabaw pa, kita n'yo, tungod kay mao kini ang Pulong. Dili kini sa kung unsa lang nga denominasyon. Kini mao ang Pulong. Kita n'yo?

<sup>38</sup> Ug pagkahuman, niana, inyong mahimatikdan ang sunod nga nahitabo human niadto, nawala na si Meda sa maong damgo. Sa miadto na kono ko sa dagat, mao kadto: ang pag-adto ko gawas sa nasud.

<sup>39</sup> Karon, gitawgan ko ni Igsoong Arganbright, niadtong miaging gabii, nga emosyonal, ug miingon, “Igsoong Branham, mamahimong usa kini ka dakung bakasyon. Giataki sa kasingkasing si Igsoong Shakarian, mao nga gikansela ang mga panagtigum gawas sa nasud.” Ug sila. . . Ang panagtigum didto sa Switzerland, gusto niya nga moadto ko didto bisan usa lang ka gabii, ug magpahigayon og usa ka gabii nga panagtigum didto. Dayon ang nahabilin nga adlaw mamahimong bakasyon na lang tanan, magsuroy-suroy palibot sa nasud. Oh, kana, gayu'y, maayo kaayo; si Igsoong Arganbright maayo gyud kaayo, usa ka Cristohanon, og suod ko nga higala ug sa akong pamilya.

<sup>40</sup> Ug, apan, nakita n'yo, kadtong gamay'ng, puti nga plastik nga bangka nga gusto niya nga akong sakyan, mao kadto ang Pulong sa Dios. Ug walay igong pagwali didto, aron nga pagatawgon ako ngadto sa tabok sa dagat. Ingon ko, “Huh-uh, dili puede. Kana lang? Huh-uh.”

Miingon siya, “Kung ingon-ana umadto ka, ubanan mo sila, sama sa kung asa man sila mangadto.”

41 Ingon ko, “Dili man sila mga nahibalo sa panakayan, dili sila mga magwawali. Usa ako ka ministro. Kung mangadto man sila, mamahimong bakasyon lang, gayud tanan, duna na gani sila’y mga pisi sa pag-kamping.” Apan dili ko kini buhaton. Gibalibaran ko kadto. Ug mao kana ang hubad sa—sa maong damgo. Kita n’yo?

42 Ug dayon gitawgan ako ni Mr. Arganbright, pipila na ka gabii ang milabay, ug giingnan ko nga—nga ang—ang. . . Siyempre, nabalitaan na namo nga gikansela ang mga panagtigum sa gawas sa nasud, tungod sa nahitabo kang Igsoong Shakarian. Ug dayon wala ma’y. . . Didto, kadtong sa Switzerland, usa ra man kadto ka gabii. Ug ako. . .

43 Kinahanglan nga sultihan ako ni Meda, una, nga dili na siya moadto. Busa ako siyang gitawgan, didto ako sa Florida, niadtong miaging gabii, o sa Georgia diay, ug giingnan ko siya. Ingon ko, “Mitawag si Igsoong Arganbright ug miingon nga mogikan kono kita sa ikabaynte na sa Mayo.”

44 Miingon siya, “Dili puede. Dili puede.” Kita n’yo? “Adunay pasulit ang mga bata nianang adlaw. Dili na kami puede makauban.” Kita n’yo, kinahanglan nga siya gyud ang mobalibad, siya mismo, tungod kay apil man siya didto. Iyaha kadtong bakasyon. Ug mao kadto.

45 Bisan ang mga damgo, ang tanan, adunay kahulogan. Ang tanan aduna gyu’y sa kung unsa man nga kahulogan. Busa, adunay hubad ang mga damgo.

46 Karon, mobalik kita. . . Ginasulti ko kini aron nga inyong masabtan, ug naka-teyp kini. Didto sa dalan, sa akong pagpauli. . .

47 Sa wala pa ako miadto didto, pila man ang nakahinumdom nga ako kadtong gisulti balik dinhi, nga adunay misulti kanako nga usa ka Tingog, sulod sa lawak usa niana ka adlaw human sa usa ka panan-awon, ug gisulti ang mahitungod sa, gisulti ang mahitungod sa serpente, ug nga gigapus na kadto, ug dili na magkahadlok sa bisan unsa pa man? [Nagaingon ang kongregasyon, “Amen.”—Ed.] Miingon Siya, “Ayaw kahadlok.” Miingon, “Dili ba gipamatud-an Ko man nga magauban Ko kanimo bisan asa ka man moadto?” Ingon pa, “Dili ba gipamatud-an Ko man nga nagauban Ko kanimo sa imong mga pagpangayam?” Mahinumduman ba ninyo sa dihang gisulti ko ang mahitungod sa kung unsa ang makuha ko, sa dili pa ako mogikan, ug ang tanan niadto? [“Amen.”] Kita n’yo? Miingon, “Dili ba gipamatud-an Ko na kanimo nga kauban mo Ako?” Dayon adunay matam-is kaayo nga Tingog, nga miingon, “Ang walay-pagkapakyas nga Presensiya ni Jesus Cristo kauban mo bisan asa ka man moadto.” Ug nasayran ko, nga tungod niadto, nagapaingon kita ngadto sa usa ka mas hataas nga butang. Wala ako kahibalo kung unsa man kana. Dili ko masulti.



48 Sa pagpauli ko, niadtong miaging gabii, o niadtong miaging adlaw, o sa wala pa ako miuli, miabot kanako ang usa ka panan-awon. Ug nakita ko ang pipila ka gagmay'ng mga bata, maniwang sila, nga mora'g mga batang lalaki, o unsa man, nga adunay sul-ob nga mga kalo. Ug atua kami didto, nagapangayam. Ug nakaigo ko og usa ka higante, daku kaayong kolor tabonon nga oso. Ug dayon milingi sila kanako ug miingon kanako, miingon, "Pero aduna ma'y mga kasamok mahitungod sa panagtigum."

49 Miingon ko, "Bisan unsa pa kana nga kasamok, kung kinahanglan ko nga moadto, bisan asa man kana, moadto gyud ko bisan pa man, kita n'yo. Dili kini igsapayan." Ug nawala na ang maong panan-awon. Wala ko kahibalo kung diin man kadto. Apan, nai-teyp kini. Mahitabo gyud kini. Kita n'yo? Timan-i ninyo, mahitabo kini. Usa kini ka panan-awon.

50 Busa, karon, sa sunod nga Dominggo, anaa ako sa Tennessee, kung itugot sa Ginoo, pagkasunod Sabado sa gabii ug Dominggo, kauban si Igsoong M. E. Littlefield, sa, oh, didto sa punoang-buhatan sa church of God sa Cleveland, Tennessee. Kang Igsoong M. E. Littlefield, didto sa iyang simbahan, kadtong akong gihalad kaniadto, duha o tulo na ka tuig ang milabay, sa Cleveland, Tennessee, sa sunod Sabado sa gabii ug Dominggo sa buntag. Panerbisyo sa Dominggo sa buntag lang kana, sa Dominggo. Ug hatagi lang ko ninyo og panahon, ubanon ko ang akong pamilya didto, ug mobalik ra kami dinhi. Nagsaad ako kaniya, nga moadto ko ug mowali pag-usab sa iyang simbahan. Sa sunod Dominggo na kana.

51 Dayon, pagkasunod Dominggo, moanhi si Igsoong Arganbright kauban si Igsoong Rowe, nga usa ka diplomata sa Washington, nga, nagerbisyo ilalum sa tulo o upat ka mga presidente. Moanhi sila sa niana nga Dominggo, ug adunay bag-o nga retrato. Gusto ko nga paningkamotan ninyong tanan nga makaanhi dinhi, kung mahimo, nianang adlaw. Gusto ko nga moanhi, usab.

52 Dayon pagkasunod Dominggo mao'y Pasko sa Pagkabanhaw. Nagalaum kita og usa ka dakung panagtigum dinhi, sa Pasko sa Pagkabanhaw. Kung itugot sa Ginoo, gusto kong maania dinhi sa Dominggo sa Pasko sa Pagkabanhaw. Alang sa...Ug aduna kita'y pagsubang sa adlaw nga panerbisyo, sama sa ato nang naandan. Adunay pagpangbautismo usab, kamong tanan nga pagabautismohan, sa Ngalan sa atong Ginoong Jesus, panganhi mo sa niana nga Dominggo. Ug gilauman na, o napahibalo na, kaganina, nga tungod kay wala kita'y igong lugar nga kalingkuran, tingali'g atong abangan ang Boy's Club, mga pito o walo ka gatus ang makalingkod didto, dinha lang kana sa may unahan, dinhang dapita, usa ka bag-o nga bilding dinha mismo sa may kanto dinhi, ug mobalik ra kita dinhi alang sa pangbautismo nga

panerbisyo pagkahuman. Ug mobalik na pud didto, aron nga komportable nga makalingkod ang tanan alang sa buntag sa Pasko sa Pagkabanhaw. Paningkamotan namo nga masigurado kini, karong semanaha, ug aron mahibaloan na.

<sup>53</sup> Dayon ang mosunod nga panerbisyo, magsugod na sa... Mogikan ko dinhi sa ikabaynte...sa ikabaynte-singko o ikabaynte-sais sa niini nga bulan. Ug dayon sa ikapito... ikaunom, ikapito, ikawalo, ug ikasiyam, ug ikanapulo usab, anaa ako sa...anaa sa Van...o sa Victoria Island, didto sa lugar sa mga Indian, kung diin kinahanglan pa nimo nga mosakay og bangka, aron nga makaabot ngadto kanila.

<sup>54</sup> Aduna kal'yo usa ka gamay'ng misyonaryo nga higala, usa ka igsoong lalaki, kauban ko siya niadtong miaging tinglagas sa usa ka pagpangayam. Ug mibiya siya sa ilang matahum nga panimalay, siya ug ang iyang asawa. Ug ang iyang mga bukton, ang tibuok niini, napuno og nukanuka, sa nagkalainlain nga bahin. Bueno, mao kana ang nahitabo. Tungod kadto sa mga pulgas, tughok ug ingon-anang mga butang, kita n'yo, nga atua sa ginapuy-an nila didto, kung diin kinahanglan ra una nilang mopuyo didto, kauban niadtong mga Indian. Giuban niya ang pipila kanila didto sa panagtigum, ug ang pinakapangulo niadtong mga Indian. Mga Katoliko silang tanan, halos. Ug mikunsad ang Balaang Espiritu didto ug miabot didto sa pinakapangulo nila, ug sa tanan nga mga kauban niya, ug giayo ang matag usa kanila didto mismo sa maong panagtigum. Halos mapudpud nila kadto baybayon, sa ilang pagpaingon-ug-paanhi, nga sakay niadtong ilang mga bangka. Sila'y nagapamaligya nga mga mangingisda, ug busa ngadto-nganhi sila sa baybayon. Ug nangimbatar man si Igsoong Eddie, ug medyo aduna pud ako'y pagbati nga moadto, kita n'yo, nga moadto didto.

<sup>55</sup> Ug dayon mogikan kami didto, ug mobiyahe pa og usa ka adlaw gikan didto, ug moistar og duha ka gabii o tulo ka gabii sa Fort St. John. Didto na kana sa highway nga paingon na sa Alaska. Ug duha gyud ka gabii didto.

<sup>56</sup> Dayon, sa pagpauli ko na, ug ang...Siguro sa ikapito, ikawalo, ikasiyam ug ikanapulo sa Hunyo. Karon, aniyay lugar nga mahimo ninyong adtoan, sa mga panagtigum dinhi, kanang igapahigayon sa Southern Pines. Kabalo na mo niadtong igsoong lalaki nga misulat og maanindot nga artikulo bahin kanato dinhi, dili pa lang dugay. Lain pa'y ako, gipadad-an niya ako og dugang pa nga mga magasin. Nagdala ko unta dinhi. Dad-on ko na lang kini pagkasunod Domingo, kung itugot sa Ginoo. Ug sa Southern Pines kana, mga anaa sa, oh, unom o walo ka oras nga pag-drayb gikan dinhi, Southern Pines, North Carolina. O, sa South Carolina ba kana? North Carolina. Oo. Husto kana. Dayon, ug, pagkahuman niana mogikan kami didto sa ikanapulo.

<sup>57</sup> Ug sa ika-onse ug ika-dose, kauban ko si Igsoong Bigby sa Columbia, South Carolina. Ug kini mao ang lalaki, ang maong Presbyterian nga misulat sa artikulo. Para kanako, mao kadto ang mas miigo kanako kaysa sa bisan unsa nga gipangsulat sa uban mahitungod kanako. Usa siya ka Presbyterian, usa ka doktor sa divinidad. Ug miadto siya kaniadto sa Chicago ug gisulat niya ang maong artikulo. Mahitungod sa . . . Nakalimot na ko sa kung unsa kadto. Nindot kaayo kadto. Aduna gani ko'y kopya niadto sa kung asa man, ug anaa sa usa ka magasin. Mora'g mahitungod kadto sa “usa ka Presbyterian, nga nakigttagbo didto sa Pentecostes,” o mora'g ingon niana, “pagpakigttagbo sa propetang Pentecostal sa usa ka Presbyterian,” mora'g ingon niana. Ug makauban ko siya.

<sup>58</sup> Dayon, kagabii, gitawgan namo si Igsoong Roy Borders, nga atua na sa West Coast. Ug adunay pipila ka mga tawo didto nga mitabang nga mahiusa ang halos trayntay-singko ug kuwarenta ka mga iglesia nga makigtimbayayong sa mga panagtigum; Sedalia, California; ug didto sa Grass City, ug gikan didto . . . o Grass Valley, diay. Ug gikan didto, moadto na kami paingon sa Oregon; ug padulong na sa—sa Washington.

<sup>59</sup> Ug dayon si Igsoong Arganbright, inig abot niya, mangadto kami, ginaplano na namo karon, nga sa katapusang semana sa Hulyo, mangadto kami sa Anchorage, Alaska, aron maghimo didto og usa ka sanga sa Christian Business Men, pagkahuman sa mga unom o walo ka adlaw nga rebaybal nga akong ginalauman nga mapahigayon didto, sa nianang malisud gayud, malisud puy-an nga Alaska. Kahibalo na mo kung unsa kana, kanang panginabuhi nga mangsuhid og minahan ug magmina. Ug diin ang hamonada nga may itlog nagkantidad kini og halos tulo ka dolyares ug lima ka sentimos sa kada usa ka plato. Kana—usa gayud kana ka malisud kaayo nga lugar, apan gikinahanglan nila ang Maayong Balita.

<sup>60</sup> Karon, ang ginatinguha kong pagabuhaton, mao, kining mga butang nga akong ginatudlo dinhi, nga magpondo ko niini nga Pagkaon ug ipanghatag kini sa gawas, gusto kong buhaton na kini karon. Wala pa'y pihong pagpanguna kanako sa kung asa nga dapit ako igapadala, apan moadto ako, nga mangpugas og mga binhi, sa kung asa man ako igapadala, sa kung asa man sugdan.

<sup>61</sup> Ang akong asawa, ania siya dinhi kon asa man. Nakadawat siya og sulat gikan sa usa ka babaye sa Illinois niadtong miaging adlaw. Nagpadilaab gyud kadto sa kalag sa akong kasingkasing. Miingon kadtong maong babaye, “Igsoong babayeng Branham,” miingon, “walay pagduhaduha nga sa makadaghang higayon, ug hangtud karon, sukad niadtong gikasal ka, nga daghan ka na gyud og giantus, tungod nga pirming wala si Igsoong Branham, og anaa kanimo ang mga bata.” Ug ingon pa, “Ang mga bata, siyempre, manghilak sila sa dihang pangitaon nila ang ilang

amahan ug kung unsa pa.” Ug miingon, “Kahibalo ko sa imong nasinati, tungod kay aduna usab ako og buutan nga bana, ako mismo.” Miingon siya, “Apan, sultihan ko ikaw sa akong kahimtang.”

<sup>62</sup> Ingon siya, “Ako—miagi na ako og upat ka dagkung operasyon, sa nangaging upat na ka tuig.” Ingon siya, “Motumar ako og mga, kinse o dise-sais ka pangpakalma nga tambal kada adlaw.” Ug ingon pa siya, “Nagkaaduna ako og tulo ka nagkalainlaing indyeksiyon sa Lexron, ug uban pa, kada semana.” Ug miingon, “Nagaandam pa ko og mga tambal nga pangpatulog, ug ang pinakabag-o niadto, para kadto sa pangpakalma sa akong mga ugat. Ug kadtong mga pang-indyeksiyon, mga duha ang gina-indyeksiyon ko, duha pud ka tambal nga pangpatulog kada gabii, ug dili pa gyud gihapon ko makatulog.” Ug miingon siya, “Giingnan na ko sa akong doktor nga moadto na kono ko sa institusyon sa mga buang kay tingali’g dili na ako maulian. Tingali’g aduna pa’y paglaum nga masalbar ko ang akong panghunahuna.” Ug ingon pa, “Ug wala na gyu’y mahatag nga alibyo kanako ang mga pamaagi sa medisina.”

<sup>63</sup> Ug miingon siya, “Ginahunahuna ko na nga magpakamatay kaniadto, nagaplano na ako niadto, aron biyaan na ang buutan kong bana ug ang anak kong babaye.” Ingon siya, “Nagapuyo kami sa Kansas. Gusto ko kaayo didto, tungod kay makita ko ang paghinog sa mga lugas, ug mahunahuna ko ang mga pagpangani.”

<sup>64</sup> Sa hunahuna ko usa siya ka Methodist. Ug ang ingon nga . . . Ug dayon, didto sa kolehiyo sa Methodist sa Bloomington, Illinois, nakakuha sila niadtong usa ka mantalaan, ang ingon nga moadto kono ko didto, onse ka bulan na ang milabay. Daghan kaninyo ang makahinumdum niadtong panagtigum sa Bloomington. Nakatambong man mo didto.

<sup>65</sup> Ug miingon siya, “Gidala ko sa akong bana, ug aduna kami kauban nga pipila ka mga higala, ug nangadto kami didto.” Ug miingon, “Nasayod ang Ginoo kaniadto nga dili ko na gayud makaya pa og usa pa ka adlaw.” Grabe na kaayo ang iyang kahimtang kaniadto. Ug miingon, “Ako kaniadto ang pinakauna. Ang imong anak, nga si Billy Paul, gihatagan niya ako og kard. Ug niadtong gabhiona, sa dihang—sa dihang nagtawag ang imong bana og mga numero, ako mao ang pinakauna sa linya, aron nga igaampo.” Ug miingon, “Dihadiha dayon pagtungtong ko sa entablado,” miingon, “gisulti niya kanako ang kinabuhi ko ug gisulti kanako kung unsay akong nangabuhat, ug ang tanan mahitungod niadto, ug nag-ingon, ‘MAO KINI ANG GINAINGON SA GINOO, wala na kini.’” Ingon pa, “Niadtong higayona mismo, wala na gyud ko’y nabati nga sakit.” Miingon, “Nagtimbang lang ako kaniadto og mga setenta ka libra. Karon motimbang na ako og mga usa ka gatus ug saysenta.” Ug miingon, “Igsoong babayeng Branham,

sa dihang nagamasulob-on ka,” miingon, “Kahibalo ko kung unsa ang imong gibati, sa pagpahulam mo sa imong bana sa kalibutan, ug sa ingon nianang mga butang. Apan,” miingon, “hinumdumi lang, nga ang usa ka makaluluoy’ng asawa nga taga-Kansas nahimong hilwas karon, tungod kanunay siyang andam nga mosunod sa Ginoo.”

<sup>66</sup> Gipakita ko kadto kang Billy. Ingon ko, “Billy, gusto ko nga ipadala mo kini didto niadtong kolehiyo sa Methodist.”

Miduol siya ug adunay gitunol nga mga pipila ka sulat, miingon, “Basaha ang pipila niini.”

<sup>67</sup> Ingon ko, “Kahibalo ko. Kahibalo ko nga maanindot gyud ang mga niini, apan kining usa mao gyu’y pinakanindot. Anaa na ang tanan dinhi.”

<sup>68</sup> Nadungog na ba ninyo kana? “Mahugaw! Mahugaw!” Giyawaan ang lalaki,” kita n’yo, nawad-an sa iyang maayong panimuot, “nga didto na nagpuyo sa mga lubnganan. Pero sa dihang miabot si Jesus, gibuhian Niya ang mga binilanggo.” Ug si Jesus mao ang Pulong. Busa, saligi ninyo ang Pulong, ug pagabuhian Niini ang mga binilanggo.

<sup>69</sup> Ania ako nga nagaistorya, nagamit na ang akong oras, nagamit na ang inyong oras, ug daghan pa kaayo akong ipanulti.

Iduko nato ang atong mga ulo.

<sup>70</sup> Ginoo, ingon nga mga mortal, nasayod kami nga wala kaayo kami og igong panahon aron nga makig-istorya. Sa pagtan-aw ko niining gamay’ng, pundok sa mga magpapanaw nga gutom ang mga kasingkasing nga mianhi dinhi nga gikan pa sa kaumahan, gikan pa sa mga pagpanguma, ang uban kanila gikan pa sa pangpubliko nga mga buhatan, nagatrabaho. Ug ang uban kanila mibiyaha pa latas sa mga kabukiran, sa mga disyerto, ug sa mga kapatagan ug mga kalapukan, ug aron makigtigum dinhi, bisan og nagatindog lang. Apan sila’y mga magpapanaw. Dili sila nahisakup niining kalibutana. Ania lamang sila ingon nga mga testimonyo, mga suga nga gipahimutang itaas sa bungtod, nga nagahatag og Kahayag sa komunidad kung diin sila nagapuyo. Ug sa pagpakigtigum nilang tanan, aron nga ipahinungod pag-usab ang ilang mga kaugalingon, ug mapalig-on sa Pulong, kinahanglan pa nilang motindog, bisan og manakit na ang ilang mga bitiis, ug ang—ang mga tigulang ug mga batanon, silang tanan.

<sup>71</sup> Gihigugma Ka nila, Ginoo. Mao kana’y hinungdan nga ania sila. Nasayod ang si kinsa man nga dili moanhi ang usa ka tawo, ug mobiyaha og milya-milya, ug magatindog dinha sa mga pader, mosandig, ug manakit ang mga bitiis, aron lang magpakita. Ug sa niini nga pundok, Ginoo, kami—mga kabus lang kami nga katawhan. Wala kami mianhi dinhi nga maanindot ang mga bisti. Mianhi kami aron sa pagsimba Kanimo. Adunay usa ka

tinguha sa among kasingkasing, usa ka katuyoan ug usa ka tumong, ug Ikaw kana, Ginoo.

<sup>72</sup> Nagaampo ako, Dios, nga pagagantihan Mo sila sa madagayaon. Hinaut nga walay usa nga magaagi niining mga pultahan, karong adlaw, nga dili makabaton og Kinabuhing Walay Katapusan. “Kung ingon-ana ang mga kabudlayan sa niining panaw mahupay ra unya, pagmoabot na kami sa katapusan sa maong panaw.” Kung sila masakiton, ayoha sila, Ginoo.

<sup>73</sup> Ug karon bag-ohay lang namong nahisgotan ang mahitungod sa uban pang mga panagtigum, o sa uban nga wala ko pa hibalo-i kung asa gayud, apan moadto gihapon ako, kung Imong itugot, nga ipangsabwag lang ang mga Binhi. Motubo ra Kini, pagmahulog Kini sa maayong yuta. Ginaampo ko, Ginoo, nga Imo Kining tultolan ngadto nianang maayo nga yuta.

<sup>74</sup> Napahimutang dinhi sa entablado, o sa pulpito, diay ang buot kong ipasabot, karong buntaga dinhi, mga panyo, gagmay'ng mga panapton. Nagakahulogan kini nga ang mga tawo masakiton, og may mga panginahanglan. Oh Dios sa Langit, Nga nagbanhaw kang Cristo gikan sa mga patay ug nga nagpaila Kaniya kanamo sa niining kaulahiing adlaw, sa porma sa Espiritu Santo, hinaut nga Siya Nga anaa sa tanang dapit magasud-ong; ang nahibalo sa tanan, ang nasayod sa tanang mga butang; ang makagagahum, makagagahum sa nga tanan. Tan-awa kining gagmay'ng mga panapton. Ug hinaut nga ang mga niini, inig modapat na ang mga niini sa mga masakiton ug nanag-antus, hinaut nga pagabuhion sa Espiritu Santo kana nga pag-ampo diha sa mga igdulungog sa Dios, ug hinaut nga mangaayo sila dayon.

<sup>75</sup> Ginoo, nahunahunaan namo kadtong makaluluoy'ng gamay'ng babaye kaniadto. Bag-ohay ko lang gisulti ang iyang testimonyo, “Atua siya sa Kansas karon, malipayon na, ug wala na'y gibati nga kasakit. Wala na'y doktor ang makakaplag og unsa man nga problema kaniya. Wala na'y mga pagsakit-sakit, wala na'y kinahanglan pang mga tambal pangpakalma, wala na'y mga pildora nga pangpatulog; makatulog na siya og tarung ug hinanok. Okey na ang tanan.” Oh Ginoo, tinuod gayud, sa dihang nagaabot Ka, mamaayo na dayon ang tanang butang. Nagapasalamat kami Kanimo tungod niana.

<sup>76</sup> Karon, Amahan, sa dihang moadto na kami sa Pulong, panalangini ang Imong Pulong. Hinaut nga dili Kini mobalik Kanimo nga kawang, kondili matuman Niini kung unsay katuyoan Niini ug kung asa Kini igapahinungod. Ginapangamuyo namo kini sa Ngalan ni Jesus. Amen.

<sup>77</sup> Karon, madungog ba ako og maayo, sa tanan? Dinha sa likod, okey ra ba? Asa man ang labing maayo, kung magsulti ako nga *paingon-niini*, o magsulti nga *paingon-niini*? *Dinhi*, mas maayo

ba niining dapita? Madungog ra ba ninyo ako dinha sa likod? Sige, birahon ko kini dinhi dapit, aron nga mas duol diyutay.

<sup>78</sup> Niadtong miaging Domingo, usa kadto ka semana, nga ako—medyo nalangan ko, medyo nataas-taas ko ang panerbisyo. Dili ko unta gusto nga mamaingon niadto. Ug karon, matag karon ug unya, walay problema kanako, kung kanang mga nagalingkod, ingon nga nakita nila kanang mga nagapanindog, kung gusto nilang magkigbaylo og puwesto kanila, sa makadiyut, para makapahulay pud sila. Usa kana ka maayo kaayo nga buhat sa Cristohanon. Ug karon, karon, tingali, sa—sa umaabot nga Pasko sa Pagkabanhaw, tingali'g magkaaduna na kita og usa ka lugar aron nga makapahigayon og—og—og dakung panerbisyo.

<sup>79</sup> Karon moadto na kita, karong buntaga. Kamong tanan nga mga sundalo kuhaa na ninyo ang inyong—inyong Espada karon, ug magdeklara kita og giyera batok sa kaaway. Ginakanta nato kanhi ang usa ka hamubong kanta kabalo na mo.

Padayon ang pakiggubat, Oh Cristohanong  
sundalo,  
Atubangon ang kaaway nga nakahan-ay na sa  
pagpakiggubat.

Nadungog na ninyo ang maong kanta.

Nagapangidlap ang mga armas, nakagakayab-  
kayab ang mga bandera,  
Ang husto ug sayup nagkagubat na karon.

Kita n'yo? Husto kana.

Padayon ang pakiggubat, apan ayaw  
pagkaluya,  
Magmalig-on ka ug manghawid sa Iyang  
kusog;  
Kung ang Dios dapig kanato, ang Iyang  
bandera maanaa kanato,  
Sa katapusan pagaawiton ra unya nato ang  
alawiton nga iya sa mananaug.

<sup>80</sup> Husto kana. Moabli na kita karon, una, aron basahon ang pagbasa sa Kasulatan nga makita diha sa San Juan 10, ang unang lima ka mga bersekulo.

*Sa pagkamatuod, sa pagkamatuod, nagaingon ako kaninyo, Nga ang dili mosulod sa ganghaan sa toril sa mga karnero, kondili mosaka sa laing mga agianan, kana siya kawatan ug tulisan.*

*Apan ang mosulod...sa ganghaan mao ang magbalantay sa mga karnero.*

*Siya ginaablihan sa magsisira sa ganghaan; ug—ug ang mga karnero nagapatalinghug sa iyang tingog; ug ang iyang kaugalingong mga karnero ginatawag niya*

*sa ilang mga ngalan, ug sila ginamandoan niya sa ilang paggula.*

*Ug sa gipagula niya ang iyang kaugalingong mga karnero, siya magawna kanila, ug ang mga karnero maganunot kaniya: kay sila managpakaila sa iyang tingog.*

*. . .sa usa ka dumuloong dili sila monunot, kondili mangalagiw kaniya: kay—kay sila wala makaila sa tingog sa mga dumuloong.*

<sup>81</sup> Karon, ang hilisgotanan niining buntaga, nga gipili ko nga itudlo sa hamubong panahon, mao'y: *Kaalam Batok Pagtoo. Kaalam Batok Pagtoo.*

<sup>82</sup> Karon, adunay duha lamang ka kakuhaan, o pinaagi lang sa duha ka kakuhaan, nga kita mabuhi. Kahibalo ba mo niana? Karon atong. . .

<sup>83</sup> Aduna ko'y daghang mga Kasulatan nga naisulat dinhi. Ug gusto ko nga inyong. . .Tingali'g mopahinungod kita sa mga niini, sa atong pagpadayon. Ug—ug paningkamotan kong humanon kini sa ingon kadali kon mahimo. Ug aron dili na. . . Basta ipangsulti ko lang kini, aron nga matun-an ninyo kini pagkahuman. Kita n'yo?

<sup>84</sup> Apan adunay duha lang ka kakuhaan nga mahimong kapanguhaan nato sa atong kinabuhi. Ug ang usa niini mao ang kaalam, ug ang usa pa mao ang pagtoo; ug mahunahuna nato kung unsa kaha ang ginapamunga sa kaalam, ug kung unsa pud ang ginapamunga sa pagtoo. Apan, kining duha ka kakuhaan, balikan nato kini karong buntaga ug pagatun-an kini para sa leksyon sa Sunday school, ug pagahisgotan nato kini diha sa Biblia; ug ipakita kung unsa gyud kining duha, ug kung unsay ilang buhaton, ug kung unsa ang ila nang nabuhat, pinaagi sa tabang sa Ginoo.

<sup>85</sup> Karon, pagtoo ug kaalam. Karon, sa pagsugod, mahimatikdan nato, nga, sa Genesis, sa ika-1 nga kapitulo, makita nato nga—nga gipaila ang pagtoo, ug gipaila usab ang kaalam. Ug, bisan sa karon, kining duha ka kakuhaan ginapaila sa gihapon ngadto sa tawo. Nahibaloan nato, nga, ang Dios mao ang Tigpasugod sa pagtoo, aron nga motoo, aron nga managpanoo ang mga tawo ug nga mosalig sa Iyang Pulong. Ug si Satanas pud mao ang tigpasugod sa kaalam, ginapaningkamotang aghaton ang mga tawo nga dawaton ang iyang kaalam, ug ginapahilayo sila sa pagtoo nga anaa sa Pulong sa Dios. Mao kana ang duha ka kakuhaan.

<sup>86</sup> Makita nato sa talagsaon kaayo nga ang Genesis, kining pinakasunudanan nga kapitulo, nagasugod sa ingon niana. Ug makita nato nga ang tanang mga butang nga aduna kita, karon, orihinal nga nagsugod sa Genesis, 'kay ang pulong nga *Genesis*



nagakahulogan og “ang sinugdanan.” Ug kung makita nato ang mga butang kung unsa sila, karon, nga ingon niana sila, aduna gyud sila’y sinugdanan sa kon asa man. Kinahanglan mong subayon og balik ang tanan gikan sa sinugdanan.

<sup>87</sup> Ug ania’y usa ka diyutay’ng panghunahuna alang kaninyo. Ang tanang butang nga adunay sinugdanan, adunay katapusan. Apan ang mga butang nga walay sinugdanan, walay pagkatapos, kana lamang ang mga butang nga Eternal.

<sup>88</sup> Busa, buut ko nga ipangutana kini. Unsaon man nato sa pagpangatarungan ang pulong nga “ang Eternal nga pagka-anak sa Dios”? Kung usa Siya ka anak, aduna Siya’y sinugdanan. Kung usa Siya ka Eternal nga Anak, unsaon man Niya nga mamahimong Anak ug mamahimong Eternal? Kay, ang *anak* mao’y—mao’y bunga sa usa ka butang. Apan, kung Siya’y—Siya’y ingon niana gayud, dili Siya puede nga mamahimong usa ka Eternal nga Anak. Wala gyu’y ingon nianang butang nga, “Eternal nga Anak sa Dios.” Tungod kay, kung Siya—kung Siya wala gayu’y sinugdanan, nan Siya’y wala na’y lain kondili Eternal. Apan, kung usa Siya ka Anak, aduna gyud Siya’y gigikanan, mao nga dili Siya puede nga mamahimong usa ka Eternal nga Anak.

<sup>89</sup> Siya kadtong Eternal nga Dios nga nadayag ingon nga usa ka Anak. Uh-huh. Kita n’yo? Eternal nga Dios unta, tungod kay ang Dios mao lamang ang bugtong nga Eternal.

<sup>90</sup> Ug ang bugtong paagi lamang nga kita mabuhi mao’y tungod nga aduna kita og Kinabuhing Walay Katapusan. Mamatay kini nga lawas, mamatay ang tanan nga mga bahin kanato. Apan ang maong bahin nga Walay Katapusan mao ang Dios, ug nga dili mahimong mamatay. Karon, karon, ang Pulong, ang Biblia, Walay Katapusan, tungod kay ang Dios Kini diha sa porma nga Pulong. Ug unsa man nga anaa sa Dios, sa Iyang mga hunahuna, sa wala pa nagkaaduna og unsa mang gilitok nga Pulong, mao na ang Dios. Nakita ba ninyo kini? [Nagaingon ang kongregasyon, “Amen.”—Ed.] Ang Dios kadto. Busa, ingon nga predestinado na, kita; nagaingon nga “kita,” tungod nagasalig ako nga uban ako kaninyo ingon nga mga predestinado; kabahin na kita sa—sa mga butang nga anaa na sa Dios didto pa lang sa Eternidad.

<sup>91</sup> Ug dayon, kung anak ka sa Dios nga natawo na pag-usab, ikaw, ug aduna kanimo ang Balaang Espiritu, usa ikaw ka kapadayagan sa gilitok nga Pulong sa Dios sa wala pa Kini nahimong usa ka Pulong. Kinahanglan kini una nga usa ka hunahuna sa dili pa kini mamahimong usa ka Pulong. Ang Pulong mao’y usa ka gipahayag nga hunahuna. Ug ang maong mga hunahuna anaa na sa Dios, ug kon ingon-ana anaa na kita sa Dios didto pa lang sa Eternidad, ug gilitok kita aron managpanungha pinaagi sa Pulong. Oh, daw sa . . . Pinaagi sa unsa man nga Pulong? Sa *Nini* nga Pulong, ang Pulong sa Dios.

<sup>92</sup> Karon, ang Dios mao ang Tigpasugod sa pagtoo. Si Satanas usab mao ang tigpasugod sa kaalam. Kay, gihatag sa Dios ngadto sa Iyang pinakaunang mga anak ang Iyang Pulong, ug gisultihan sila nga kinahanglan nilang toohan Kini; ug gibutang didto ang kamatayon, ang pagkahimulag, ang silot, kung mapakyas sila nga toohan Kini.

<sup>93</sup> Ug miabot si Satanas didto ug gisulayang tanyagan si Eva, og kaalam, “Mamahimo kang maalamon, nga manghibalo sa matarung ug sa dautan, nga sama sa Dios.” Karon, kita n’yo, sa sugod pa lang, makita na ninyo dinha mismo nga gikan sa yawa ang kaalam. Kahibulongan kana, dili ba? Apan mao kana ang kamatuoran. Ang kaalam nagagikan sa yawa. Siya mao ang tigpasugod sa kaalam.

<sup>94</sup> Karon, siyempre, ang bisan unsa man nga nagkaaduna ang yawa, mao’y pagbalit-ad lamang sa orihinal. Ang sala mao’y usa ka pagbalit-ad, pagbalit-ad sa pagkamatarung. Ang pagpanapaw mao ang pagbalit-ad sa usa—usa ka legal nga buhat. Ang bakak mao ang pagbalit-ad sa kamatuoran.

<sup>95</sup> Ug busa ang—ang kaalam nga gusto kong maiklaro kaninyo, sa dili pa kita magsugod. Adunay kaalam nga iya sa Dios, ang kaalam nga iya sa Dios, mao ang, magpabilin sa Iyang Pulong. Apan si Satanas, sa iyang kaalam, gipaninguhaan niyang tuison ang Pulong, ug kana ang kaalam nga ginahisgotan ko.

<sup>96</sup> Adunay pihong kadaghanon sa pagtoo nga may kahilambigitan kang Satanas. Aron nga—nga madawat mo si Satanas, kinahanglan mo una nga toohan si Satanas, busa aduna gyu’y binalit-ad nga pagtoo para sa usa ka binalit-ad nga butang. Ug unsa mang butang nga maninguhang tuison ang Pulong sa Dios, aron nga ipasulti Kini og usa ka butang nga wala gisulti Niini, mao’y sayup nga espiritu, kita n’yo, nagatanyag og kaalam nga batok sa kaalam nga iya sa Dios. Busa, pagatawgon nato kini ingon nga kaalam, ug dili pagtoo ni Satanas.

<sup>97</sup> Daghan sa mga tawo nga ingon niana ang ginatoohan, mga sinsero gyud, ug nagatoo, uban sa tanang pagtoo nga aduna sila, nga husto sila. Kita n’yo? Kinahanglan gyud nga magbantay kamo. Nagainat baya ang habol sa duha ka direksiyon. Ug, siya, sila . . . Ang paagi lamang nga makasigurado, mao ang pagbalik ngadto sa orihinal nga Pulong. Dinha kon diin nakabasi ang tanang butang, dinha sa Pulong.

<sup>98</sup> Karon, nahibalon nato nga kining duha ka kabatok nga pundok, o duha ka kakuhaan, maoy: ang usa mao ang, kaalam; ug ang usa usab mao ang, pagtoo. Ug nagkatagbo na sila sa usa’g usa sukad pa kaniadto sa paglalang, sa tanaman sa Eden.

Karon, adunay mga anak ang maong duha ka pundok.

<sup>99</sup> Karon, unsa gani kining—kining kaalam nga ginahisgotan nato? Butang kini nga dili mouyon nga kining tibukong nga Pulong

mao ang Kamatuoran. Usa kini ka butang nga nagapahilayo sa Kamatuoran, ginapahayag ang kaugalingon niini ingon nga mao ang mas hataas nga kahibalo, mas hataas nga kaalam. Ug kung ang ingon nianang matang sa kaalam naggikan kang Satanas, nan ang iyang mga anak nagakinabuhi pinaagi niana nga kaalam.

<sup>100</sup> Ug kung ang pagtoo sa Dios naggikan usab sa Dios, ug ang Dios mao ang Pulong, nan ang mga anak sa Dios nagakinabuhi sa pagtoo. Miingon ba ang Biblia, “Ang matarung mabuhi pinaagi sa kaalam”? [Nagaingon ang kongregasyon, “Wala.”—Ed.] Pagtoo! “Ang matarung mabuhi pinaagi sa pagtoo.” Dili sa kung unsay mahimo niyang matun-an, kondili sa kung unsay mahimo niyang toohan. Bueno.

<sup>101</sup> Karon, karon mahibaloan gyud nato. Hisgotan nato ang kaalam, una. Ang kaalam adunay pagpangatarungan. Ang pagtoo walay pagpangatarungan. Apan ang kaalam adunay mga pagpangatarungan. Sugdan nato sa pag-abli ang Biblia, ug atong ablihan karon diha sa Genesis, sa ika-3 nga kapitulo sa Genesis, ug itudlo nato kini.

<sup>102</sup> Karon unsa man ang ginahimo nato, ang ginapaningkamotan natong himoon karong buntaga? Sundon kung unsay gisulti sa Ginoo, “Magtigum og Pagkaon.” Kinahanglanon ninyo Kini, usa sa niining mga adlaw. “Magtigum og Pagkaon.”

<sup>103</sup> Karon, Genesis 3:1, basahon nato kini karon, ug tan-awa kung unsa nga ang kaalam aduna gyu’y mga pagpangatarungan.

*Ang bitin malalangon labi pa kay sa ngatanan nga mga mananap nga gibuhay ni JEHOVAH nga Dios. Ug nag-ingon siya sa babaye, Diay, nag-ingon ang Dios, (nagatoo, nagasulti usab og Pulong), Dili kamo makakaon sa tanan nga mga kahoy sa tanaman?*

*Ug ang babaye mitubag sa bitin, Makakaon kami sa bunga sa mga kahoy sa tanaman:*

*Apan... sa bunga sa kahoy nga anaa sa taliwala sa tanaman, miingon ang Dios, Dili kamo magkaon niana, (gikutlo niya ang Pulong), bisan maghikap niana, aron kamo dili mamatay.*

<sup>104</sup> Karon, nagahupot ang pagtoo Niadto. Kita n’yo? Karon tan-awa.

*...ang bitin miingon sa babaye, Dili gayud kamo mamatay:*

<sup>105</sup> Usa kana ka pagpangatarungan, mga pagpangatarungan, “Maayo kaayo ang Dios. Maloloy-on man kaayo ang Dios. Gihigugma man Niya kamo pag-ayo.” Madungog gihapon ninyo kanang mao ra kaniadto nga yawa sa niining panahon. “Maayo kaayo ang Dios para nga buhaton ang *ingon niana*. Dili kana

pagabuhaton sa Dios. Dili magasilot ang Dios.” Eksaktong buhaton gyud Niya kung unsa ang giingon sa Iyang Pulong nga Iyang pagabuhaton. Kita n’yo?

<sup>106</sup> “Siguradong dili kamo mamatay.” Kita n’yo? Unsa ma’y ginapaningkamotan niyang buhaton? Ginaaghat niya ang babaye nga mangatarungan uban kaniya. Sa takna nga mangatarungan kamo sa Pulong sa Dios, dinha kamo nagakawad-an og pagtoo. Kita n’yo? Ayaw kamo nianang “oo, dili, basin diay.” Pagpabilin kamo mismo Niini. Kita n’yo? Husto na unta ang pamaagi ni Eva kaniadto, apan naminaw siya sa mga pagpangatarungan sa yawa.

<sup>107</sup> Pagkadaghan kaayong mga tawo karon nga aduna og hustong kahibalo, nga nasayod nga Kini nga Pulong mao ang Pulong sa Dios, ug Kini mao gayud ang Pulong sa Dios, apan nagpasagad lang sila ug ginatugotan ang pipila ka estudyante sa seminaryo nga mangatarungan kanila palayo Niini, palayo sa Balaang Espiritu, palayo sa mga butang nga iya sa Dios. “Mga pagpangatarungan, kinahanglan natong isalikway kini.”

<sup>108</sup> Karon, ika-4 nga bersekulo.

*Kay . . .*

Sultihan ko kamo kung nganong ingon niana ang gisulti ni Satanas. Basahon ko ang ika-4 nga bersekulo, ang una, dayon ang ika-5.

*Ug ang bitin miingon sa babaye, Dili gayud kamo mamatay—mamatay:*

*Kay hingbaloan sa Dios nga sa adlaw nga kamo mokaon niini, mangabuka ang inyong mga mata, ug mahimo kamo nga sama sa Dios, nga manghibalo sa maayo ug sa dautan.*

<sup>109</sup> Kita n’yo, ginahatagan siya niini og pagpangatarungan, “Gusto mo ba nga mamahimong kapareho sa Dios? Sunda . . .” Sa ubang pinulongan, “Gusto mo ba nga mamahimong husto sa Dios? Sunda ang akong tambag. Paminaw kanako. Dili ingon Niana ang gipakahulogan sa Dios. Dili gayud ingon niana.”

<sup>110</sup> Pagmadungog ninyo kana, magpalayo kamo niini. Husto kana. Mao kana’y sitsit sa serpente. Daw sa makatarunganon man. Apan ayaw gayud pagpangatarungan, bisan pa man. Toohi lamang ninyo kini, kung unsay gisulti sa Dios. Karon, sa dihang ang . . .

*Ug sa nakita sa babaye nga ang kahoy maayo nga kanon, . . .*

<sup>111</sup> Kita n’yo na kung unsay nahitabo? Gidala siya sa mga pagpangatarungan sa serpente ngadto sa pagpanghibalo nga husto kono kadto, nga tinuod kono kadto.

*. . . ug nga kini makalipay sa mata, ug ang kahoy takus tinguhaon . . .*

112 “Aron magkaaduna ba og pagtoo ang tawo”? [Ang kongregasyon nagingon, “Dili.”—Ed.]

*. . . aron magkaaduna og kahibalo ang tawo, makapahimong makinaadmanon sa tawo, . . .*

113 Kita n’yo na kung unsay nahitabo? Si Satanas nga ginatanyag ang kahibalo, kahibalo nga sukwahi sa Pulong, “aron makapahimong makinaadmanon sa tawo.”

*. . . mikuha siya sa bunga . . . ug mikaon, ug gihatagan usab niya ang iyang bana kauban niya; ug mikaon siya.*

*Ug nangabuka ang mga mata nilang duha, ug sila nanghibalo nga sila mga hubo; ug nanagtahi sila og mga dahon sa higuera, ug nanagbuhat og mga tapis alang sa ilang kaugalingon.*

114 Karon, unsa man ang nagpasugod niadto? Pagpangatarungan. Kita n’yo? Ang pagtoo wala gyu’y pagpangatarungan. Wala kamo nagapangatarungan, gayud. Nagatoo lang kamo. Sa dihang naiampo na kamo, ug gidawat na ang Pulong sa Dios alang sa inyong kaayohan, ayaw na pagpangatarungan tungod lang sa inyong mga gibati. Ayaw gayud pagpangatarungan og bisan unsa pa man. Wala kini og mga pagpangatarungan. Gisulti na sa Dios, ug mao na gyud kana.

115 Oh, buut ko unta nga mohunong dinhi sa pipila ka minuto, ug magpabilin usá niini, ug mokuha og teksto gikan niini. Apan dili ko na mahimo, ug iwali ko pa kining, mga kuwarenta o singkwenta ka mga teksto nga akong naisulat dinhi. Apan ang pagpangatarungan . . .

116 Sa dihang nagahatag og panan-awon ang Ginoo . . . Sultihan ko kamo, sa kaugalingon kong gamay’ng pang-bata nga pamaagi. Sa dihang nagahatag ang Ginoo og panan-awon bahin sa usa ka butang nga magakahitabo, aba, dili ko igsapayan kung unsa man ang mosukwahi niini.

117 Ug hinumdumi ninyo, ang tanan nga mahimong maipresentar, nga supak, buhaton kana ni Satanas. Paningkamotan gyud niyang mangatarungan, “Dili mo kana mahimo.”

118 Sama sa, niadtong bag-ohay ko lang gisulti kaganina, mahitungod sa pag-adto ko sa . . . Karon, medyo og talagsaon kini. Kaniadtong bag-ohay pa lang mitaliwan ang akong inahan. Ug nasayod ang Ginoo nga dili ko mamatuman kaniadto ang mga gisabotan namo sa mga kaigsoonan, mahitungod sa pagpangayam. Ug duna Siya’y gihatag nga panan-awon, ug gipadala ako didto sa British Columbia.

<sup>119</sup> Ug sa nakaabot na kami didto, miingon ang among magtutultol, “Wala pa gayud ako nakakita og usa ka oso nga silver-tip. Dinhi na ako nagpuyo sa tibuok kong kinabuhi. Ug usa pa, padulong kita ngadto sa dapit sa mga karnero, sakay niining mga kabayo. Wala gayu’y mga silver-tip didto. Walay . . . Dili gyud kamo makakuha og ingon niana didto.” Kita n’yo? Kita n’yo? Nagapaninguha, kita n’yo, naninguhang itipas; pagpangatarungan.

<sup>120</sup> Gisultihan ako ni Satanas, “Tingali’g, nasayup ka lang—nasayup ka lang sa pagsabot sa panan-awon.”

<sup>121</sup> “Apan wala ako nasayup. Mahitabo gyud kini. MAO KINI ANG GINAINGON SA GINOO.” Ug sa diha nga mitungha ang maong caribou, ug nakita namong mao gyud kadto, kung unsa ang anaa sa panan-awon, og nahibalo na mo niana.

<sup>122</sup> Dayon miingon siya, miingon kanako ang maong magtutultol; butan kaayo nga igsoon, nakauban namo siya sa pipila ka semana, usa ka batan-ong Cristohanon. Ingon siya, “Igsoong Branham, adunay epilepsy ang igsoon kong lalaki kaniadto. Ug nagasakay ka og kabayo niadtong adlaw, ug gisultihan mo ako sa butang nga pagabuhaton, ug ang ‘epilepsy sa akong igsoon mawala.’” Ingon siya, “Sa dihang gibuhat ko eksakto ang gisulti sa Espiritu Santo kanimo nga isulti kanako,” miingon, “wala na gyud siya giatake, sukad niadtong adlaw.”

<sup>123</sup> Miingon siya, “Karon ania kita, sa ibabaw niini nga bukid. Ug tulo ka milya paubos dinha, wala gyu’y sapinit bisan mga upat lang ka pulgada ang gitag-on. Walay bisan unsa kondili mga lumot lang, pipila ka bughaw nga mga berry, ug mga duha o tulo ka pulgada lang ang gitag-on nila.” Ingon pa siya, “Mga lumot lang ug bughaw nga mga berry, hangtud na didto diin duna na’y mga kakahoyan, ug atua nakahikot ang atong mga kabayo. Ug karon, sumala sa gisulti mo kanako sa wala pa kita miabot dinhi, nga, mga gikan dinhi hangtud sa ginatindogan sa usa ka batan-ong lalaki, nga nagasul-ob og checkered nga sinina, makapatay ikaw og usa ka siyam-ka-piye nga silver-tip grizzly nga oso.”

Ingon ko, “Kana’y MAO KINI ANG GINAINGON SA GINOO.” Kita n’yo?

Unsa man kadto? Si Satanas kadto nga nagapaninguhang magduhaduha ako niadto.

<sup>124</sup> Mikanaug na kami sa bukid. Sa dihang nagakaduol na kami, sige niyang ginasulti, “Igsoong Branham, usa na lang ka milya ug moabot na kita.”

Ingon ko, “Nagaduhaduha ka ba, Bud?”

“Wala man.”

<sup>125</sup> Nakaabot kami og mga tunga sa milya na lang. Miingon, “Tunga sa milya na lang kita.”

126 Ingon ko, “Husto kana.” Miingon, “Hunahunaa, tunga sa milya na lang!” Isalikway ang mga pagpangatarungan.

127 Miingon siya, “Tan-awa. Makita na nato ang tanan sa atong atubangan mismo. Wala ma’y bisan unsa dinha.”

128 “Apan,” ingon ko, “ang Dios Nga mihatag kanako sa maong Pulong makahimo man og usa niini dinha. Ayaw pagpangatarungan. Toohi lamang kini. Ayaw hatagi og unsa man nga pagtagad ang mga pagpangatarungan. Wala gyud kana’y kahilambigitan niini. Toohi lang ang gisulti Niya. Kana lang.”

129 Nagatindog ako didto, mitan-aw ako sa mga kabungtoran, sa tibuok palibot, dalag nga mga lumot lang ang atua didto; pasalop na ang adlaw; ang mga bungtod, pagkamaanindot. Makita mo bisan ang gagmay’ng bahin sa bisan asa man, sa tulo ka milya paitaas sa bukid, nga atua mismo sa ibabaw ko. Ug sa paglingi ko aron motan-aw, mga duha ka milya sa unahan ko, o usa ka milya ug tunga, o duha ka milya, dunay nagatindog nga usa ka siyam-ka-piye nga silver-tip grizzly didto. Kung nganong nakaabot kini didto, wala ako kahibalo. Apan atua kini mismo. Kita n’yo?

130 Ayaw gayud pagpangatarungan. Magtoo. Bisan unsa pa man ang mga kahintang, ayaw panumbalinga kini. Magtoo lang.

Karon miingon ang Dios, “Sa—sa adlaw nga kamo mokaon niini, kana nga adlaw kamo mamatay.”

131 Miingon si Satanas, “Sultihan ko ikaw og usa ka butang, kita mo. Karon, Kana, mao kana’y. . . Oh, oo, ginaingon nato nga tinuod ang Dios. Oo. Husto kana. Ginatoohan man nato kana nga Pulong. Oh,” miingon pa si Satanas, “Nagatoo man ko Niana, sigurado gayud. Apan, paminaw, sultihan ta ka, dili man eksaktong ingon niana ang pasabot Niya Niadto.”

Apan ingon niadto gayud ang pasabot sa Dios Niadto. Ingon niadto gyud ang pasabot Niya sa Iyang gisulti.

132 Miingon si Satanas, “Karon, tan-awa, sultihan ko ikaw kon nganong gibuhat Niya kadto. Gusto Niya. . . Nakita mo, ikaw—ikaw—dili ka pa man gud maalam, mao nga ingon niana. Wala ka pa’y kaalam. Kita mo? Sama ka lang sa usa ka karnero, nga kinahanglan pang pangunahan. Dili ka pa makasalig sa imong kaugalingon.” Ingon niana ang gusto sa Dios kanimo. “Wala ka pa gyu’y. . . Wala ka pa’y Ph.D., gani. Ikaw—ikaw—wala ka gyu’y igong edukasyon. Kita mo? Apan aduna ako’y kaalam. Pamatud-an ko kini kanimo. Karon, tan-awa, wala ka kahibalo kung unsa ang husto ug sayup. Kahibalo ka nga adunay ingon nianang butang, apan wala ka kahibalo kung unsa gyud kini. Ipakita ko kanimo kung unsaon kini paghimo.” Kadto lang ang gusto niyang isulti sa maong babaye. Kadto lang ang gusto niyang buhaton. “Ipakita ko kanimo kung unsaon kini paghimo.”

Miingon ang babaye, “Apan mamatay kami.”

133 Ingon niya, “Siguradong dili gyud kana pagabuhaton sa Dios. Apan nasayod Siya nga mamahimo usab kamong maalamon.” Kita n’yo?

134 Ginapahayag niya ang iyang kaalam batok sa Pulong sa Dios. Mao kana ang kaalam nga akong ginahisgotan. Kita n’yo? Kaalam nga sukwahi sa pagtoo, batok sa pagtoo. Mao kana ang unang gubat. Apan nanggunit nga lig-on gayud ug matinuuron ang Pulong sa Dios. Sa dihang miambit sila niadtong butang nga ginadili, nangamatay sila; ug padayon nang ingon niana, sukad niadto. Kita n’yo? Dinha kon diin, napamatud-an kini mismo, sa wala gyu’y pagduhaduha.

135 Karon pagahisgotan nato kana sa makadiyut. Karon, gihisgotan ko ang Genesis 3:1, 17, ug karon...o 1 hangtud 7, diay, ug karon, karon, ang kaalam aduna gyu’y mga pagpangatarungan. Pila man ang nagatoo niana karon? Moingon, “Amen.” [Nagaingon ang kongregasyon, “Amen.”—Ed.] Kita n’yo? Moingon kamo karon... .

136 Moingon ang mga doktor, “Bueno, sultihan ko ikaw.” Karon tan-awa ninyo, himoa ninyong panig-ingnan kining gamay’ng babaye nga bag-ohay ko lang gisulti ang testimonyo. Moingon ang doktor, “Wala ka na gayu’y mahimo pa. Wala ka na. Wala na’y paglaum alang kanimo. Umadto ka na lang sa institusyon sa mga buang. Dalha ninyo siya didto.”

137 Miingon kining babaye, “Sa dili pa ako mabalhog sa usa sa mga gamay’ng prisohan didto, patyon ko na lang ang akong kaugalingon.”

138 Ug dayon unsay nahitabo? Miabot ang Dios sa esena. Ug pinaagi niadtong pahibalo nga nabasahan niya, sa kon asa man sa usa ka mantalaan didto sa Kansas, nga adunay panagtigum sa Bloomington, Illinois, nadungog niya. “Ang pagtoo nagagikan sa pagpatalinghug.” Kita n’yo? Bueno, giubanan siya sa iyang bana didto. Tinuod gayud sila nga magtiayon, gihigugma nila ang usa’g usa.

139 Hunahunaa ninyo. Upat ka tuig, ug upat ka dagkung operasyon; kinse, dise-sais ka pangpakalma nga tambal. Igo na kana aron mapatay ang usa ka tawo. Kita n’yo? Ug ang tanan niadtong mga indyeksiyon, duha o makatulo ka higayon kada semana. Ug kahibalo ko nga ang usa niadto mao’y Lextron, ug nakalimot na ko kung unsa pa kadtong usa. Mora og tambal kadto para sa sakit sa utok. Ginatupok niya kadto nga mga indyeksiyon, ug, gawas pa niadto, adunay duha pa ka tambal nga pangpatulog. Ug dili pa gihapon makatulog, bisan pa niadto. Grabeng pag-antus, nagmasakiton sa tibuk adlaw, tibuk gabii, kada tuig. Wala gayu’y pagkaayo.

Apan, “Ang pagtoo nagagikan sa pagpatalinghug.” Kita n’yo?



140 Karon, pagkaabot niya didto, gipasaka siya sa Dios sa entablado, ingon nga pinakauna. Kita n'yo? Ug daw sa... Aba, daw sa? Sa dihang miduol na ako kaniya, ug miingon ko, "Kumusta ka, igsoon?" "Kumusta ka?" Wala pa gayud siya nakadungog og ingon niadto. Wala pa siya'y hingsayran bahin niadto. Ug miingon ko, "Ikaw si Mrs. *Ingon-ani-ug-ingon-ana*. Gikan ka pa sa Kansas."

141 Karon, sa gilayon, nagpahunahuna kadto—kadto kaniya. "Kadali lang. Bag-ohay ko lang siyang nadungog nga miingon, nga, 'Si Cristo mao ra sa gihapon kagahapon, karon, ug hangtud sa kahangturan. Ug napamatud-an nato dinhi, sa Biblia, karong gabhiona, nga nagsaad si Cristo nga motungha sa kaulahiang mga adlaw, sa Iyang Iglesia, ug pagbuhaton na sa mga tawo ang mga butang nga gibuhath nila sa Sodoma kaniadto, ug uban pa, sama sa giwali niya." Mao kadto ang pang-pasiuna kong wali. "Ug, karon, dinhi nakita ko kini nga nagakahitabo na, karon mismo." Kita n'yo? "Karon, oo."

142 "Karon, daghan ka na og giadtoan nga mga doktor. Aduna ka na og upat ka mga operasyon."

143 "Hain kaha siya nakakuha niana nga inpormasyon? Hain kaha kana gikan? Kanang gamay'ng, opawon nga tawo wala man lang gani siya may nahibal-an niini. Hain kaha kana gikan?"

"Ug sa dihang nagapadulong ka pa lang dinhi, *ingon-ani-ug-ingon-ana* ang nahitabo."

144 "Grabe!" Kita n'yo? "Karon, eksaktong ingon niana gyud ang iyang giwali. Ingon niana ang Pulong."

145 Apan, kabalo mo, miingon si Satanas, "Kabalo ka, kung dawaton mo kana, ang imong pastor..." Wala kana'y unsa man nga kahilambigitan niini. Kita n'yo? Isalikway ang mga pagpangatarungan. Kita n'yo? "Apan miingon ang imong doktor nga kinahanglan nimong moadto sa institusyon sa mga buang." Isalikway ang mga pagpangatarungan.

146 "Nagahulat ako nga makita kung unsay igasulti sa Dios mahitungod niini." Kita n'yo? Dayon ang Dios...wala ako kahibalo kung unsay isulti. Dayon nakita kadto sa Espiritu ug gibutyag kadto.

147 Gitoohan niya kadto. Wala gayud siya nangatarungan, "Sa kada tuig, kada tuig mismo, ginaatake ako og nerbiyos, nawala sa hustong pangisip, daghan nang mga operasyon ug uban pa, tanan na niining mga butang; aba, dili kini katoohan, nga hunahunaon kong mamaayo ako dinhi, og dihadiha dayon." Apan wala gyud siya naghunahuna og mga pagpangatarungan. Mitoo lamang siya. Ang pagtoo mao'y nagpahimo niadto, ug naayo siya, dihadiha dayon.

148 Kung buut ninyo nga mosulat kaniya, bueno, mahimong ihatag ni Billy kaninyo kung asa siya nagapuyo. Bueno, karon. Karon, ang pa- . . .

149 Mangatarungan ang kaalam. Karon. . . Apan ang pagtoo wala gyu'y pagpangatarungan. Wala kini og unsa man nga pagabuhaton kondili ang manghawid lang sa Pulong. Nagapanghawid kini sa saad.

150 Karon magabasa kita og diyutay. Ablihan nato ang Mga Taga-Roma, ika-4 nga kapitulo, ug mobasa lang og diyutay. Ug basin maapikihan na kita sa panahon, basahon lang nato kini nga mga Kasulatan, Mga Taga-Roma, sa ika-4 nga kapitulo. Tungod kay, gusto ko gayud nga basahon ang Pulong. Maayo ang mahatag kaninyo sa—sa pagbasa Niini. Mga Taga-Roma, sa ika-4 nga kapitulo, ug sugdan nato sa ika-17 nga bersekulo. Paminaw.

151 Si Pablo, aduna siya'y gisulat nga komentaryo mahitungod sa kinabuhi ni Abraham, kabalo ba mo, nga walay unsa man nga gisulti mahitungod kang Abraham nga nakaadto siya sa Gerar, ug wala gyu'y unsa mang ingon-ana sa komentaryo, kabalo mo. Ingon niini lang, "Mitoo si Abraham sa Dios," ug si Pablo, kadtong bantugang apostoles, misulat siya og usa ka komentaryo mahitungod kang Abraham.

152 Ika-17 nga bersekulo, "Ingon sa nahasulat na . . ." Gusto ko kini: si Pablo, nga nagapabilin sa Pulong.

*(Ingon sa nahasulat na, Gibuhat ko ikaw nga amahan sa daghang mga nasud,)* . . .

153 "Gibuhat ko." Setenta'y-singko anyos na ang panuigon ni Abraham kaniadto. Nagpuyo siya uban sa iyang asawa niadtong siya'y usa pa ka . . . niadtong pareho pa sila nga mga batanon. Igsoon niya kadto sa amahan. Walay mga anak; baog siya ug ang iyang asawa apuli. Apan gitagbo siya sa Dios ug miingon, "Gibuhat ko," human na, sa wala pa ang pagkatukod sa kalibutan, oo, "gibuhat Ko ikaw nga amahan sa daghang mga nasud." Dili nga sa daghang mga anak, kondili sa daghang mga nasud. Hunahunaa ninyo kana.

*. . . sa atubangan niya nga iyang gitooan, ang Dios kana, bisan ang Dios, nga maoy nagahatag og kinabuhi sa mga minatay, ug nagatawag sa mga butang nga wala magalungtad ingon nga nagalungtad sila.*

154 Ayaw pagpangatarungan, ayaw gayud. Paminaw.

*. . . nagatawag sa mga butang nga wala magalungtad ingon nga nagalungtad sila.*

*Nga batok sa paglaum . . .*

155 Grabe! "Ni paglaum wala na gyud." Unsa kaha kung nangatarungan siya? "Wala na gyud ni paglaum."

*Nga tungod sa paglaum mitoo siya batok sa paglaum,  
aron siya mahimong amahan sa daghang mga nasud;  
sumala sa ginaingon, Maingon niana ang imong  
kaliwatan.*

156 Bisan unsa pa man nga ubang butang ang isulti. “Mao na’y giingon sa Dios, ug mao na gayud kana.” Oh, kung nagpabilin lang unta si Eva niana! Kita n’yo? Apan mihunong siya, aron mangatarungan, alang sa kung unsang kaalam. Wala nangandoy og unsa man nga kaalam si Abraham kaniadto. Ang Pulong lang ang gusto niya. “Mao na’y giingon sa Dios, ug mao na gayud kana.”

157 Kabalo mo, giwali ko na ang mahitungod niini, sa makadaghan nang higayon. Miadto ug mipalit na sila og mga lampin ug mga perdible, ug tanan na, nangandam na sila alang sa maong bata, ug si Sarah naghimo na og gagmay’ng mga sapatos sa bata. Ug milabay ang daghang mga katuigan. “Dalaygon ang Dios, maangkon gyud nato kini, bisan pa man. Husto kana.”

158 “Aba, ang imong asawa,” miingon ang doktor, “bueno, dili siya makapanganak. Dili kamo mahimong makabaton og bata.”

“Ug ayaw ako sultihì og ingon-ana. Makabaton gayud kami niini, bisan pa man. Mao gyud kana.”

159 “Batok sa paglaum, apan mitoo tungod sa paglaum.” Wala na gyu’y paglaum, apan gitoohan gihapon niya kadto sa dihang patay na ang paglaum, nganha kaniya. Patay na ang paglaum alang sa tanang siyentipikong pagtuki, matag kapanguhaan og kaalam. Wala na’y paglaum, apan gitoohan gihapon niya kadto. Unsa man kini? Pagtoo ngadto niini; pagtoo sa paglaum sa dihang wala na’y paglaum. Hum! Gusto kong magpabilin niana sa makadiyut lang. Pagtoo sa paglaum sa dihang wala na gyu’y paglaum, apan mitoo gihapon siya sa paglaum. Kita n’yo? Tungod kay, miingon siya, “Gisultihan Niya ako, ‘Maingon niana ang imong mga kaliwatan.’”

160 Karon, ika-19 nga bersekulo. “Ug wala maluya sa ‘kaalam ba, kahibalo ba, o sa iya bang digri’”? [Nagaingon ang kongregasyon, “Dili.”—Ed.] Dili.

*. . . wala siya maluya sa pagtoo, (ha, tan-awa ninyo),  
giisip niya ang iyang kaugalingong lawas nga daw patay  
na, . . .*

161 Wala na’y paglaum. Patay na ang iyang lawas. Paminawa ninyo, ang mosunod.

*. . . sa haduol na siya sa usa ka gatus ka tuig ang  
panuigon, ug . . . ang pagkapatay sa tagoangkan ni Sara:*

162 Patay na ang paglaum. Patay na ang iyang lawas. Patay na ang tagoangkan ni Sarah. Unsa ma’y gihimo niya? Sunod nga bersekulo, “Wala siya magduhaduha.” Oh, grabe!

*Apan sa nagalantaw siya sa saad sa Dios wala siya magduhaduha tungod sa kakulang sa pagtoo, kaalam; kondili nalig-on pinaagi sa pagtoo, nga nagahimaya sa Dios;*

163 Oh, grabe! Unsa pa man?

*Ug masaligon sa hingpit nga, ang Dios, arang makatuman sa iyang gisaad.*

164 Hum! Bisan unsa pa man, wala gyu'y pagpangatarungan, man lang. Gitooan lang niya ang—ang Pulong ug nanghawid Niini. Karon, kung *kini* mao ang Pulong sa Dios, motoo ba kamo Niini? [Nagaingon ang kongregasyon, “Amen.”—Ed.] Kung ingon-ana nganong ginaduhaduhaan man ninyo ang unsa man nga Pulong Niini, ang unsa man nga saad Niini? [“Amen.”] Unsaon man ninyo sa pagpakaingon nga bahin lang *Kini*, ug wala *Kini* pulos; ug *Kini* mao'y *ingon-niana*, pilion lang ang gusto ninyo? Dili ninyo mahimo kana. Mahimong maayo ang tanan-tanan Niini o kaha walay ni usa nga maayo Niini. Husto. Busa, sa pagkakita ninyo nga Kamatuoran gyud *Kini*, manghawid kamo Niini. Ayaw ninyo *Kini* buhii, bisan unsa pa ang mga kahimtang, bisan unsaon pa nila sa pagpaninguhang mangatarungan, “Aba, dili mo mamahimo kana.” Ayaw, ayaw gayud pagpaminaw niana, bisan pa man. Magpabilin mismo Niini. Gisaad na gyud *kini* sa Dios.

165 Kung mobarug ako karon alang kang Cristo, ug gihatag Niya kanako ang Balaang Espiritu, ang Iyang Espiritu nga nagapamatuod nga ang Iyang Kinabuhi anaa kanako. Dayon sa dihang mamatay na ako, maningkamot si Satanas, moingon, “Karon, nakita mo, dili man ka miyembro sa usa ka organisasyon.” Magpabilin lang mismo sa Pulong. “Wala mo man gibuhat ang *ingon niini*. Wala mo gibuhat ang *ingon niana*.” Bisan *unsa pa man, kana*, walay pagpangatarungan si Satanas mahatungod Niini. Pulong *Kini* sa Dios. Magpabilin gyud sa Pulong. Kita n'yo? Ginasalikway Niini ang tanang mga pagpangatarungan. Kita n'yo? Wala na kamo og unsa pa man nga mga pagpangatarungan; manghawid lamang sa Pulong. Kita n'yo?

166 Karon, ang pagtoo nagasalig lang sa Iyang Pulong. Kita n'yo? Ingon niana unta ang gusto Niya nga pagabuhaton nila. Ingon—ingon niana, karon, nakuha na ninyo ang basihanan niini karon. Ingon niana gayud ang gusto sa Dios nga buhaton sa tawo: ang mosalig sa matag Pulong nga Iyang gisulti.

167 Ug misalig si Eva sa halos kinatibuk-an Niini kaniadto. Apan aduna lang siya'y usa ka gamay'ng butang nga gidawat, “Bueno, kung puno lang ako og kaalam, tingali—tingali og ingon niini ang pasabot niana. Tingali'g *ingon niini* gyud siguro ang pasabot niana.” Kita n'yo? Dinha mismo niya nabuhian ang iyang pagpanghawid. Dinha mismo siya sugod miunlod, didto

mismo. Dinha mismo miunlod ngadto sa lubnganan ang tibuok nga kaliwatan sa tawo, sugod mismo kaniadto, tungod kay giduhaduhaan man niya ang usa ka Pulong.

<sup>168</sup> Moingon ang uban kanila, “Bueno, nagatoo ko nga tinuod *Kini*. Nagatoo ko nga tinuod *Kana*. Nagatoo ko nga mahimong makaluwas ang Dios, apan wala ako nagatoo nga nagapangayo Siya. Nagatoo ako sa Espiritu Santo, sigurado gayud, nga mikanaug sa Adlaw sa Pentecostes, apan wala ma’y bisan asa nga nagaingon nga mikanaug ang Espiritu Santo, human sa Pentecostes.”

<sup>169</sup> Oh, igsoon! Ingon niana ang ginaingon nila; nga nagapatawag sa ilang mga kaugalingon nga mga iglesia kono ni Cristo. Kita n’yo? “Adunay dagway sa pagkadiosnon, apan ginapanghimakak ang Pulong.” Huh! Uh-huh! Mao kana. Kita n’yo?

<sup>170</sup> Kinahanglan nga magtoo. Ayaw pagpangatarungan. Magtoo. Ayaw paninguhaa nga makabaton pa og kaalam. Toohi lang ang Pulong.

<sup>171</sup> Ang kaalam nagapaningkamot gayud nga mangatarungan ug mopresentar og usa ka mas maayo nga butang. Karon, eksaktong ingon niana gayud ang gisulti ni Satanas kang Eva. “Karon, dili ka mamatay. Sigurado gayud nga dili ka mamatay, tungod kay ang Dios usa ka maayo nga Dios.”

<sup>172</sup> Usa Siya ka maayo nga Dios. Ug ang bugtong paagi lang nga makasalig ko Kaniya, ingon nga usa ka maayo nga Dios, tungod magapabilin gayud Siya sa Iyang Pulong.

<sup>173</sup> Unsaon man ninyo sa pagsalig nga matinud-anon ako sa dihang dili man ako matinud-anon sa akong pulong? Kung sultihan ko kamo og usa ka butang, ug lahi ang akong buhaton, nan ang akong pulong gayu’y medyo kaduhaduhaan. Kita n’yo?

<sup>174</sup> Busa, ang nakapahimo Kaniya ingon nga usa ka maayong Dios, mao’y tungod nga gisulti Niya ang Pulong, ug kinahanglan natong magkinabuhi pinaagi niana nga Pulong. “Ang tawo dili mabuhi sa tinapay lamang, kondili sa matag Pulong sa Dios, nga nagagula sa baba sa Dios.” Kung ingon-ana, kinahanglan nga magpabilin ang Dios sa niana nga Pulong. Mao kana’y nakapahimo Kaniya nga usa ka maayong Dios.

<sup>175</sup> Karon, kung moingon Siya, “Bueno, pasagdan Ko ra sila nga malusotan *kini*. Ako, pasagdan Ko ra sila nga buhaton *kini*. Bueno, okey lang *kana*. Oh, Ako, Akong—Akong ibalhin na lang diay *dinhi*,” aba, usa Siya ka paling-paling kon ingon-ana, kita n’yo; Siya’y dili Dios; Siya’y—Siya’y usa ka ordinaryo lang nga tawo kon ingon-ana. Kita n’yo? Apan, aron nga mamahimong maayo gyud nga Dios, kinahanglan Niya nga magpabilin sa Iyang Pulong. Mao kana’y makapahimo sa tanan Niyang anak nga...Kung pasagdan ra Niya *kanang* usa nga

manapaw, *kanang* usa nga maghuboghubog, ug—ug *kanang* usa nga mamakak, *kanang* usa nga mangawat, ug *kanang* usa pa nga mobuhat—mobuhat ra sa *ingon-niini*; dayon himoon kaha ako niana nga mosunod gayud sa Pulong, aron makasulod?

<sup>176</sup> Aduna Siya og usa lang ka dalan, ug ang tanan nga mosulod moagi gayud niana nga pultahan. “Masigpit ang pultahan, ug hiktin ang dalan. Wala og unsa man nga kahugawan ang makasulod dinha.” Sa Pinadayag, giingon dinha, “Sa gawas anaa ang mga lumayan, ang mga makihilawason, ug ang mga iro, ug uban pa.” “Bulahan kamo nga nagabuhat sa tanan Niyang mga kasugoan, kay makabaton siya og katungod sa Kahoy sa Kinabuhi.” Husto kana. Adunay usa lang ka dalan, ug mao kana ang dalan sa Dios.

<sup>177</sup> Wala kita nagapangatarungan, wala gayud. Bueno, moingon man ang iglesiang Romano, “Kami ang Iglesia. Kana—Kang Biblia dili gani mahimong. . .Aba, aba, Kana, dili ninyo mahimong. . .” Miingon si Obispo Sheen, “Ang pagpaningkamot nga ikinabuhi Kana, daw sama ra nga nagalakaw ka sa lapokon nga katubigan.” Kita n’yo? Kita n’yo? Unsaon man ninyo kana? Kita n’yo? Kung ingon-ana, kung siya’y husto, nan sayup ang Biblia. Kung ang Biblia mao’y husto; nan siya ang sayup. Karon unsa ma’y inyong ikasulti? Kung husto ang Pulong sa Dios, mahimong si Obispo Sheen kini o—o kaha ang Biblia ang husto. Dili lamang si Obispo Sheen, kondili si Rev. *Ingon-ani-ug-ingon-ana*, ug si Dr. *Ingon-ani-ug-ingon-ana*, ug *Ingon-ani-ug-ingon-ana*. Dili ko na unta isulti pa ang ngalan sa maong obispo, kung wala unta siya nagsulti og ingon niana sa radyo. Apan, nagsulti man siya niana sa radyo, busa sa hunahuna ko mahimo kong isulti ang iyang ngalan. Si Dr. *Ingon-ani-ug-ingon-ana* ug *Ingon-ani-ug-ingon-ana*, miingon og *ingon-ani-ug-ingon-ana* ug *ingon-ani-ug-ingon-ana*. Karon kinsa ma’y toohan ninyo, ang Dios o sila?

<sup>178</sup> “Bueno,” moingon, “Dili gyud *Ingon-niana* ang buot ipasabot Niana.” Ingon-niana gayud ang buot ipasabot kung unsa gayud ang pagkasulat Niini.

<sup>179</sup> Bueno, mao kana ang unang bakak sa yawa. Miingon siya kang Eva kaniadto, “Dili gayud *ingon-niana* ang buot ipasabot Niini. Siguradong maayo kaayo ang Dios nga dili Niya mahimong buhaton kana. Dili kamo mamatay.” Apan namatay sila. Ug mangamatay sila, sa matag higayon. Kinahanglan nga masunod gyud ang Pulong!

<sup>180</sup> Nagapaninguha ang kaalam nga moagi sa—sa mas maayo nga dalan, moderno nga dalan, popular nga dalan, sa . . . usa ka mas masayon nga dalan, nagapangita og malusotan.

<sup>181</sup> Karon, ipananglitan n’yo na lang ang usa ka lalaki dinhi, mahimong nagapakighilambigit ang Dios kaniya. Karon, napamalandungan niyang moduol. Apan kinahanglan niyang

paduolon usab ang iyang asawa. Kinahanglan niyang undangan ang pagtambong og mga party-party sa pagdula og baraha. Kinahanglan niyang undangan ang pag-adto sa mga sayawan. Kinahanglan nga pataason sa iyang asawa ang buhok niini. Kinahanglan undangan sa iyang asawa ang pagpangmeyk-ap. Kinahanglan niyang undangan ang pagpanigarilyo, ang paghubog-hubog. Kinahanglan niyang mohawa niadtong dakung asosasyon nga iyang giapilan. Kinahanglan niyang ipaubos ang iyang kaugalingon diha sa altar. Kinahanglan niyang mobarug ug pagatawgon nga usa ka panatiko, holy-roller, Beelzebub, bisan unsa nga mahimong ibansag kaniya. “Gusto kong mamahimong relihiyoso, apan *dinhi* na lang ko motambong, *dinhi* niini nga iglesia na lang ko magpamiyembro. Estrikto man kaayo diha sa inyo.” Tan-awa ra. Kita n’yo? Aduna gyu’y pagpangatarungan, pagpangatarungan.

<sup>182</sup> Karon moadto kita sa usa ka mahinungdanong punto, sa pipila ka gutlo, mahatungod niana. Kita n’yo? Unsaon man ninyo sa pagpakahibalo kung unsa ang husto ug sayup, kon ingon-ana? Kita n’yo?

<sup>183</sup> Karon, nagapaninguha nga ipasulti ang Pulong og ubang butang, mao kana ang ginahimo sa kahibalo. Ang kahibalo, ang kaalam, nagapaninguha kini nga—nga mangatarungan. Nagapangita ang kaalam og mas maayo nga dalan. Apan wala na’y uban pa nga dalan kondili ang dalan lamang sa Dios. Nagapaninguha ang kaalam nga itudlo, moingon, “Oh, bueno, karon, kabalo mo, dili nato mahimong buhaton kana sa *niini* nga panahon.” Kinahanglan gyud natong buhaton kini, bisan pa man. Kita n’yo? Nagapaninguha nga mangita og mas masayon nga dalan. Nagapaninguha nga ipasulti ang Biblia sa mga butang nga wala ginasulti Niini.

Karon moingon kamo, “Oh, Igsoong Branham, karon ikaw...”

<sup>184</sup> Sa makadiyut lang. Balikan nato pag-usab ang gigikanaan niini. Unsa man kadtong gisulayang buhaton sa yawa pinaagi og kaalam? Ipasulti ang Pulong sa Dios og usa ka butang nga wala gisulti Niini. Husto kana. Gisulayan niyang ipasulti ang Pulong sa Dios og usa ka butang nga wala Niini gisulti. Busa ingon niana usab sa karon, sa dihang ginasulayan nilang ipasulti ang Pulong sa Dios og usa ka butang nga wala ginasulti Niini.

<sup>185</sup> Bueno, moingon sila, “Bueno, sultihan ta ka, Igsoong Branham, wala man kanimo ang hustong interpretasyon.”

<sup>186</sup> Miingon ang Biblia, nga, “Ang propesiya wala’y unsa man nga kinaugalingong paghubad.” Ngano man? Nganong wala man kini og kinaugalingong paghubad? Ngano man? “Ang Pulong sa Ginoo miabot sa mga propeta.” Ginahubad Kini sa propeta. Dili puedeng mahimong usa ka paghubad, nga kinaugalingong lang. Gihubad na Kini sa mga propeta diha kaninyo. Mao na

kana, nahisulat na Dinha mismo. Kinahanglan nga ingon niana gyud kini.

<sup>187</sup> Ang Dios kinahanglan gayud nga adunay usa ka pundamental nga pinaagi niini pagahukman ang tanang mga tawo.

<sup>188</sup> Kung pinaagi kini sa usa ka iglesia, kinsa man kanila ang husto? Mga siyam ka gatus sila, siyam ka gatus nga nagkalainlaing organisasyon. [Nag-ubo si Igsoong Branham—Ed.] Pasayloa ko. Kinsa man kanila ang husto? Unsaon man ninyo sa pagpakahibalo nga makasulod kamo? Unsa kaha kung Methodist ka, ug ang Baptist diay mao'y husto? Unsa kaha kung Pentecostal ka, unya ang mga Presbyterian diay mao'y husto? Unsa kaha kung Katoliko ka, ug ang mga Lutheran diay mao'y husto? Unsa kaha kung Lutheran ka, ug unya ang mga Katoliko diay mao'y husto? Kita n'yo?

<sup>189</sup> Kinahanglan aduna gyu'y usa ka basihan sa kon asa man. Busa kung ang Pulong . . .

<sup>190</sup> “Sa sinugdan mao ang Pulong, ug ang Pulong kauban sa Dios, ug ang Pulong mao ang Dios.” Kita n'yo? Anaa na sa Dios ang Pulong kaniadto pa. Ang Dios Kadto. Iyaha na Kining mga hunahuna nga kauban Niya, Didto kaniadto pa. Ang mga hunahuna sa Dios Eternal sama sa Dios nga Eternal. Amen. Dili kana hinapaw'ng gatas, igsoon. Kita n'yo? Ania kini. “Ang mga hunahuna sa Dios maoy Iyang Pulong, sa sinugdan,” kana mao'y, “sa Eternidad,” karon, sa dihang ang “sinugdan” unang misugod, nagkaaduna na og panahon. “Sa sinugdan mao ang Pulong, mga hunahuna sa Dios, ug ang Pulong kauban sa Dios, ug ang Pulong mao ang Dios.” Kita n'yo? Kung unsa ang Dios maoy kung unsa ang Iyang mga hunahuna.

<sup>191</sup> Ingon niana kaninyo, usab. Kung unsa ang inyong mga hunahuna maoy kung unsa kamo. Bisan unsa pa ang ginapaninguha ninyong ikinabuhi, og unsa man nga pagkinabuhi, ang inyong mga hunahuna mao'y kung unsa gayud kamo. Mahimong magpakaaron-ingnon ka, manglihok ingon nga usa ka maayong tawo, apan sa imong kasingkasing diay usa ikaw ka mananapaw ug unsa pa man. Ingon niana ikaw, kung unsa ang imong mga hunahuna.

<sup>192</sup> Ug ang mga hunahuna sa Dios mao'y Iyang Pulong nga kauban na Niya kaniadto ug nga anaa na Kaniya, ug ang Dios Kadto. “Sa sinugdan mao ang Pulong, ug ang Pulong kauban sa Dios, ug ang Pulong mao ang Dios. Ug nahimong unod kadto nga Pulong.” Napahayag ang mga hunahuna sa Dios diha sa usa ka tawhanong lawas, “Nahimong unod, ug nagpuyo ipon kanato.” Mao kana.

<sup>193</sup> Karon, kung aduna kamo'y Kinabuhing Walay Katapusan karon, anaa kamo sa Dios. Tungod nga ang Kinabuhi sa Dios anaa kaninyo, kamo mao ang naipahayag nga hunahuna sa



Dios. Whew! Kon ingon-ana, nan ayaw pagpaminaw sa bisan unsa man nga mga pagpangatarungan, kay basin pagakuhaon kaninyo ang inyong purongpurong, ug ihatag sa uban. Ayaw gayud pagdawat og unsa man nga mga pangatarungan, ayaw gayud. Toohi lamang nga unsa ang giingon sa Dios mao ang Kamatuoran, ug pagpabilin kamo Niini.

<sup>194</sup> Ang mga pagpangatarungan, pinaagi sa kaalam, nagapaninguhang ipasulti ang Pulong og butang nga wala ginasulti Niini.

Karon moingon kamo, “Tinuod ba kana, Igsoong Branham?”

<sup>195</sup> Bueno, mobalik kita sa Genesis ug atong hibaloon. Moadto kita sa Genesis, sa ika-3 nga kapitulo sa Genesis, ug basahon nato ang—ang—ang ika-4 nga bersekulo, tan-awon nato kung—kung ginasulayan ba gyud sa kaalam nga ipasulti ang Pulong og butang nga dili man ginasulti Niini. Sa ika-3 nga kapitulo sa Genesis, sa ika-4 nga bersekulo.

*Ug ang bitin miingon sa babaye, Dili gayud kamo mamatay:*

<sup>196</sup> Kita n’yo na kung unsay ginapresentar niini? Unsa man kini? Ginasulayang ipasulti ang Pulong og usa ka butang nga wala man gisulti Niini. Kita n’yo?

Miingon ang Dios, “Mamatay kamo.”

<sup>197</sup> Ang kaalam, maingon sa ginapresentar ni Satanas sa maong babaye kaniadto, miingon, “Dili gayud kamo mamatay.” Kita n’yo? Ginasulayan gyud niini nga ipasulti ang Pulong og butang, nga, “Dili gyud kini ingon niana.”

<sup>198</sup> Ingon niana ang kaalam sa karon. Oh, igsoon, daw sa unsa kitang nangabalda tungod niana! Mga seminaryo, mga tulonghaan sa teolohiya, kana ang mismong pugaran nila. Dinha ang ilang mga tugkaran, ang pagpaninguha nga ipasulti ang Pulong sa Dios og butang nga wala ginasulti Niini.

<sup>199</sup> Ginahagit ko ang si kinsa man nga ipakita kanako sa Biblia ang Kredo sa mga Apostoles. Ginahagit ko ang si kinsa man nga ipakita kanako sa Biblia ang “panag-ambit sa mga santos”. Ang Protestante, ug Katoliko pareho silang nagatoo niini. Ginahagit ko kamo nga ipakita kanako ang bisan unsa nianang mga butanga, sa Biblia. Kita n’yo? Kana ang mismong tugkaran sa kaalam nga nagapaninguhang mangatarungan.

<sup>200</sup> “Ang atong pagpakig-away dili unodnon, kondili gamhanan, nga pagpangsalikway og mga pagpangatarungan, kita n’yo, ang pagpangguba sa mga kuta ni Satanas.” Kanang maayo kaayong, mabulakon kon manulti, maanyag nga linalang! Dili nga usa ka salbahis nga manglilimbong; dili, dili, ingon niana ang anaa sa sulod. Apan, ang sa gawas, doble ka mas matahum ang sala. Kabalo na mo, matahum ang sala.

201 Pila man sa mga kalalaken-an dinhi, ug mga kababayen-an, ang lagpas na sa singkwenta anyos ang panuigon? Ipataas ang inyong mga kamot. Dili ko . . . Dili ko na unta pangutan-on ang mga kababayen-an. Apan akong . . . Dawat natong tanan ang kamatuoran. Gusto ko kamong pangutan-on og usa ka pangutana. Makita ba ninyo karong panahona nga ang mga kababayen-an ingon ka doble ka mas matahum, halos, kay sa mga kababayen-an kaniadto, nga ingon niana na, kasagaran sa tibuok kalibutan? Kung ingon man niana, ipataas ninyo ang inyong kamot. Sigurado. Ingon ka doble ka mas matahum sila kay sa kung unsa sila kaniadto.

202 Pagkuha mo og pipila ka karaan na nga mga retrato. Tan-awa ninyo si lola; tag-as ang iyang palda; nakasalapid ang iyang buhok nga nakabuhayhay diha sa iyang likod. Dili kaayo siya matahum tan-awon.

203 Tan-awa ninyo ang usa ka modernong babaye sa karon. Huot kaayo ang gamay'ng bistida, nga, makita na ang matag porma sa iyang lawas, nga inig molihok siya dili mahimong dili siya makasala. Nagalakaw, nga nagakiay-kiay diha sa dalan, nga halos tanang meyk-ap ug mga kosmetiko nga mahimong ibutang sa Max Factor kaniya, anaa na kaniya. Ginabugkos ang iyang buhok nga sama sa binugkosan sa usa ka batang babaye. Nagasul-ob og mubo nga palda nga ingon-ana ra ka taas, halos, ibabaw na sa iyang mga tuhod, kana kung duna man siya'y gisul-ob, o unsa man. Apan, tan-awa ninyo siya, maanyag siya. Nasayod gyud si Satanas kon unsaon niya sa pagbuhat niana. Siya mao ang tigpasugod sa kaanyag, kanang matang sa kaanyag nga nagaresulta og sala.

204 Ang yuta, mismo, usa kini ka tagoangkan. Hain man gitanum sa Dios ang Iyang mga binhi? Hain man diay ginatanum ang mga binhi? Sa tagoangkan. Nagatanum ang Dios og mga binhi. Ug unsa ma'y gibuhat sa tawo? Sama sa ginabuhat sa mga yawa, diha sa usa ka tagoangkan, dauton niya ang bata diha kutob sa iyang mahimo. Ingon niana ang gipangbuhat sa mga yawa sa yuta, nagapang-hybrid, manghimo og mga linalang, nga dili mao sa kung unsa sila unta sa orihinal. Biyaan ko una ang mahitungod niana; kay basin dili na ko makadangat sa uban pa nga hilisgotanan dinhi, nga akong naisulat. Kabalo na mo kung unsay buot kong ipasabot niana. Mao kana'y hinungdan nga aduna gyu'y tinuis nga mga binuhat nga igasalikway. Human na ang Dios niini. Wala na gayud sa kahan-ayan ang kalibutan. Sayup na ang tanang butang. Hugaw na ang mga kasapaan. Kontaminado na ang hangin. Grabe na gyud kahugaw! Grabe na gyud ka baho!

205 Usa ka tigulang nga Indian, dili pa lang dugay, ang miingon, "Tawong puti, dili ko na gusto nga mabuhi pa og dugay. Human na ko sa pagpakig-away." Miingon, "Asa na kaha ang akong mga anak? Mangamatay na lang ba sila tungod sa gutom? Asa na

kaha ang akong asawa?” Ingon pa, “Sa wala pa kamo nanganhi dinhi uban sa inyong mga kababayan-an ug whiskey, ug sala, nagkinabuhi kami nga malinawon. Amoa kini nga yuta. Gihatag kini sa Dios kanamo, apan giilog ninyo kini gikan kanamo. Pagabayaran ra ninyo kana, sa umaabot nga adlaw.”

<sup>206</sup> Tan-awa ninyo, karon. Kanang halapad, maanindot nga mga disyerto ug mga kabukiran kaniadto nanganawkanaw na karon sa kabaho, sa sala, sa mga botelya sa whiskey, sa mga lata sa beer. Ang matag dapit napuno na og mga balay-imnahan ug mga binuang. Ang Reno, Nevada, kanang halapad nga disyerto kaniadto, wala na’y lain kondili grabe nga prostitusyon. Ang dagkung mga siyudad, bisan ang hangin ug ang palibot kontaminado na kaayo. Ang kaniadtong maanindot nga mga kabukiran, karon gihawanan na og tanan na lang nga matang sa mahimong put-lon. Ang kaniadtong maanindot nga mga kahoy, gipangputol na kini. Ang kaniadtong mga kamingawan, kon diin padayon nga nagadagayday ang mga tubig, karon kontaminado na. Ang tibuok kalibutan mora og gibalibag diha sa usa—usa ka hulmahan. Ang yuta magaanak og bata gikan sa maong matang nga pagkabinhi. Gituis na, sa mga yawa nga maoy nagdaut niini, naghugaw niini, oo, kini—kini tinuis na nga binuhat. Igasalikway kini sa Dios ug magasugod usab og bag-o. Husto kana.

<sup>207</sup> Unsa man ang nagpahinungdan niini? Usa ka tawo nga mitoo sa usa ka gamay’ng . . . nga wala mitoo sa usa ka gamay’ng bahin sa Pulong sa Dios.

<sup>208</sup> Nagaagulo ang tibuok kalibutan. Ang Biblia nagaingon, nga, “Bisan ang kinaiyahan mismo nagaagulo alang nianang adlaw sa kahupayan, nagahulat sa pagkapinadayag sa mga anak sa Dios.” Nagapanglimbasug ang mga kahoy, sa walay kapuslanan. Nagapaningkamot ang mga bulak nga magmadasigon alang sa . . . Apan, nanag-agulo sila ug nanaghilak, ug nasayod nga aduna gyu’y butang nga sayup. Grabeng pagkatuis! Dili makaanak ang tagoangkan og hingpit, tungod kay tinuis na ang maong tagoangkan. Baho na ang yuta. Naligo kini sa dugo sa mga inosente. Aduna siya’y . . . Mora siya og . . .

<sup>209</sup> Aduna unta ko’y isulti, apan tingali’g diretsahan ra kaayo. Kini—kini—nanimaho kini. Miingon ang Dios, “Nanimaho kini,” sa atubangan Niya, mahugaw kaayo. Pagmosulod ka sa kasilyas, sa mga ihianan, grabe kaangso, kontaminado kaayo. Eksaktong ingon niana usab ang baho sa kalibutan, gani, ingon niana ang nasimhotan sa Dios niini. Kahugawan, pagkahugaw na gayud sa tibuok kalibutan.

<sup>210</sup> Pabuthon kini sa Dios aron madugmok. “Magabuhat Ako og usa ka bag-ong mga langit ug yuta,” ingon Niya. Oo, sir.

<sup>211</sup> Unsa man kini? Dili Milenyum ang migawas sa iyang tagoangkan. Usa ka tinuis nga butang ang gianak niya. Ngano man? Tungod kay naninguha og kaalam.

<sup>212</sup> Wala ako og unsa man nga batok sa Florida. Wala ko usab kini ginapasabot batok kaninyo nga mga taga-Florida. Apan niadtong mitabok ako ug miadto sa Florida sa unang higayon, ug mibalik ngadto sa utlanan niini tali sa Georgia, mitindog ako didto ug ingon ko, “Ingon nga usa ka lungsoranon sa Amerika, ginabalik ko ang akong bahin niini ngadto sa mga Seminole kung asa gyud kini nahiangay.” Aba, mas ginaatiman pa nila ang ilang mga nataran didto kay sa ginaatiman ko ang akong buhok, tupong kaayo ang mga sagbot. Ang mga punoan sa palmera didto aduna pa’y nakapalibot nga mga suga. Adunay mga dagku og magarbong mga yate ug uban pa, naninguhang magpatungha og usa ka Milenyum nga walay paghinulsol. Para kanako, usa lang kini ka walay kapuslanan.

<sup>213</sup> Minilyon ka higayon, nga mas gustohon ko pa nga mokatkat sa British Columbia, ibabaw sa usa ka bungtod, ug motan-aw sa mga kabukiran nga gibuhat sa Dios, ug nga wala pa gayud nahilabtan sa mga kamot sa tawo. Sigurado gayud.

<sup>214</sup> Ang pag-anhi sa niining mga siyudad, sa dagkung mga panimalay, kana, wala gyud kana nagapadani kanako. Dili ko gusto ang ingon nianang mga butang. Kita n’y’o?

<sup>215</sup> Apan nasayod kong moabot ang adlaw, usa ka adlaw, pagausabon ra kini. Igatambog niya ang iyang nagaantus nga anak. Ang yuta, pagausabon kini, usa ka adlaw. Bueno.

<sup>216</sup> Nagatoo ang pagtoo nga nahisulat kini, ug nagaingon nga, “Ang Pulong wala gayu’y sayup.”

<sup>217</sup> Nakadungog na ba kamo og mga ministro nga nagaingon, “Bueno, sultihan ko kamo, ang—ang King James Version, o kining Revised Version, o *kini* dinhi, kini medyo—kini medyo lahi gayud. Sa tinuod lang, dili man Ingon-niana ang ginapasabot niini”? Nakadungog na ba mo niana? [Nagaingon ang kongregasyon, “Oo.”—Ed.] Oh, grabe! Kontaminado na gayud ang kalibutan sa mga ingon niana. Kita n’y’o? Apan wala gyud nagatoo ang pagtoo sa ingon niana.

<sup>218</sup> Nagatoo ang pagtoo, sa usa ka Dios nga nakahimo sa pagbuhat kanako, nga makahimo sa pagpabilin niining Libro diha sa kahan-ayan aron nga akong ikinabuhi. Kung pagahukman ako sa Dios Nga nagbuhat kanako, dayon dili makahimo sa pagpabilin sa Iyang Libro diha sa kahan-ayan, kung ingon-ana Siya’y dili gayud maayo nga Dios. Tan-awa. Busa ginatoohan ko ang matag Pulong Niini nga mao ang Kamatuoran. Oo, sir. Unsa ma’y ginahimo niini, aron motoo ako niana? Ginahatagan Niini ang pagtoo og hingpit nga dapit nga pahulayanan diha Niini. Kita n’y’o? Mao nga dili ninyo mahimong dili-toohan, ug moingon nga kana nga Pulong wala sa

kahan-ayan, bisan sa unsa mang paagi. Kinahanglan gyud ninyo Kining toohan sa kung unsa gayud Kini.

219 Kung mosulay kamo nga mogamit og kaalam, aron moingon, “Karon tan-awa dinhi. Dili man makatarunganon nga moingon ang Dios nga pagabuhaton niini ang butang nga *ingon niini*.” Apan gibuhat gyud kadto sa Dios. Kita n’yo? Husto kana. Karon, kung moingon kamo, “Bueno, karon, kung gibuhat man sa Dios ang *ingon niini*, kung gikuha Niya ang kinabuhi sa usa ka tawo tungod kay dili kini og usa ka Levita, ug tungod nga nahikap sa kamot sa maong tawo ang Arka sa dihang hapit nang mahulog Kini.” Bisana unsa pa kadto nga tawo, gikuha gyud sa Dios ang iyang kinabuhi tungod niadto.

220 Miingon ang Dios, “Mga Levita, lamang, ang mohikap Niana.” Apan gigunitan kadto sa maong lalaki. Mao kadto ang nagpahingawa kang David kaniadto, kabalo na mo. Kita n’yo? Usa ka Levita, walay si bisan kinsa kondili usa ka Levita lang ang angay’ng mohikap sa maong Arka. Ug ania na ang Arka, nga nagabalik alang sa usa ka rebaybal, ug dunay usa ka tawong taga-gawas ang misulay sa pagdala sa Pulong.

221 Ginapakita ra niana nga ang dinihogan lang gyud sa Dios ang magahikap nianang Pulong. Kini nga mga kredo ug mga denominasyon wala gayu’y katungod nga manginlabot Niini. Ang Balaang Espiritu lamang ang adunay katungod nianang Pulong, ug kamatayon gayud ang mahiaguman sa bisan kinsa nga magahikap Niana. O, ang dili-pagtoo sa bisan unsa man Niana, o magatudlo niini, “Pagataktakon usab, ang iyang bahin, gikan sa Libro sa Kinabuhi.” Ayaw gayud Kini hikapa sa inyong mga kamot. Pahilayo kamo Niini. Paminaw. Toohi ninyo kung unsa lang ang ginasulti Niini. Ayaw pagdawat sa pulong ni bisan kinsa pa man. Dawata ninyo kung unsay gisulti Niini. Pagpabilin diha mismo sa Pulong. Kamatayon gayud ang mahiaguman sa pagbuhat og unsa man nga lahi Niini. Karon, tungod kay kini . . .

222 Unsa ma’y ginahimo sa pagtoo? Nagatoo Kini sa kung unsa lang gyud Kini. Sa ingon nianang paagi nga gitipigan sa Dios Kini sa tanang mga kapanahonan, ug ania na Kini. Mao Kini ang Pulong sa Dios, para kanako. Ginatahud kana sa Dios. Nagahatag Kini og usa ka hingpit nga pagtoo sa pagkalunsay Niini.

223 Unsaon mo man pagminyo sa usa ka babaye kung kana nga babaye naga—naga—nagalayas-layas ug magbuhat og tanan na lang, ug nagkinabuhi diha sa prostitusyon ug tanang uban pa? Ug—ug, dayon, moadto ka ug maabtan mo siya diha sulod sa usa ka balay sa prostitusyon. Paggawas ninyo, ug siya’y . . . Moingon siya, “Bueno, ako—maningkamot ako nga mamahimo nang usa—usa ka mas maayo nga babaye.” Dili ka na mahimong magkaaduna pa og pagsalig sa niana nga babaye. Kita n’yo? Dili ka na puedeng mosalig. Unsaon man usab sa usa ka babaye nga

magkaaduna pa og pagsalig sa usa ka lalaki nga nagbuhat pud sa mao rang butang? Dili ninyo mahimong tukoron ang inyong pagsalig dinha. Walay bisan unsa man dinha nga pagatukoran. Kita n'yo? Dili ninyo mahimo kana.

224 Puede ba diay kamong moanhi dinhi ug moingon, “Adunay usa ka bangka dinhi nga anaay daghang mga bangag, ug pagabutangan ko kini og mga sako sa sagbot. Tingali'g, mahimo ra niini—niini nga maasdang ang sulog, sa pagtabok sa suba”? Ug ayaw ko gayud mamasin niana, sa dihang aduna man usa dinhi nga husto ang pagkabuhat. Sigurado.

225 Nganong dawaton man nato ang usa ka teolohiya nga hinimo sa tawo nga puno og mga bangag? Nagpamatuod kini nga sayup kini. Kita n'yo? Sa dihang, *ania* man unta ang usa dinhi, nga mao gayud ang Pulong sa Dios, Nga naasdang na ang sulog, ang matag makusog nga bagyo ug hangin. Nagpabilin gayud Kini nga matinud-anon. Kanunay Kining magpabilin nga ingon niana. Bueno.

226 “Ang mga langit ug yuta mangahanaw,” ang ingon ni Jesus, “apan ang Akong Pulong dili gayud.” Ngano man? Eternal Kini. Anaa na Kini sa sinugdan pa lang. Mianhi lamang Siya aron ipahayag ang Pulong sa Dios. Siya mao ang kapahayagan sa Dios. Ginapahayag sa Dios ang Iyang Kaugalingon pinaagi sa Iyang Anak.

227 Nagsugod ang tanan niini sa Genesis, ang gigikanan nga kapitulo, ug ingon niana na sukad pa kaniadto. Sukad kaniadto, ingon niana na ang esena, mao ra nga butang kini kaniadto pa, usa ka pagpakig-away tali sa kaalam ug pagtoo, kanunay nga nagapakig-away. Busa, ang kaalam mao'y iya sa yawa ug sa iyang mga anak.

228 Namatikdan ba ninyo? Kamong tanan nakakita na og karnero. Kamong tanan nakakita na og mga kanding. Apan, kahibalo ba mo, nga ang paghilak nila halos magkapareho ra gyud, nga magkinahanglan pa og usa ka tinuod nga magbalantay aron masulti ang kalainan. Ibutang kanang usa ka tigulang nga kanding dinha, pasagdi siya nga mohilak, ug mohilak. Dayon umanhi ka dinhi dapit ug pagbutang og usa ka karnero dinha, ug pasagdi siya nga mohilak. Paminawa kana. Managsama ra ang ilang tingog. Apan mailhan gayud sa tinuod nga magbalantay kana nga tingog.

229 Miingon si Jesus, “Ang Akong mga karnero nakaila sa Akong tingog.” Kita n'yo? Mahimo nilang isulti kung usa ba kini ka kanding. Bueno, usa pud Siya ka karnero, Siya Mismo. Uh-huh. Dili Siya. . . “Ang Akong mga karnero nakaila sa Akong tingog. Sa mga dumuloong dili sila mosunod.” Unsa man ang Iyang Tingog? Ania kini, ang Pulong. Kita n'yo? “Ang Akong mga karnero nakaila sa Akong Tingog.” Kita n'yo?

<sup>230</sup> Dili nila tugotan ang si bisan kinsa nga moingon, “Oh, karon, dinhi. Ginasulti ko man, ang Tingog sa Dios, usab. *Ingon niini* man ang ginasulti niini dinha.” Apan kini, kita n’yo, mao’y si Satanas. Pagahisgotan ra nato kana pagkataudtaud, ipatuhop ko una kana kaninyo. Kita n’yo?

<sup>231</sup> Karon, karon nakita ninyo nga ang binhi nga Pulong dili mahimong motubo sa ginsakpang dapit, nga iyaha, sa kahibalo. Husto ba? [Nagaingon ang kongregasyon, “Amen.”—Ed.] Kita n’yo? Sa dihadiha nga ang kahibalo naisagol sa pagtoo, mamatay kini dayon diha mismo.

<sup>232</sup> Miduol si Eva kaniadto ug miingon, “Miingon ang Ginoong Dios: ‘Sa adlaw nga kami mokaon niini, kana nga adlaw kami mamatay.’” Dayon mihunong siya aron tan-awon kung unsay igasulti niini.

<sup>233</sup> Miingon kini, “Apan, paminaw, mahal ko, pagkatahum gayud nimo. Kita mo? Siguradong gibuhat ka sa Dios alang sa usa ka katuyoan. Nasayod ka nga husto kana. Kita mo, usa ikaw ka babaye, gihimo ka alang niini nga katuyoan. Ingon niana kini. Wala mo pa nahibaloan kini karon, apan gihimo ka gayud alang niini nga katuyoan. Oh, usa ikaw ka matahum nga linalang, mahal. Uh-huh. Tan-awa kanang matahum ug gagmay mong mga kamot. Kita mo? Aba, sigurado nga gibuhat ka alang gayud sa usa ka katuyoan. Sigurado gayud.”

“Apan miingon Siya, kung kami—kung kami mokaon niana, ‘mamatay’ gayud kami.”

<sup>234</sup> Miingon kini, “Apan, oh, sa hunahuna mo ba nga ang usa ka buutan, mahigugmaon nga Amahang, Dios, mobuhat kaha og butang nga sama niana?” Unsa ma’y gibuhat sa babaye? Naminaw siya sa pangatarungan, gidawat ang kaalam niini. Giingnan, “Usa kana ka punoan, sa kalipayan. Mahimong tinguhaon sa tawo.” Ug dinha nahulog ang babaye. Eksakto gayud. Ug sa dihang nahulog siya, unsa ma’y nahitabo? Sama ra sa mahitabo sa bisan kinsa nga babaye. Sa dihadiha nga madani ka niini, tapos ka na dihadiha mismo. Husto kana.

<sup>235</sup> Karon, nakita n’yo, ang binhi nga atua kaniya, ug nga mamahimo na unta siyang usa ka inahan kaniadto, pinaagi sa kabubut-on sa Dios, pinaagi sa gilitok nga Pulong. Mamahimo na unta siyang inahan. Apan, wala siya nakahulat, dayon na lang siya misulod niadto.

<sup>236</sup> Karon, kita n’yo, dayon, sa dihang gibuhat sa babaye kadto nga butang, nga gidawat ang kaalam inay ang Pulong unta, ug ang kaalam sukwahi gayud sa Pulong. . . Kung nasabtan ninyo, pag-ingon og, “Amen.” [Nagaingon ang kongregasyon, “Amen.”—Ed.] Kita n’yo? Kung ang maong kaalam nagasubay sa Pulong, ug napamatud-an nga nagasubay gyud kini sa Pulong, ug ginapamunga sa Pulong ang Kaugalingon mismo Niini pinaagi sa mao mismong butang, kung ingon-ana ang

Pulong kini. Apan kung ang maong kaalam batok man sa Pulong, ug dili sumala sa Pulong, kondili nagapaninguha hinoon nga mangita og butang nga igadugang Niini o igataktak gikan Niini, nan iya kini sa yawa. [“Amen.”]

<sup>237</sup> Ug dili mahimong motubo ang mga binhi sa Espiritu Santo sa Biblia diha sa ginsakpang dapit sa kaalam. Ginapakita niana nga patay gyud diay ang matag seminaryo sa niining nasud. Makita nga puno gyud sila og mga bangag, masudlan sila, ug nga ang—ang paghukom magadagayday pasulod. Husto kana. Mahitabo kana, kita n’yo, tungod kay dili mahimong motubo ang Pulong uban sa kaalam, kalibutanong kaalam. Dili gayud.

<sup>238</sup> Kinahanglan nga toohan ni Eva ang Pulong sumala sa kung unsa Kini sa paghatag kaniya. Husto ba? [Nagaingon ang kongregasyon, “Amen.”—Ed.] Kinahanglan nga dili siya maminaw sa kang kinsa pa man nga magasulti og unsa man mahitungod Niini; sumala sa kung unsa lang gayud unta pagkahatag Niini kaniya, sa ingon niana unta niya gitooan Kini. Wala unta nagkaaduna og kamatayon, kung gitooan lang niya Kadto. Husto kana.

<sup>239</sup> Ug ang lalaki o babaye nga magadawat sa Pulong sa Dios sumala lang gyud unta sa kung unsa pagkahatag Niini kanato, kuptan Kini sa paagi lang nga pagkasulti sa Dios Niini, Kini mao’y Kinabuhi. Apan kung isagol kini sa kung unsang kaalam nga iya sa organisasyon, mamatay ka dihadiha mismo, sama sa nahitabo sa una kaniadto. Ingon Niana ang Binhi. Sa ingon niana, sa ingon nianang paagi nga naglihok Kini sa unang higayon kaniadto, sa ingon nianang paagi usab Kini magalihok sa matag higayon. Ingon niana na Kini sa una pa. Kon itugot sa Dios, pamatud-an nato kana pinaagi sa Biblia, niining buntaga. Sa ingon nianang paagi lang nga makatubo kini, mao ang ihimulag ang Kaugalingon niini gikan sa tanang mga pagpangatarungan, o sa unsang uban pa, ug toohan lamang ang Pulong.

Gidawat lang unta Kini ni Eva sa paagi nga gikahatag Kini sa Dios nganhi kanato.

<sup>240</sup> Ug gipahayag ko na ug gisulti kaninyo nga nagatoo gyud ako nga gitipigan sa Dios ug giampingan kini nga Biblia, ug sa ingon nianang paagi nga gihatag sa Dios Kini kanako dinhi. Dili ko gusto og uban pa nga kaalam. Gusto ko lamang kung unsa gayud ang pagkasulti sa Dios Niini Dinhi.

<sup>241</sup> Karon, nanghinaut ko nga dili ako makapasakit kaninyo. Apan kung ang Biblia miingon nga kinahanglan kong “maghinulsol,” maghinulsol gayud ang buot ipasabot Niini; dili nga magbuhat og penetinsya, kondili maghinulsol.

<sup>242</sup> Miingon ang Biblia nga magpabautismo ako, sa Ngalan ni “Jesus Cristo,” wala na Kini nagkahulogan og uban pa. Wala



nagkahulogan og “Amahan, Anak, Espiritu Santo.” Ingon na Niana ang gisulti Niini.

<sup>243</sup> “Bueno,” moingon kamo, “Miingon man ang Mateo 28:19, ‘Bautismohi sila sa Ngalan sa Amahan, Anak, Espiritu Santo.’” Eksaktong ingon niadto man ang pasabot niana.

<sup>244</sup> Karon, kung dili kadto husto, kung wala nila nakuha ang hustong pasabot niana, kung ingon-ana ang pagtoo nga nabatonan ni Pedro, aron magbautismo sa Ngalan ni Jesus Cristo, ug ang tanang uban pa sa Biblia, kung ingon-ana nagkaaduna diay sila og—og sayup nga kapadayagan nga gipanalanginan sa Dios. Mobalik kana Kaniya: tungod Iya diay unta gipanalanginan si Eva sa sinugdan kaniadto, kung ingon-ana man gani.

<sup>245</sup> Ang ngalan nga “Amahan, Anak, Espiritu Santo,” tulo kana ka titulo. Adunay usa lamang ka Ngalan. Dili mahimong nabautismohan ka sa Ngalan sa Amahan, Anak, Espiritu Santo kung wala ka mabautismohan sa Ngalan ni “Jesus Cristo,” tungod kay mao man kana ang Ngalan sa Amahan, Anak, Espiritu Santo. Ug ingon niana ang pagkasulat sa tibuok Biblia. Ang matag tawo sa Biblia, nga nabautismohan, nabautismohan gayud diha sa Ngalan ni “Jesus Cristo.” Walay si bisan kinsa sa Kasulatan, ang nagbautismo kanila sukad-sukad diha sa mga titulo nga “Amahan, Anak, Espiritu Santo.” Ug ang tanan nga gibautismohan sa Ngalan ni—ni “Ginoong Jesus Cristo” gibautismohan sa Ngalan sa Amahan, Anak, Espiritu Santo.

<sup>246</sup> Ang tanan nga nabautismohan, sa mga titulo nga “Amahan, Anak, Espiritu Santo,” wala gayud nabautismohan sa bisan usa ka ngalan man lang; usa lang kana ka titulo, sama sa ministro, reverend, doktor, unsa pa man; amahan, anak, ug tawo, asawa. Mga titulo!

Moingon, “Wala ma’y diperensya.”

<sup>247</sup> Kung ingon-ana man ang inyong titulo ang inyong ibutang sa inyong tseke, ug dili ang inyong ngalan, ug tan-awa kung asa ang paingnan niini. Uh-huh. Pananglitan, “Mopirma ako niini nga tseke sa ngalan sa akong asawa.” Bueno, ingon niana ka klaro kay sa dili-toohan ang Pulong sa Dios sa dihang anaa na mismo sa inyong atubangan ang maong kapadayagan. Klaro kaayo. Kita n’yo? Oo. Bueno.

<sup>248</sup> Kinahanglan nga toohan Kini sa paagi nga pagkasulti sa Dios Niini. Wala Kini nagasumpaki sa Kaugalingon Niini. Kung nagasumpaki man, umari kamo ug ipakita kanako. Uh-huh. Wala Kini nagasumpaki sa Kaugalingon Niini, wala gayud. Mahimong sumpakion Kini ni Satanas diha kaninyo, apan dili niya kini mahimo sa Pulong. Dili. Ug, dili gayud kana mapahanugotan sa Pulong. Dili, sir. Butang kana nga sa una pa, ug gidahum nila, apan wala pa gyud sukad napamatud-an.

249 Subayon nato kining duha ka kakuhaan, o sa kung unsay tawag ninyo kahimtangan, ug tan-awon kung unsay ginamugna niini. Subayon nato sila sa pipila ka minuto. Kahimtangan; magamugna kining duha ka kakuhaan og kahimtangan.

250 Gusto kong pangutan-on kamo og usa ka butang. Nakatambong na ba mo sa usa ka iglesia nga . . . Ako—akong ginasulti kini karon sa matinahuron nga paagi, ug may . . . aron maipahayag lang ang usa ka punto; dili unta itugot sa Dios. Nakatambong na ba mo sa usa ka iglesia kon diin pormal kaayo ang pastor? Ingon niana usab ang kongregasyon. Husto kana. Kita n'yo? Unsa man kana? Ang kahimtangan niini mao'y nagpahinungdan niana. Tambong mo sa usa ka simbahan kon diin ginasulti sa pastor, "Karon, kadali lang, wala ma'y ingon-anang butang sama nianang walay kapulos-pulos. Wala ako nagatoo sa ingon-anang butang sama sa Balaanong pagpang-ayo, bahin sa bautismo sa Espiritu Santo." Kabalo mo, makita n'yo na lang nga ingon niana usab ang matag usa, kanila, sa kongregasyon. Kung dili sila . . .

251 Kung aduna ma'y usa ka agila dinhang dapita, mogawas siya dinha, sa taliwala nianang pundok sa mga manok. Uh-huh. Sigurado gayud. Mao gyud kana ang kamatuoran. Biyaan niya kana. Oo. Oo. Biyaan gyud niya. Dili niya kana maagwanta. Usa siya ka agila. Usa siya ka langgam nga gihimo para sa kapanganoran, dili nga para sa nataran. Oo, sir. Karon, mao kana siya.

252 Ug karon atong nahibal-an, kanang, mga kahimtangan. Ug kung mosulod kamo sa bisan asa man nga . . . nga anaa ang ingon-anang mga butang, diin ginatudlo ang pagtoo sulod sa iglesia, mahikaplagan ninyo ang maong iglesia sa nianang kahimtangan.

253 Oh Dios! Tugoti—tugoti ako nga maipasabot kini diha kaninyo, aron nga, inyong, inyong makita kini. Kita n'yo? Nagaadto . . . Mao kana'y hinungdan nga nagaadto ang mga tawo diin didto sila sa taliwala sa mga balaan nagaampo, ang mga magtotoo. Miingon si Pablo nga wala siya'y nakaplagan sa siyudad og mga ingon niana kaniadto, si Timoteo lang, nga aduna og samang hamili nga Pagtoo nga nabatonan niya, kabalo na mo. Ang tanang uban pa kanila nga denominasyonhon na. Kita n'yo? Apan sa dihang misulod siya niadto nga kahimtangan, kita n'yo, siya, makita ninyo ang mga butang, nga gimugna sa maong kahimtangan. Makaplagan ninyo ang mga tawo nga nagakinabuhi pinaagi sa pagtoo sa dihang mosulod kamo sa maong dapit kon diin nagaingon, "Grabe, aba, tinuod gyud ang Biblia. Nagapang-ayo gayud ang Dios." Molibot kamo sa ilang kongregasyon, ug may makaplagan kamong, "Aba, naghimalatyon na ako kaniadto tungod sa kanser. Apan naayo ako." "Ako usa ka buta kaniadto. Makakita na."

254 Moingon ang usa ka estranyo didto, “Whew! Grabe na man! Unsa, buot mo bang ipasabot . . . ? Unsa na ma’y nahitabo kanimo?”

255 “Ipakita ko kanimo ang akong dokumento. Uban ka kanako sa balay. Dali, didto ’ta maniudto ug ipakita ko kanimo ang maong dokumento. Aduna ko’y dokumento didto. Nasayod gayud ang akong mga silingan nga anaa ako sa ingon-niini nga kahimtang kaniadto. Naparalisa ako, sulod sa pila ka mga tuig. Ug naiampo ako.” Kita n’yo? Unsa man kana? Kadto—kadtong Pulong nga anaa niadto nga iglesia, kadto nga grupo sa mga magtotoo, nagmugna og ingon niadto nga kahimtangan.

256 Karon, unsaon man sa Pulong, bisan sa kayano Niini pero ingon ka hingpit Kini, unsaon man Niini pagtubo diha sa dapit diin ginalandongan Kini og kahibalo ug ginaingnan, “Dili gayud mahitabo kini”? Kita n’yo? Dili gyud Kini mahimong motubo. Busa, sa dapit diin ginawali ang kahibalo gikan sa seminaryo, mangamatay ang mga anak.

257 Sa dapit na man diin ginawali ang pagtoo gikan sa Pulong, mangabuhi ang mga anak. Amen. Mao kana ang kalahian, Kinabuhi ug kamatayon.

258 Mao usab ang nahitabo kaniadto sa tanaman sa Eden. Eksaktong ingon-niana ang nahitabo kanila; aduna didto ang duha ka kahimtangan. Sa dihang mibiya si Eva gikan sa Husto, ug mipaingon sa sayup, namatay siya. Kita n’yo? Ingon niana gayud ang mahitabo, sa matag higayon.

259 Busa, dili sila makapabilin. Kung aduna og ingon-ana nga matang sa kahimtangan ang inyong iglesia, oh, anak, kung gusto mo pang mabuhi, toohi ang Pulong.

260 Karon, aniay medyo makapasakit karon. Ug wala ko kini ginatuyo sa mabagison nga paagi. Ako lang. . . Ingon niini man gyud ang pagpanudlo. Kinahanglan mo, pagmodangat ka na sa niini nga mga punto, kinahanglan mong makapasakit ug mangpaso, og diyutay, nakita n’yo.

261 Karon ingon niini. Sama sa pagpamatik og nating baka. Dili ko gyud gusto kaniadto ang pagbuhat niana, ang pagpamatik og nating baka; pagkaluoy man gud sa maong gamay’ng mananap. Tapokon namo sila didto. Ug wala ko kabalo kung nakahikot na kaha mo og nating baka sukad, o wala pa, ug—ug—ug hiktan sila. Hiktan ang ilang mga tiil, kita n’yo, ipangbaklid kadto. . . Ug ang makaluluoy’ng gamay’ng mananap! Ipahigda kini, dayon kuhaon kadtong init nga puthaw’ng igpapatik, ug ipatik kadto sa maong baka. Oh, igsoon, pagkaluoy gyud tan-awon. Pagmahuman ka na, magdagan-dagan gayud kini. Magdagan-dagan kini ug magsipa-sipa, ug motiyabaw ug mongaab, ug kung unsa na lang. Apan, sultihan ko kamo, mahibaloan na dayon nila, sugod niana, kung kinsa ang tag-iya niini. Husto kana.

Mahibaloan na nila kung unsa—kung kang kinsa nga pastohan ang nagpanag-iya niini. Mao nga dili kini tiawtiaw.

Busa, magpapatik kita. Magpapatik kita. Oo, sir.

<sup>262</sup> Pagmoingon sila, kabalo na mo, ang. . . Kamo, daghan na tingali kaninyo, ang nakabasa o—o nakakanta na sa *Cowboy's Meditation*, nakita n'yo. Ug ang saag nga nati, pagpasudlon na nila siya, sa kinatumyan didto, sa mga gipangtapok nga mga baka; ang saag nga nati, himoon na lang nila siyang sabaw, tungod kay wala man siya'y patik, sa iyang lawas. Ug ang tanang uban pa niadtong mga baka mangadto na sa kaugalingon nilang pastohan. Apan ang agalon sa maong gipangtapok nga mga baka nakaila gayud sa iyang mga baka, busa kung inyong. . . Sakit gyud ang pagpamatik.

<sup>263</sup> Karon tan-awa ninyo. Mahimo ni Satanas nga siyentipikanhong pamatud-an, pinaagi sa iyang kaalam. . . Karon magpaaron-aron una ako nga usa ka doktor dinhi, sa pipila lang ka minuto. Mahimo ni Satanas nga siyentipikanhong pamatud-an, pinaagi sa iyang kaalam, nga ang yuta kono nga igahatag niya, aron nga pagatuboan sa kaliwatan sa tawo, aduna kono og mga bitamina. Oo. Mahimo niya kanang pamatud-an sa siyentipikanhong pamaagi. Mahimo man nilang pamatud-an sa siyentipikanhong pamaagi ang bisan unsang butang, halos. Kita n'yo? Sigurado.

<sup>264</sup> Aduna kini og bitamina P, “paglipay-lipay, popularidad.” Nga anaa niini. Nga anaa sa iyang yutang kaalam. Oo. Sigurado. Ang tanang kalibutanong paglipay-lipay, tanang mga pagsalida sa sinehan, tanang mga pagsayaw-sayaw, tanang, mga butang, “Sige. Okey lang kana. Dili man kana makadaut. Oo.” Kita n'yo? Popularidad, “Oh, kamo ang pinakadakung iglesia nga aduna sa siyudad.” Bueno.

<sup>265</sup> Aduna usab kini og bitamina C, nga ginganlan niya og “centido komun.” “Sa paghimo og mga pagpangatarungan, nakita n'yo.” Oo.

<sup>266</sup> Aduna usab kini og bitamina R, nga nagakahulogan og mga “rason.” Oo, mahimo gyud niyang mang-rason. Apan, nakita n'yo, dili gyud kana magpulos.

<sup>267</sup> Aduna pa gyu'y bitamina byu-, B, niini, nga nagakahulogan og “byuti.” Maanyag si Satanas. Maanyag ang sala. Ug nagkagrabe ug nagkagrabe ang sala, nagakahimo kining mas maanyag pa.

<sup>268</sup> Ngani daw sa unsa ka mas nindot ang atong balay sa karon kay sa usa ka balay nga hinimo'g troso kaniadto? Daw sa unsa ka mas nindot pa kining sa karon? Daw sa unsa na ka mas maanyag ang atong mga kababayan-an sa karon kay sa kanila kaniadto? Kita n'yo? Daw sa unsa na ka mas nindot ang Florida, karon, kay sa pagkahimo niini sa Dios kaniadto? Kita n'yo?

269 Aduna kini og katahum. Pila man kaninyo ang nakahibalo nga adunay katahum si Satanas? Ug gitinguha niya ang katahum, ug naninguha siya nga magmugna og katahum, mas matahum nga gingharian, ug uban pa. Sigurado. Nasayod kita niana. Anaa si Satanas diha sa katahum.

Karon matikdi ninyo. Aduna siya'y bitamina R, nga mao ang "rason."

Bitamina B, nga mao ang "byuti."

270 Bitamina M, nga mao ang "moderno." "Oh, gusto mong mahimong moderno." Dawata lang ang iyang kahibalo ug tan-awa kung dili ka ba kaha niya mapatoo sa nianang butang. Motubo kini diha mismo sa sulod mo. Motungha kana nga bitamina dinha mismo sa nahimutangan mo.

271 Adunay tawo nga motindog dinha, ipaambit kaninyo ang iyang kahibalo, "Karon tan-awa ninyo, mga higala. Unsa na lang kaha ang mahitabo kung dalhon nato dinhi niining daku, maanindot natong katedral kining mga pagsinggit, ug mga paghilak, ug mga pagsulti og laing mga dila, ug mga pagdagan ngadto-nganhi sa entablado, mangbula pa ang mga baba nga sama sa buang nga mga iro? Ug—ug unsa na lang kaha sa hunahuna n'yo ang ikasulti sa mayor sa siyudad, sa hunta sa mga diyakono, kung tugotan nato ang ingon-anang butang nga makasulod dinhi?" Oh, sigurado gayud, tungod grabe na ka moderno.

272 "Sa hunahuna n'yo kaha nga ang atong mga miyembro manindog didto sa dalan, nga adunay ginabitbit nga tamburin? Ug unsa ma'y mamahimo niini kung ang mga igsoon natong babaye adunay mabaga, tag-as nga buhok nga nakabuhayhay? Ug ang uban sa mga kababayan-an nato dinhi sa simbahan pagmakita silang nagalakaw didto sa lungsod, 'Tan-awa sila. Tan-awa sila.' Aba, moingon gayud ang presidente sa niining simbahan, o unsa man kini, kabalo na mo, 'Aba, tan-awa, tan-awa ninyo sila. Mora sila og tigulang kon tan-awon, dili ba? Mora sila og adunay reserba nga ligid nga walay hangin dinha sa luyo nila.'" Kita n'yo? Kabalo na mo, mora'g ingon niana.

273 "Gusto namo nga mamahimong moderno." Kita n'yo? Kaalam kana nga iya sa yawa. Mao kana ang nagapatubo niini. Mao kana ang bitamina nga anaa sa maong yuta, nga nagpahimo og ingon-anang bunga nga ginapamunga niini. Padayon ka, modernong Jezabel. Bueno. Moderno na, sama sa mga kababayan-an sa karon. Sigurado. Oh, moderno na gyud. "Bueno, ang pinaka-modernong mga tawo sa lungsod mosimba sa among simbahan." Sigurado. Nahimo nang... Ngano man? Mitubo sila pinaagi niadtong moderno nga bitamina.

274 Pagpangtarungan nga bitamina, bueno, nagatubo sila pinaagi niana. Kita n'yo? Ingon-niana kana, pagpangatarungan. Apan sa dihadiha nga nagsugod ka na nga nagatubo pinaagi

niana, patay ka na sa Pulong. Kinahanglan mo una nga isalikway ang Pulong sa dili ka pa mamahimong ingon-niana. Kita n'yo?

275 Ang bugtong paagi nga mamahimo kang usa ka makasasala mao ang pagsalikway sa Pulong sa Dios. Unsa man ang sala? Dili-pagtoo. Dili-pagtoo sa unsa? Sa Pulong sa Dios. Kita n'yo? Kinahanglan mong isalikway ang Pulong, una.

Karon, oh, aduna pa ako og napulo ka mga bitamina nga naisulat dinhi.

276 Ug ania usa ka bitamina nga napakyas siyang pagsulti kanila. Aduna pa diay og bitamina D niadto. Mao kadto ang pinakadakung bitamina didto, nga moresulta og, “kamatayon [death].” Kita n'yo?

277 Kini mao ang pundok sa pinakaanyag mamisti nga mga tawo, pinaka moderno, pinakamaanindot ang iglesia, pinakadaku nga organisasyon, kita n'yo, ang pinaka moderno, pinakamaanindot, pinaka-makatarunganong butang nga mahimong isulti. “Nganong dili . . .”

278 “Kung gihimo kita sa Dios nga mga linalang Niya, nganong pagahukman man Niya kining mga kababayen-an nga ginahimo man lang ang kaugalingon nila nga maanyag tan-awon, magkaaduna og mubong buhok? Nganong pagakondenahon man Niya ang diyutay'ng pagpangmeyk-ap?”

279 Bueno, aduna na Siya og usa niana sa Biblia nga nagbuhat og ingon- niana, ug gipakaon Niya ang maong babaye ngadto sa mga iro. Busa hunahunaa gyud ninyo kana, nakita n'yo. Eksakto gayud kana.

280 “Nganong—nganong buhaton man kana sa Dios ang ingon-niadto? Aba, naunsa, galaum diay Siya nga magakinabuhi gyud kita sumala sa Biblia.” Oo galaum Siya. Giingnan Niya si Eva nga kinahanglang magkinabuhi siya . . . O, giingnan Niya . . .

281 Miingon si Jesus, nga, “Mabuhi ang tawo pinaagi sa matag Pulong, sa matag Pulong nga nagagula sa baba sa Dios.” Kinsa man ang nagsulti niana? Si Jesus. Husto ba? Ingon Siya, “Kung aduna ma'y ubang tawo nga magasulti og lahi, usa siya ka bakakon; ang Iyang Pulong lang mao ang tinuod.” “Ang mga langit ug yuta mangahanaw, apan ang Akong Pulong dili gayud mahanaw.” Mao kana.

Busa ang bitamina D anaa na kana sa iyang pormula, nga moderno. Husto kana.

282 Karon, apan, dili gayud mahimong motubo ang binhi nga Pulong diha sa ingon-niana nga yuta. Sa unsa pa man nga hinungdan diay nga moadto pa ang usa ka tawo sa usa sa nianang moderno nga mga iglesia karon? Kung mokunsad man ang Espiritu sa Dios dinha, ug ilang—gustohon man nilang mosinggit, “Himaya sa Dios! Alleluyah!”

283 Kabalo ba mo? Aba, mapatulon n'yo gayud sa magwawali ang iyang giwali tungod sa inyong pagsinggit. Aba, sultihan ko kamo. Akong—daw sa makita ko siya nga moigham og, “Uhm.”

284 Ug manglingi ang tanang mga atua didto, mang-unat ang ilang liog, kabalo na mo, motan-aw sa palibot, aron tan-awon ug moingon. “Hala, unsa kaha kadto?”

285 Dayon, pipila ka minuto, moingon kadtong magwawali, “Si Jesus Cristo, ang Anak sa Dios.”

“Himaya sa Dios! Husto kana.”

286 “Uhm,” mang-igham ang mga diyakono. Huh! Ikaw, paadtoon ka na dayon didto sa may pultahan, pagkataudtaud. Ginapagawas ka na. Kita n'yo?

287 Dili gyud mahimong motubo ang Pulong dinha, dili gyud puede. Dili, dili gyud mahimo. Kita n'yo? Dili gayud mahimo. Kita n'yo?

288 Ug pagkahuman ania na siya, mang-esprey na siya og iyang hilo ibabaw Niini, aron paninguhaong patyon ang binhi sa Kinabuhi nga anaa kaninyo. “Karon aduna baya og grupo sa mga tawo sa nasud karon, nga nagatoo nga nagapang-ayo kono ang Dios. Aba, siyempre, nasayod gyud kita, ug makita kung husto imong pangisip nga gihatagan kita sa Dios og mga doktor, aron mao'y moayo.”

289 Karon, pangutan-a ninyo ang usa ka maayo, but-an nga doktor kung usa ba gyud siya ka mag-aayo. Sultihan niya kamo, “Dili, sir. Mahimo ko ang pag-ibot og ngipon, apan dili ko mahimong ayohon ang giibtan niini.” Husto kana. “Mahimo kong ibalik ang usa ka bukton, apan dili ko mahimong ayohon kini.” Husto gayud. “Ang Dios mao ang Mag-aayo.” Kita n'yo?

290 Karon, unsaon man pagtubo sa unsa mang butang sa ingon nianang kahimtangan? Unsaon man pagtubo sa binhi nga Pulong sa ingon-anang kahimtangan? Dili gayud makatubo. Dili Kini makatubo sa ingon-ana nga matang nga kahimtangan. Siguradong dili gyud motubo.

291 Apan ang pagtoo nagatubo lamang pinaagi sa usa ka bitamina. Aduna kini og usa lang ka bitamina. Wala kini og unsa man nga gisagol, niini. Nagatubo ang pagtoo pinaagi sa usa ra ka bitamina, ug kana mao ang Pulong. Mao kana ang bugtong butang nga mahimong pagatuboan sa pagtoo, ang Pulong. Ug ang bugtong paagi nga mahimong motubo kini mao'y tungod nga ginatoohan niini ang Pulong, ug kinahanglan nga dawaton niini ang tibuok Pulong ug toohan Kini nga matuod. Ug malitok ang bitamina nga pagtoo sa usa ka hamubong upat-ka-letra nga pulong, L-i-f-e [K-i-n-a-b-u-h-i], “Life [Kinabuhi].” Aduna kini'y bitamina L, ang pagtoo. Adunay bitamina L ang pagtoo.

292 Ang kaalam usab adunay bitamina P; bitamina R; paglipaylipay; ug bitamina nga rason; bitamina, ug tanan niining uban

pang mga bitamina. Ang mga niini, pag-. . . pagpang-. . . Aduna nianang tanan ang kahibalo. Kita n'yo? Aduna nianang tanan ang kaalam, mga pagpangatarungan.

<sup>293</sup> Apan aduna lamang og usa ka butang ang pagtoo: Kinabuhi. Mao lang kana ang magapabilin. “Ang Imong Pulong maoy Kinabuhi. Ang Imong Pulong maoy Kamatuoran. Siya mao ang Pulong, ang Dalan, ang Kamatuoran, ang Kahayag.” Dinha lang nagapabilin ang pagtoo. Dinha lang. Ug wala na’y lain pa. Kinabuhi nga iya sa Balaang Espiritu, Kinabuhing Walay Katapusan, dinha nagatubo ang pagtoo: Pulong, Zoe, Mismong Kinabuhi sa Dios. Mao lang kana ang bugtong dapit nga mahimong makapamuhat ang pagtoo, diin pagmadungog sa pagtoo ang Pulong ug magatoo nga Kini mao ang Pulong sa Dios. Dayon, dinha nianang Zoe, motubo Kini ug magapamunga Kini sa kung unsay gisulti sa Pulong.

<sup>294</sup> Ang Dios, giunsa man Niya pagbuhat ang kalibutan? Nagatoo ba kamo nga ang kalibutan atua na kaniadto sa mga hunahuna sa Dios? Sigurado, atua na kini, kaniadto pa. Giunsa man Niya pagbuhat kini? Gisulti lang Niya.

<sup>295</sup> “Hain man diay Niya kuhaon ang mga materyales?” Unsaon mo man pagpangatarungan sa Dios, moingon, “Dios, hain Mo man gikuha ang materyales, sa—sa paghimo og mga bato? Hain Ka man nagkuha?” Gikan sa gas. “Hain Mo man gikuha ang gas, Ginoo?” Kita n'yo? “Giunsa Mo man paghimo ang tubig? Unsa ang pormula? H<sub>2</sub>O. Hain Mo man usab gikuha ang hydrogen, oxygen?” Kita n'yo? Mao kana. Kita n'yo? Dili masabtan.

<sup>296</sup> Unsa ma’y gisulti sa Dios? Atua na kadto sa Iyang mga hunahuna. Ug ang Iyang mga hunahuna mao ang Iyang Pulong, sa wala pa Kini napahayag. Dayon sa dihag miingon ang Iyang mga hunahuna, “Magkaaduna,” ug nagkaaduna gayud. Mao kadto. Dinha napahimutang ang pagtoo.

<sup>297</sup> “Pinaagi. . . sa. . .” Miingon ang Mga Hebreohanon 11, “Pinaagi sa pagtoo gibuhat ang kalibutan.” Gibuhat ang kalibutan pinaagi sa pagtoo. “Gibuhat sa Dios ang kalibutan gikan sa mga butang nga dili makita.” Pinaagi sa pagtoo gisulti sa Dios ang kalibutan ngadto sa pagkatungha, tungod kay usa kini—usa kini ka Pulong nga giplano na kaniadto. Apan sa dihadiha nga gisulti Niya kini, nahimo kining kinabuhi.

<sup>298</sup> Karon mahimo kang moingon, “Nagatoo man ko Niana, Igsoong Branham.” Mahimo man ninyong toohan Kini sa inyong kasingkasing. Kung ingon-ana ipahayag kini, “Nagatoo ako Niini.” Ayaw gayud ninyo usaba Kini, bisan pa man. Pagpabilin kamo mismo Niini. Tan-awa kung unsa ang motubo gikan niini. Igapamunga Niini ang Pulong, tungod kay pagtoo kini. Kita n'yo? Ginapahilayo kamo sa kaalam. Apan ginapaduol kamo sa pagtoo ngadto Niini. Makita ba ninyo kana?



<sup>299</sup> Pagaputlon niini ang matag kredo nga hinimo'g tawo, pagaputlon ang matag tulonghaan sa kahibalo, ang mga teolohiyang hinimo'g tawo, ug pangtumbahon kini nga dili na makabangon pa. Tan-awa sila, ilang mga propesor, D.D., Ph.D., L.L., Q.U.D., ug kinahanglan pa niining tanang mga kalalaken-an nga mag-eskwela ug magtuon og sikolohiya ug tanan niining uban pang mga butang. Ug adunay usa ka Butang nga nasipyatan niya. Ug kinahanglan matun-an niya kung unsaon niya ipresentar ang iyang kaugalingon inubanan og sikolohiya, ug kung unsa nga matang sa mga sinina ang sul-obon, ug kung unsaon niya sa pagsulti ang “amen” nga hapsay, ug, oh, binuang! Tugoti nga ang . . .

<sup>300</sup> Tugoti ninyo nga pangunahan kamo sa Balaang Espiritu. Ginapangunahan sa Espiritu sa Dios ang mga anak sa Dios, dili nga sa kaalam sa seminaryo. Kondili ginapangunahan gayud sa Espiritu sa Dios ang mga anak nga lalaki ug mga anak nga babaye sa Dios. Sigurado gayud. Tinuod kana. Amen.

<sup>301</sup> Karon, ibutyag nato ang tanang kredo, tanang tulonghaan sa kahibalo, tanang teolohiyang hinimo'g tawo. Dili ikatingala nga dili sila makatoo; wala man gud og unsa man dinha nga mahimong pagatuboan Niini. Kita n'yo? Aduna sila'y bitamina R, pagpang-rason, nga kinahanglan natong isalikway. Bitamina nga popularidad, bitamina nga paglingaw-lingaw, “Kinahanglan man pud nato nga maglingaw-lingaw og diyutay.” Unsang klase nga lingaw? “Oh, maglaroy-laroy ug maghubog-hubog og diyutay, usahay, kabalo na mo. Maglingaw-lingaw lang og diyutay; wala ma'y problema niana.”

<sup>302</sup> Kabalo ba mo, kanang gagmay'ng mga butang nga sama niana dinha, ingon-niana gyud silang tanan, tanang ingon-ana nga bitamina. Kita n'yo? Ug unsaon man sa ingon-ana nga matang sa bitamina makapatubo og usa ka Pulong, nga nagadumili niadto nga bitamina? Unsaon n'yo man sa paghimo niana? Kita n'yo? Ginasalikway kana sa Pulong. “Kung nahigugma kamo sa kalibutan o sa mga butang nga iya sa kalibutan, ang gugma sa Dios wala kaninyo,” ingon ang Biblia. Kita n'yo? Busa unsaon—unsaon man sa Dios. . . Unsaon man pagtubo sa Pulong sa Dios ilalum sa mga bitamina nga sama niana?

<sup>303</sup> Nagkinahanglan og pihong bitamina diha sa yuta aron nga makapamunga og trigo. Kinahanglan nga maanaa kini sa husto nga matang sa yuta. Hisgotan ra nato kana, pagkataudtaud. Kita n'yo? Kinahanglan mong magkaaduna og husto nga matang sa yuta, o dili niini mapatubo ang trigo. Kung mopili ka og uban nga yuta, dili niini mapatubo *kini*, ug magapatubo hinoon og ubang butang. Pagbalason ang yuta, lahi pud nga bitamina, ug uban pa, lahi usab ang ipatubo. Mao nga kung wala, aba, kung wala ka niini, dili mo gayud mapatubo kini. Kana lang.

304 Karon, ang mga bunglayon motubo kini halos sa bisan asa, sa bisan unsa nga matang sa yuta. Dili ba husto kana? [Nagaingon ang kongregasyon, “Amen.”—Ed.] Motubo lang sa bisan asa ang karaan nang denominasyonhong mga bunglayon.

305 Apan, sultihan ko ikaw, igsoon, kung gusto mong igapamunga ang mga bunga sa Kinabuhi, kinahanglan mogitib kana gikan dinha sa Pulong. Husto kana. Husto kana. Sigurado. Bueno.

306 Nanghinaut ko nga wala ko kamo napadugay kaayo, karong buntaga. [Nagaingon ang kongregasyon, “Wala.”—Ed.] Kita n’yo? Karon, wala . . . Kita n’yo? Sige.

307 Dili ikatingala nga dili sila makatoo; wala man gud sila og bisan unsa aron mabuhi. Naghisgot si Jesus mahitungod kanila diha sa Mateo sa ika-13 nga kapitulo ug sa ika-1 nga bersekulo. Ablihon nato dinhi ug tan-awon kung giunsa pagsulti ni Jesus ang mahitungod niini, kining mga butang nga ginahisgotan nato. Sa Mateo sa ika-13 nga kapitulo, ug sa ika-1 nga bersekulo.

*Niadtong adlaw mihawa si Jesus sa balay, ug milingkod sa daplin sa dagat.*

*Ug mingdugok kaniya . . . ang daghang katawohan, tungod niini misakay siya sa usa ka sakayan, ug milingkod; ug ang tanang katawohan nanindog sa baybayon.*

*Ug siya nagsulti kanila og daghang mga butang, ug nagsulti kanila og daghang mga butang pinaagi sa samingay, sa pag-ingon, Ania karon, usa ka magpupugas miadto aron sa pagpugas og binhi;*

*Ug sa nagpugas siya, may mga binhi nga diha nahulog sa daplin sa dalan, ug midugok ang mga langgam ug ilang gituka kini:*

*Ang uban nahulog sa kabatoan, diin walay daghang yuta: ug gilayon miturok, tungod kay wala silay kalawom sa yuta:*

*Apan sa pagsubang sa adlaw, nangalawos sila; ug nahitabo nga . . . ug tungod kay walay gamut, nangalaya.*

*. . . ang uban nahulog sa kasapinitan; ug mitubo ang mga sapinit, ug nagtabon ug naglumos kanila:*

*. . . ang uban nahulog sa maayong yuta, ug nagpamunga ang uban, nagpamunga, ang uban usa ka gatus, . . . kan-uman- . . . ug katloan.*

*Ang adunay mga igdulungog, magpatalinghug.*

308 Dili nga kaalam. “Mga igdulungog,” kita n’yo, bueno, “pagpatalinghug.” Bueno.

309 Matikdi ninyo. Miingon Siya nga sa dihang gipugas kadto, sa dihang gipugas ang Binhi, giwala ang Pulong.

310 Nahulog ang uban sa daplin sa dalan; sama ra sa tubig sa likod sa pato, nga direktso rang midagayday.

311 Nahulog ang uban sa batohon nga yuta, kabatoan, aduna ra og diyutay'ng abog nga nahuyop didto. Ug miturok kadto, apan wala ninggamut, kay wala ma'y mapahimutangan sa mga gamut. Karon mohatag ako og mga paghulagway dinhi, ug nanghinaut ko nga dili ako makapasakit sa inyong pagbati. Kita n'yo?

312 Mao man kadto ang iglesiang Katoliko. Ingon nila nga natukod kono sila ibabaw sa usa ka bato. Mouyon ako kanila. Mouyon gyud ako kanila. Husto kana. Husto kana. Wala ma'y yuta sa ilalum niini, wala gayud, walay yuta nga pagatuboaan niini. Ngano man? Dili man kini makapamunga og. . . Dili sila makapamunga og bitamina nga iya sa Biblia, tungod kay wala man gani sila nagatoo Niini. Mga dogma ang doktrina nila, husto kana, Romanhong dogma, walay Pulong niini, man lang. Kita n'yo? Nahulog sa kabatoan; sa hilabihan nga kaalam. Oh, igsoon, sultihan ko kamo, aduna sila niini sa super nga pamaagi. Ipresentar nila nga aduna sila'y pamaagi sa sikolohiya, ug dagku kaayo nga mga bilding, ug maanindot nga mga bisti, nga daw mora na og mga balaan nga dios-dios, ang mga pari ug tanang uban pa.

313 Pila man ang nakadungog sa testimonyo niadtong gamay'ng madre nga mihawa na didto? Nadungog n'yo ba kadto dinhi? Gusto ko nga ipadungog kadto usa ka Miyerkules sa gabii dinhi sa iglesia, ug aron ang matag usa dinhi makadungog niadtong maong testimonyo. Adunay usa kanila ang nagsige sunod kung asa ko sa dugay nang panahon. Grabe ang ilang. . .

314 Miadto ko didto sa Mexico, ako mismo, ug nakita ko kadtong mga lungag nga gipangtabonan og apog, mga lungag kon diin didto nila gipangtambog ang mga anak niadtong mga madre; pagmapaangkan sila sa mga pari, ug nagkaaduna og mga bata; nga gipangsunog ra didto niadtong mga lungag, ug butang nga sama niana. Mao kadto ang nagpahinungdan nga miusbong ang komunismo sa Mexico. Nangabutyag kadto nga kadautan. Mao kadto ang nagpahinungdan nga miusbong ang komunismo didto.

315 Ayaw gayud kahadlok sa komunismo. Ginagamit sa Dios ang komunismo. Wala man ako nagatoo niini. Iya man kini sa yawa. Apan ginagamit sa Dios ang yawa ug ginapabuhat kini, sama sa gibuhat Niya kaniadto kang Haring Nabucodonosor, ug gipasulong siya didto ug giilog ang Israel. Kita n'yo? Oo. Susiha ninyo ug tan-awa kung wala ba kana ginapamatud-an sa Biblia. Usa sa niining mga adlaw pagahisgotan nato kana. Gipatungha kini mismo sa Dios, aron ipanimalus ang mga anak sa Dios, sa nianang tigulang nga bigaon. Eksaktong ingon niana

ang giingon sa Biblia. Oo. Giingon, “Pagasunogon siya sa kalayo, ug modangat siya sa katapusan sa iyang kaalautan.” Eksaktong ingon niana gayud ang mahitabo kaniya, usab. Mamaingon niana siya.

<sup>316</sup> Mao kadto ang nahulog sa kabatoan, diyutay ra kaayo ang yuta mao nga dili kini makatubo. Namatay kini. Ug, hilabihan nga kaalam kadto.

<sup>317</sup> Dayon nahulog ang uban sa yuta sa Protestante, apan, wala magdugay, gituok kini sa hilabihang kaalam sa dagkung mga denominasyon, gituok ang Espiritu. “Milabay na ang mga adlaw sa milagro. *Ingon-ani-ug-ingon-ana* ang gisulti ni Dr. *Ingon-ani-ug-ingon-ana*. Kita n’yo? Wala ma’y ingon-niana.” Bug-os gayud, nga gituok. Bug-os nga gituok ang unsa? Gituok ang Espiritu, tungod sa kaalam. Kita n’yo?

<sup>318</sup> Mikunsad ang Balaang Espiritu niadtong mga adlaw ni Martin Luther. Mikunsad ang Balaang Espiritu niadtong mga adlaw ni John Wesley. Mikunsad usab ang Balaang Espiritu niadtong mga adlaw sa nahaunang iglesiang Pentecostal. Apan unsa ma’y gibuhay sa mga denominasyon? Pinaagi sa ilang kaalam, gituok nila Kini. Gituok ang unsa? Ang Binhi. Unsa man ang Binhi? Ang Pulong. “Dili man Ingon-niana ang buot ipasabot Niini. *Ingon-niini* man ang buot ipasabot Niini, dinha.” Kita n’yo? Gihimo nila kining. . .

<sup>319</sup> Karon, daghan man nianang mga ministro ang matinuuron ang kasingkasing, nahimamat ko sila, milingkod ug nagpakig-istorya ako kanila, bisan sa hilisgotanan bahin sa bautismo ug daghan pang mga butang. Giingnan ko sila nga moanhi, aron pagahisgotan kini. Ingon nila, “Igsoong Branham, kung buhaton namo kana, palagpoton man pud kami sa iglesia namo.”

<sup>320</sup> Ingon ko, “Kinsa ba? Kinsa ba ang mas ginapalabi ninyo, ang Pulong sa Dios o ang iglesia ninyo?” Wala gayud kamo’y mapaingnan, dinha nianang abog sa denominasyon. Kita n’yo? Kita n’yo? Bueno. Kung ginapanghimakak niana ang Pulong, nan sayup kana. Kita n’yo? Nagapakita lang kana nga kaalam kana nga hinimo’g tawo.

<sup>321</sup> Karon, gituok ang mga Protestante. Gituok ang Espiritu pagawas mismo kanila, sa dihang misugod sila sa pagdawat og kaalam imbis nga pagtoo sa Pulong; ang kaalam diha sa organisasyon, pang-organisasyon nga kaalam imbis nga pagtoo sa Pulong. Ang tanan nga nakasabot niana, moingon, “Amen.” [Nagaingon ang kongregasyon, “Amen.”—Ed.] Kita n’yo? Pagtoo sa kung unsa—kung unsa’y gikahiusahan sa grupo sa mga kalalaken-an, sa Methodist, Baptist, Presbyterian, Pentecostal, mga Evangelical, ug silang tanan. Ug sa dili madugay magatukod sila og usa ka konpederasyon sa mga iglesia, nga mamahimong “ang larawan sa mapintas nga mananap.” Ug magkaaduna kini og sama ra nga gahum sa niini

nga nasud, Pinadayag 13:11, nga aduna sila kaniadto didto; ug magpahinungdan kini og usa ka pagpanglutos sa mga balaan, sama sa gibuhat nila kaniadto, sa—sa iglesiang Romano. Kita n'yo? Dinha na mismo kini karon nagapadulong.

<sup>322</sup> Ug mao kana kon nganong ginapugas na mismo ang Pulong karon, sa tanang dapit, “Pahilayo kamo niana. Panggawas kamo gikan niana.” Kita n'yo?

<sup>323</sup> Karon, gituok kini sa kaalam. Gituok sa kaugalingon nilang kaalam ang Balaang Espiritu palayo kanila. Pamatud-an ko kini kaninyo, diha sa Biblia, Pinadayag, sa ika-3 nga kapitulo; diin bag-ohay lang nato gihisgotan ang mga kapanahonan sa iglesia. Gituok si Jesus pagawas sa Iyang Iglesia, ug anaa na Siya sa gawas; naningkamot sa pagpanuktok sa pultahan, aron makasulod og balik. [Nagatuktok si Igsoong Branham sa pulpito—Ed.] Uh-huh. Eksaktong ingon niana gayud ang gisulti Niini. “Nagatindog Ako sa pultahan ug nagapanuktok. Kung may pagauhawon, kung pasudlon Ako niya, Ako mosulod.” Apan wala gyu'y si bisan kinsa ang miabli sa pultahan. Kita n'yo? Gipagawas gani nila Siya. Unsa man kadto? Aduna sila og. . . Nahulog ang Binhi ngadto kanila kaniadto. Kita n'yo? Kita n'yo?

<sup>324</sup> Apan nahulog ang uban sa walog sa pagpanglutos. Nahiadto ang ubang binhi sa walog sa pagpanglutos. Karon, dinha sa walog makaplagan ninyo ang tubig, ang pinakamaayo nga yuta. Pagmokuha ka og usa ka tawo nga gibunalan og ayo hangtud nga natangtang na kaniya ang tanan niyang teolohiya, gibugalbugalan, gibiyabiayan, giagi pa sa galingan ug gigaling og ayo hangtud nangatangtang kini tanan kaniya, hangtud nga ang puthaw wala na'y mahimong galingon kaniya, makita ninyo didto nga adunay tubig sa palibot niini. Husto kana. Ngadto sa walog, gitambog kadto nga tawo, gisipa pagawas sa iyang organisasyon. Siya'y “gilabay sa basurahan,” sama sa tawag nila niana. Kita n'yo? Dili nga sa basurahan, kondili sa “walog,” sama sa gikatudlo kanato. Didto sa walog, kabalo na mo, didto nagatubo ang Lirio, usab, kabalo na mo. Uh-huh. Uh-huh. Husto kana, kita n'yo, “Sa walog.” Bueno. Nangahulog ang uban ngadto sa walog sa mga pagpanglutos, sa malisud nga pagsulay. Nangahulog ang uban niadto nga mga Binhi didto, sa walog sa mga pagpanglutos, sa malisud nga mga pagsulay, gibansagan og bisan unsa na lang sama sa Lirio nga gitawag nga, “Beelzebub,” gibiyabiayan.

<sup>325</sup> Apan sa niini nga walog anaa ang mga kasapaan sa tubig. Mga Salmo 1, miingon, “Bulahan ang tawo.” Basahon ko kini. Ipakita ko kaninyo kung unsa ang anaa niini nga walog. Kung unsa, ang giingon sa Mga Salmo. . . Nahunahuna ko nga tingali wala na kita'y oras, apan mogahin lang kita og diyutay'ng panahon, kita n'yo, aron basahon kini, kita n'yo, aron hisgotan kini dinhi. Basahon nato kini ug tan-awon kung unsa kini nga tawo dinhi, kon diin siya natanum. Kung natanum ba siya sa. . .

sa ibabaw sa abogon nga kabatoan sa disyerto, diin wala gyu'y yuta, o natanum ba kaha siya diha sa walog? Bueno.

*Bulahan ang tawo nga wala magalakaw sa tambag, sa kaalam . . .*

Amen. Amen. Amen. Amen.

*. . .wala magalakaw sa tambag sa mga dautan, . . . ni magatindog sa dalan sa mga makasasala, . . . ni magalingkod sa mga lingkoranan sa mga mayubiton.*

*Kondili anaa sa kasugoan sa GINOO ang iyang kalipay, sa Pulong; ug sa kasugoan, sa Pulong, nagapalandong siya sa adlaw ug sa gabii.*

*Ug siya mahisama sa kahoy nga natanum sa daplin sa kasapaan sa tubig, . . .*

326 “Kasapaan.” Unsa man kana? Ang siyam ka mga espirituhanon nga gasa. Mga kasapaan sa usa ra ka “Tubig,” usa ra ka Espiritu. Usa ka Tubig, apan nagagikan sa siyam ka nagkalainlaing kapanguhaan, mga kasapaan sa Tubig. Kita n’yo?

*. . .kasapaan sa tubig, nga nagadala sa iyang bunga, bunga sa Espiritu, sa iyang panahon; ang iyang mga dahon usab dili malaya; ug bisan unsa nga ginabuhat niya, kini magamauswagon.*

327 Kita n’yo, nahulog ang uban sa nianang walog, kon diin didto kining mga kasapaan. Ug namunga og . . . Namatikdan ba ninyo? Aduna ko’y gustong ipadangat pa. Unsa ma’y nahitabo niadto? Nahulog kadto, sa sapa . . .

328 Wala kadto nga gibutang lang. Mahisama siya sa kahoy nga “gibutang lang, gibalhin gikan *niini* ngadto sa *ingon-niana*”? Siya’y “gitanum.” Unsa? Gitagana nang daan. Kadtong hunahuna sa Dios, sa wala pa ang pagkatukod sa kalibutan, ang nagpahimutang kaniya didto. Kita n’yo? Dili nga napalid lang didto, dili nga nasalagmaan lang; kondili “gitanum gyud,” gitagana nang daan (sa unsa?) ngadto sa mga kasapaan sa Tubig. Oh!

329 “Ang iyang gamut dili malaya.” Oh, alleluyah! “Bisan siya mamatay, pagabanhawon Ko siya sa kaulahiang adlaw.” Husto kana.

330 Gitagana na siyang daan nga mahiadto Didto, dili ingon nga nasalagmaan lang. Gitagana na siyang daan nga madawat gayud ang maong Pulong sa dihang gipugas Kini. Ug maatua gyud siya. Pagkapugas niini, atua na siya didto. Gitanum siya, dili ingon nga gitugsok lang. Gitanum gayud siya. Husto kana. Daku ang kalahian: sa nagtugsok ka lang og tukog sa yuta, kaysa gitanum mo gyud. Lahi gayud. Sa gitanum ang Binhi; nakakaplag Kini og kaugalingon Niyang mga gawang diin mokatay ang gamut Niini.

Sa dihang misugod na nga midagayday ang Tubig ug gipagitib ang Kinabuhi niini, ang Espiritu, sugod na kini moingon. . .

Pagmoingon mo, “Adunay siyam ka espirituhanon nga mga gasa.”

Moingon siya, “Amen.”

“Si Jesus, mao ra sa gihapon kagahapon ug hangtud sa kahangturan.”

“Amen.”

“Nagapang-ayo Siya sa gihapon sama sa ginabuhat Niya kaniadto pa.”

“Amen. Amen. Amen.” Kita n’yo?

<sup>331</sup> Gitanum man gud siya sa daplin sa mga sapa, mga kasapaan nga nagadagayday sa matag tampi, mga kasapaan sa Tubig. Dili ikatingala nga dili siya mahimong malaya. Dili ikatingala, tungod kay gitanum gayud siya. Nahulog didto ang uban sa mga Binhi. Dili siya mahimong mamatay. Atua man gud kini mismo sa sapa sa Kinabuhi. Padayon kini nga nagapamunga. Husto kana. Ginakuha niya ang iyang Kinabuhi gikan niadto nga mga kasapaan, “mga kasapaan,” ang Bag-ong Tugon, ang Daang Tugon. Amen. Basta sige lang siya, ginapakaon! Oh, igsoon!

Higugmaon ba ninyo Siya? Amen.

Dayegon ba ninyo Siya? Amen.

Simbahon ba ninyo Siya? Amen.

Amen. Amen.

<sup>332</sup> Oo, sir. Oo, sir. Oh, gusto ko kaayo kana! Dili ba kamo usab? [Nagaingon ang kongregasyon, “Amen.”—Ed.] Oo.

. . . nagadala sa iyang, nagadala sa *iyang* mga bunga sa *iyang panahon*; . . . (Genesis 1:11)

<sup>333</sup> “Nagadala sa iyang mga bunga.” Unsa nga mga bunga? Mga bunga sa unsa? Iyang mga bunga. Unsa man nga mga bunga? Kaugalingon Niyang mga bunga. Unsa man kini nga bunga? Ang Biblia. Kita n’yo? Ang tanan Niini ania dinhi. Ang bunga, ang gugma, ania sa Biblia. Kalipay, ania sa Biblia. Gahum, Espiritu Santo, ang tanan niining mga butang, Balaanong pagpang-ayo, mga saad sa Dios, mao kini ang mga bunga. *Ania* Kini. Ug kung gitanum siya Dinhi, natanum kini sa—sa husto nga matang sa yuta, sa pagtoo. Unsa ma’y ginahimo sa pagtoo? Ginasugdan sa pagtoo nga patuboon Kini, amen, ginasugdan kining padakuon. Kita n’yo? Mao kana; ginapatubo kini. Sigurado. “Mahisama siya sa kahoy nga natanum sa daplin sa kasapaan; nagadala sa iyang bunga sa iyang panahon.”

<sup>334</sup> Karon, unsa man nga matang sa bunga ang igapamunga niini? Juan 14:11, Juan 14:11, miingon Siya, miingon si Jesus, “Siya. . .” Nagatoo ko nga sa 14:12 kini. Ug miingon si Jesus, “Siya nga nagatoo Kanako, ang mga buhat nga Akong ginabuhat

pagabuhaton usab niya.” Ngano man? Anaa man kaniya ang mao ra nga Pulong. Siya mao ang Pulong. Husto ba kana? [Nagaingon ang kongregasyon, “Amen.”—Ed.] “Ug kung kamo magapabilin Kanako, ug ang Akong mga Pulong anaa kaninyo, managpangayo kamo sa bisan unsa nga buot ninyo.”

<sup>335</sup> Nagapakig-istorya ako kaniadto kang Igsoong Evans, dinha sa likod, dili pa lang dugay. Nagaanhi siya dinhi. Ngani halayo pa kaayo ang ginabiyaha niya! Nawala ang iyang sakyanan. Gi-parking lang niya kadto dapit sa may Miller’s, nabilin niya sa sulod ang yawi niadto, ug adunay miabot ug gikawat ang maong sakyanan. Atua pa gyud ang tanan niyang gamit, sa sulod. Mianhi siya. Siya, siya ug si Igsoong Fred, ug si Igsoong Tom, ang pipila kanila, miadto sila sa balay. Ug miingon . . . Bueno, mora siya og usa ka gamay’ng bata niadto nga giilogan og kendi; siya, naguol gyud siya, kabalo na mo. Ingon siya, “Dili ko kabalo kung unsay akong buhaton.” Ingon ko, “Bueno, . . .”

<sup>336</sup> Karon unsa na man? Karon, miadto sila, unsa man ang unang pagabuhaton? Moduol sa Pulong; mangayo sa Amahan. “Kung kamo magapabilin Kanako, ug ang Akong Pulong nagapabilin kaninyo, managpangayo kamo sa bisan unsa nga buot ninyo.” Unsa? Magpabilin kamo sa Pulong, magpabilin lang kamo mismo sa Pulong.

<sup>337</sup> Ingon ko, “Mag-ampo kita.” Miluhod kami sa salog, ug misugod sa, pag-ampo.

<sup>338</sup> Ug samtang kami nagaluhod didto, nagaampo, ingon ko, “Amahan, nagaduol ako Kanimo, sa Ngalan ni Ginoong Jesus. Ania ang usa ka igsoon nga naningkamot gayud, sa pagtrabaho sulod sa pila ka adlaw kada semana. Ang iyang mga kamot, hago na kaayo, sa pagpang-ayo og daan na og guba nga mga sakyanan ug mga butang nga sama niana, aron lang maka-kuwarta para makabiyaha og katorse hangtud kinse ka gatus ka milya sa matag Dominggo, aron nga makatambong gyud sa mga panagtigum. Aduna pa siya’y mga anak nga ginapakaon. Mogasto siya og halos, mga singkwenta o setentay-singko ka dolyares kada semana, aron lang makabiyaha paingon dinhi, aron lang makasimba. Kita n’yo? Husto. Nagaanhi siya, aron makapatalinghug sa Pulong, sa diha nga nagapaninguha kami sa pagpakigbisog alang Niini.” Ug ingon ko, “Karon, adunay dautang tawo nga nagkawat sa iyang sakyanan.” Unsa na lang Kini? Ingon ko, “Karon, Ginoo, nagaampo ako Kanimo, nga ibalik ra kaniya ang iyang sakyanan, sa Ngalan ni Jesus Cristo.”

<sup>339</sup> Unsa ma’y gibuhat ko? Gipahimutang ko ang Pulong, ang maong saad, sa atubangan sa Dios, giselyohan Kini sa Ngalan ni Jesus, ug gipadala ang Pulong. Didto mismo sa dalan miadto Kini, didtong dapita, nahikaplagan ang lugar kon diin kadto nahitabo; sama sa usa ka iro nga ginagukod ang rabbit. Kita n’yo? Atua Siya, sa dalan mismo, nga nagadaguhong.



Miabot didto, mga tunga-tunga na padulong sa Bowling Green, Kentucky. Unsay nahitabo? Ang Pulong nga nakaplagan ang maong lalaki.

<sup>340</sup> Niadtong tungora adunay panan-awon nga miabot. Nakita ko ang usa ka lalaki, nga nagasul-ob og mora'g dalag nga sinina, nagadrayb, usa ka batan-ong lalaki, nga usa ka Cristohanon kaniadto. Miigo kaniya ang Pulong. "Sayup ang imong ginabuhat." Nasapon siya sa Pulong. Gipadala Niya ang Iyang Pulong didto, kita n'yo, kita n'yo, ug nasapon siya. "Masakpan ka ra gyud sa niining gibuhat mo, sa umaabot nga adlaw, ug pagadakpon ka sa balaod tungod sa pagbuhat mo niini. Pagliko ug ibalik kini." Nasapon siya sa Pulong. Usa siya ka Cristohanon kaniadto. Nakita ko siya nga gidala kadto didto, ug gi-parking kadto daplin sa kalsada.

<sup>341</sup> Ingon ko, "Karon, igsoon, adtoan mo, kining lugara *dinhi* dapit, ug makaplagan mo ang imong sakyanan. Hulat lang dinhi, sa makadiyut, hangtud nga ibalik na kadto sa maong lalaki. Karon, puno ba og gasolina ang imong tangke?"

"Oo," ingon niya.

<sup>342</sup> Ingon ko, "Dili mo na kinahanglan nga problemahon pa. Apan adunay katunga pa ang nahibilin niadtong gasolina, kay nagamit na man ang katunga, sa pagpadagan niya. Halos tunga ra man ang nabiyahe niya paingon sa Bowling Green, mga—mga usa ra ka gatus ka milya ang nadagan niadto."

<sup>343</sup> Sa dihang nakaplagan niya kadto, ingon niadto mismo ang pagkahimutang sa sakyanan, eksakto gyud sa kung unsa ang pagkasulti. Unsa man kadto? Miadto ang Pulong ug nasapon ang maong lalaki.

<sup>344</sup> Mibalik na usab siya ug misulti, wala magdugay human niadto, nga aduna kono og usa ka lalaki nga mipalit og sakyanan kaniya. Miikyas ra ang maong lalaki ug wala kadto gibayaran. Kita n'yo? Miingon, "Igsoong Branham. . ."

<sup>345</sup> Sa hunahuna ko, "Pagkaluoy man nga tawo!" Upat ka gatus ka dolyares man unta ang angay'ng ibayad kaniya. Ingon ko, "Mag-ampo ako." Gipadala ko na usab ang Pulong. Miadto ang Pulong, gipangita ang maong lalaki, ug nakaplagan kini.

<sup>346</sup> Sa dihang, nangadto na kami aron pangitaon ang lalaki. Ang maong lalaki, dili gayud usa ka Cristohanon, kita n'yo, siya—siya. . . Nagkatawa siya. Naimbita na nila siya, nga mosimba, usa ka higayon kaniadto. Ingon niya, "Bueno, samtang nagawali ang magwawali, nagapangita ko og mga maanyag nga bulagaw ang buhok." Busa, nakita n'yo, dili kamo makakaplag og. . . Oo. Kana'y—kana'y—ang yawa, kana, kita n'yo. Mao nga dili makahawid ang Pulong kaniya.

<sup>347</sup> Apan unsa ma'y gibuhat sa Pulong? Gibantayan Niini ang maong lalaki. Kita n'yo? Ayaw lang kamo. . . Padayon lang nga

misalig si Igsoong Welch, miingon, “Mamahimo ra kining okey. Mamahimo ra kining okey.” Gibantayan siya sa Pulong. Kita n’yo? “Kung kamo magapabilin Kanako, ug ang Akong Pulong anaa kaninyo, managpangayo kamo sa bisan unsa nga buot ninyo.” Kita n’yo? Gitagad siya sa Pulong.

<sup>348</sup> Mahibaloan mo na lang, nagadrayb niadto ang usa sa iyang mga trabahanteng lalaki, dinhi sa dalan, ug tua didto. Nakita niya ang maong lalaki nga atua sa sakyanan, gikuha ang numero sa plaka, ug gihatag, gihatag, ngadto kang Igsoong Wood. Gitawag nila kadto, ug nakaplagaan nila kung hain na kadto. Atua sa Bowling Green ang maong lalaki.

<sup>349</sup> Nasayod ang Dios sa Langit, nga wala gayud ko’y nadunggan nga bisan unsa mahitungod niadto, wala gyud ko’y nasayran mahitungod niadto.

<sup>350</sup> Niadtong miaging Domingo, sa miaging semana, pagkahapon, human sa pagwali dinhi, misaka ako ug nag-ilis og sinina, ug nangandam aron sa pag-adto sa Florida, alang sa . . . o didto . . . kang Igsoong Welch, alang sa panagtigum pagkasunod nga gabii niadto. Pagsulod ko sa sakyanan, nakita ko kadtong maong lalaki. Ingon ko, “Igsoong Welch . . .” Dili ko siya mahimong sultihan niadto, dayon. Kinahanglan niyang molihok, siya mismo, sama kang Meda kaniadto nga siya mismo ang kinahanglan magdesisyon. Kita n’yo? Ingon ko, “Moagi kita sa Bowling Green.”

Ingon siya, “Mga traynta man ka milya nga wala sa atong direksyon.”

<sup>351</sup> Mibiyahe na kami. Naghunahuna ko, “Oh, iyang—iyang, iyang—masabtan ra niya kini. Kita n’yo? Masabtan ra niya kini. Kita n’yo? Kinahanglan niyang masabtan kini.”

<sup>352</sup> Mibiyahe kami. Si Igsoong babayeng Evans ug ako . . . Ug pagkataudtaud, miingon siya, “Kabalo ka, Igsoong Branham,” ingon niya, “pagkagahi ko ba og ulo?” Miingon, “Nag-ingon man ka og Bowling Green, kaganina.”

“Oo.”

<sup>353</sup> Ingon siya, “Kahibalo ba ka niadtong lalaki nga mikuha sa akong kuwarta, ug gidagan kadto?”

“Oo.”

<sup>354</sup> Miingon, “Atua siya sa Bowling Green. Kaganina ko pa man gud gihunahuna kini. Mao diay . . . Aduna ko’y kinahanglang buhaton dinhi. Moliko sá ko, pangitaon ko kung asa na ang maong lalaki. Moliko na ko . . .” Ingon ko . . .

<sup>355</sup> Miingon, “Unsa ma’y buhaton mo? Moadto ba ka didto, kuhaon ang imong kuwarta?”

<sup>356</sup> Karon, kita n’yo, kung giingnan ko siya, nan . . . Kita n’yo, aduna siya’y butang nga pagabuhaton, siya mismo. Kita n’yo?

Kinahanglan nga aduna gyud siya'y buhaton. Dili ko mahimong isulti kaniya. Kung gisultihan ko siya, mamahimong dili na mao ang panan-awon dihadiha mismo. Kita n'yo? Busa gipasagdan kong. . . Kita n'yo? Sama ra niadtong. . .

<sup>357</sup> Nganong mitindog man kaniadto si Jesus, nag-ingon kang Maria ug Marta, “Tangtanga ninyo ang bato”? Aba, Dios man Siya. Mahimo ra man Niyang moingon, “Bato, mawagtang ka,” ug mawagtang kadto. Apan aduna gyu'y butang nga pagabuhaton ang maong babaye.

<sup>358</sup> Nganong mitindog ra man Siya didto, nga nagatan-aw sa anihon? Nagatoo ba kamo nga Siya mao ang Ginoo sa anihon? [Nagaingon ang kongregasyon, “Amen.”—Ed.] Miingon Siya sa Iyang mga tinun-an, “Pangamuyo kamo sa Ginoo sa anihon, nga magpadala Siya og mga mamumoo sa Iyang anihon.” Sa ubang pinulongan, “Ipangamuyo ninyo Kanako nga buhaton kung unsay pagabuhaton Ko.” Kita n'yo?

<sup>359</sup> Mga managhigala kita. Kita—kita. . . Iglesia kini. Aduna kita'y butang nga pagabuhaton, kita mismo. Aduna kamo'y butang nga pagabuhaton. Ania ang Maayong Balita, nasayod ako Niini, apan kung manglingkod lang kamo dinha ug dili Kini iwali, unsa ma'y maayong mahimo Niini? Kita n'yo? Aduna gyud kamo'y pagabuhaton. Kinahanglan ninyong mohimo og mga pagpaningkamot. Kinahanglan ninyong. . . Moingon kamo, “Bueno, nagatoo man ko nga makahimo ang Dios sa pag-ayo, apan wala gyud ko kahibalo kung unsaon.” Tumindog ka ug tugoti ang Pulong nga mamahimong imong pulong. Toohi Kini. Ayaw pagpangatarungan Niini; toohi lamang Kini.

<sup>360</sup> Ingon ko, “Bueno. . .” Nasayod ko, nga kung wala siya miadto didto, mawala gyud kadto kaniya. Miingon ko, “Kung ako lang, kung ako lang, moadto gyud ko ug kuhaon ko ang akong kuwarta karon mismo.” Ug miadto siya. Sa dihang gipabangon niya ang maong lalaki gikan sa higdaanan, adunay kuwarta ang lalaki. Mitawag lang siya ngadto sa silingan, gikuha ang uban niadto, ug gibayaran tanan.

<sup>361</sup> Unsa man kadto? Ang Pulong kadto. Kita n'yo, kung makakaplag lang Siya og Iyang magamit, makapamuhat gayud Siya. Karon, mao ra sa gihapon diha sa Balaanong pagpang-ayo.

<sup>362</sup> Karon, unsa kaha kung miingon kaniadto si Igsoong Welch, “Bueno, sa hunahuna ko dili na lang ko moadto; siguro aduna pa man og ubang paagi.” Unsa kaha kung miingon siya, “Bueno, dili na ko moadto didto wala man pud didto ang sakyanan”? Kita n'yo? Wala gayu'y mahitabo.

<sup>363</sup> Apan kinahanglan kang motoo. Kinahanglan mong toohan kini. Ug kana'y. . . Dayon mahulog kana ngadto sa usa ka kahimtangan nga iya sa pagtoo, ug igapamunga gyud niini kini. Sigurado gayud. Oh, mao nga. . .

<sup>364</sup> Nahunahunaan n'yo na ba ang mahitungod sa, sa dihang adunay tawo nga gibanhaw gikan sa mga patay, kung unsa'y nagakahitabo? Nahunahunaan n'yo na ba, ang nahitabo didto sa Finland, niadtong higayon nga gibanhaw kadtong gamay'ng batang lalaki gikan sa mga patay? Mitaliwan na kaniya ang iyang espiritu. Karon, kinahanglan nga adtoan sa Pulong, ang walay katapusan nga kawanangan didto, ug kuhaon kadtong gamay'ng kalag ug dalhon kadto mismo pabalik. Giunsa man Niini pagbuhat kadto? Ang Pulong kini, "Pagaayohon ang mga masakiton. Pagabanhawon ang mga patay." Kita n'yo? Unsaon man sa Dios pagbuhat niini? Kinahanglan nga mahitabo Kini pinaagi sa usa ka gibisbisan nga Pulong. Gipakita na Niya ang panan-awon, ug kinahanglan nga mahitabo kini. Atua didto nagbuy-od ang batang lalaki. Atua didto napahimutang ang tanan-tanan sumala gayud sa pagkasulti Niya niadto, duha ka tuig sa wala pa kadto mahitabo. Ug atua kini didto napahimutang. Mao kana'y hinungdan kon nganong gisulti ko ang mahatungod sa oso nga mikanaug didto sa bungtod, bisan unsa pa man: mahitabo gyud kadto, sigurado gayud nga mamahitabo. Kita n'yo? Unsa man ang nagpahitabo Niadto? Pulong!

<sup>365</sup> Ingon ko, "Langitnong Amahan, didto pa ako sa akong lugar, gisulti Mo kanako, mga duha na ka tuig ang milabay, nga mabanhaw kining gamay'ng batang lalaki gikan sa mga patay. Busa, sumala sa basihan sa Imong Pulong, sa Imong saad. Una, miingon ang Pulong, 'Kini nga mga ilhanan maganunot kanila nga nagatoo.' Gipadala Mo ang Imong mga tinun-an, Imong, gisultihan sila nga 'pagaayohon ang mga masakiton, pagabanhawon ang mga patay, pagahinginlan ang mga yawa.' Dayon, pinaagi sa usa ka panan-awon, gipakita Mo kanako didto pa lang sa akong lugar nga kining gamay'ng batang lalaki. . . mabanhaw gayud."

<sup>366</sup> "Busa, kamatayon, dili mo na siya mahawiran pa. Ania kanako ang Pulong sa Ginoo."

<sup>367</sup> Dili ako; dili ako kondili ang Pulong. Siya mao ang Pulong. Kita n'yo? Kung ako mao ang Pulong. . . Aduna lamang og Usa ka Tawo ang mamahimong Pulong, mao kana si Jesus. Siya mao ang gilitok nga Pulong sa Dios, pinaagi sa usa ka birheng pagkahimugso. Usa lang ako ka pagpangtuis, kita n'yo, ako mao—ako mao ang resulta sa pagkahiusa sa akong amahan ug inahan. Kinahanglan *kini* nga mamatay; *kini* mao ako, kita n'yo, ang lawas nga kinahanglang mamatay.

<sup>368</sup> Dili ingon-niana, kang Jesus. Siya mao ang Pulong. Gipakatawo Siya, sa usa ka ulay. Igsoon, wala gyu'y babaye, lalaki, o si kinsang uban pa, nga nagkaaduna og kahilambigitan Kaniya. Ang maong babaye kaniadto usa ra ka incubator, husto kana, ug mididi Siya sa iyang suso, ug uban pa. Mahimong tinuod kana. Apan, sultihan ko kamo, Siya mao ang Dios. Mao

kadto kung Kinsa Siya. Wala man lang og pagpakighilawas ang nahitabo, wala gayud. Kinahanglan wala gyu'y kahilambigitan ang pagpakiglawas diha Kaniya, sa pagpagawas og Kinabuhi pinaagi niadtong Dugo; nga pagahisgotan nato, sa pipila ka minuto. Ug dayon, tan-awa ninyo, Siya mao gayud ang Pulong.

<sup>369</sup> “Apan ang Pulong sa Ginoo. . .” Ang mga propeta dili mao ang Pulong. “Apan ang Pulong sa Ginoo miabot ngadto sa mga propeta.” Dili. . . Dili sila mao ang Pulong. Miabot ang Pulong *ngadto* kanila.

<sup>370</sup> Ingon niana usab ang ginabuhat Niini kanato sa karon. Sa dihang miabot ang Pulong alang niadtong gamay'g batang lalaki, unsa man kadto? Usa ka panan-awon. Unsa man kadtong alang sa oso? Unsa man kadtong alang sa uban pang mga butang? Ang tanan niadto, panan-awon. Ang Pulong kadto sa Ginoo, nga miabot didto. Dayon unsa ma'y ginabuhat niini? Mohawid Kini didto.

<sup>371</sup> Karon, kinahanglan nga igasulti kini, una. “Kamatayon, ibalik siya. Sa Ngalan ni Jesus Cristo, ginapadala ko kana nga Pulong.” Masapon gyud, sama sa pagkasapon Niini niadtong lalaki didto sa Bowling Green, nga dala kadtong gikawat nga sakyanan. Ania na usab Kini *dinhing* dapit ug nagapangsapon pag-usab. Unsa ma'y ginabuhat Niini? Ginakuha Niini kadtong—kadtong espiritu, ginapabalik kini mismo, ug pabalik sa lawas, sumala gayud sa pagkasulti sa Pulong nga pagabuhaton Niini. Mao kana. Unsa ma'y nagpahimo niadto? Pagtoo, dili ang kahibalo.

<sup>372</sup> Moingon kamo, “Karon tan-awon nato. Gibuhat ang hangin gikan sa *ingon-ani-ug-ingon-ana*. Adunay ingon-ani ka daghan nga asido. Adunay ingon-ani ka daghan nga gas. Adunay ingon-ani ka daghan nga cosmic light. Mahimo kong kalkulahan kana. Ug tingali kung akong. . .” Oh, imong—imong. . . Nagausik-usik ka lang og panahon.

<sup>373</sup> Dili kaalam; pagtoo! Dili gyud kaalam; sultihan ko kamo nga dili kana makahimo. Ang pagtoo ang nakapagpamatuod nga mahimo niini kini, kita n'yo, husto kana, nagapakita lang nga Siya mao ra sa gihapon kagahapon, karon, ug hangtud sa kahangturan. Bueno.

Dalion na nato karon. Kinahanglan na natong dalion.

<sup>374</sup> “Nagapamunga ingon sa Iyang matang niini.” Nagaingon ang Juan 14, nga, “Siya nga nagabuhat sa Akong. . . Siya nga nagatoo Kanako, ang mga buhat, ang mga ilhanan nga Akong ginabuhat. . .”

Karon, moingon kamo, “Mao ba kana ang mga ilhanan nga Iyang ginabuhat?”

<sup>375</sup> Misulod Siya kaniadto sa usa ka balay kon diin atua kadtong gamay'ng dalagita, ang bugtong anak nga babaye sa usa ka

ministro, nga nagahigda didto; patay na, bugnaw na, luspada na gyud, nga nagahigda didto. Tingali'g duha na ka oras nga patay kadtong maong dalagita ayha pa Siya nakaabot didto. Gipahimutang na nila siya sa usa ka gamay'ng higdaanan, giandam na aron dalhon siya, embalsamahon siya. Misulod si Jesus didto mismo sa lawak kon diin atua kadtong dalagita, mora'g ingon-ana. Nanagbakho sila didto ug nanaghilak nga sama niana. Gipagawas Niya silang tanan, miingon, "Panggawas una kamo dinhi. Gawas sa." Miingon, "Umari kamo, Pedro, Santiago, ug Juan. Nasayod Ko nga nagatoo kamo." Giingnan ang amahan, "Nagatoo usab ikaw, kay kung wala pa wala mo unta Ko gipangita."

Ug miingon ang inahan, "Ginoo, nagatoo ako." Kita n'yo?

Miingon, "Tindog ka dinhi."

<sup>376</sup> Mitan-aw Siya. Ug atua ang gamay'ng—gamay'ng dalagita. Miingon, "Tabita," nga nagakahulogan, "dalaga." Alleluyah! Dili na Niya kinahanglan nga mag-ampo pa. Siya man mao ang Pulong. Uh-huh.

<sup>377</sup> Dili ko na kinahanglan nga mag-ampo pa, kung makita ko na ang panan-awon, tungod kay nahiaman na ang Pulong. Gikinahanglan kong mag-ampo, aron makuha ang Pulong, makuha ang kung unsay isulti sa Dios. Dayon mahimo ko nang isulti Kini, pagkahuman nga makuha ko na kung unsay Iyang gisulti.

<sup>378</sup> Apan Siya gayud ang Pulong. Amen. "Dalaga, sultihan Ko ikaw, bumangon ka." Gipabangon siya, nga gigunitan. Mao kana. Kita n'yo? Oh, grabe!

<sup>379</sup> Usa kana ka pagpakita. "Nagapamunga og iyang matang niini." Miingon si Jesus, "Siya nga nagatoo Kanako, ang mga buhat nga Akong ginabuhar pagabuhaton usab niya."

<sup>380</sup> Busa, kini sila, kita n'yo, ang tanan niining mga butang mahitungod niining mga denominasyon ug ingon-anang mga butang, nangahimo nila kini nga mga butang ingon nga sama na sa katipun-ugan sa kahugawan ug kasal-anan, maingon sa gibuhar niining tagoangkan sa yuta ngadto sa kabuhatan. Husto kana. Oh, grabe! Giunsa man niini pagkahitabo? Unsaon man pagtubo sa tinuod nga Pulong sa Dios diha kanilang mga mugbo og buhok, nagasul-ob og purul, nagapanigarilyo, nagaapong sa dulaanan og bowling, ug mga nagapasakup ra sa iglesia? Unsa ma'y mahimo niana, sa dihang sila mga mahigugmaon, og mahilig man sa kalingawan nga mga tawo, nangawili ug nahigugma sa ingon-anang mga butang, nagahigugma sa kalibutan? Unsaon man pagpakasulod sa gugma sa Dios? Unsaon man pagtubo sa Binhi sa Dios sa ingon-ana nga matang sa yuta? Dili gayud kini makapangugat. Dili gayud kini makahatud og Kinabuhi ngadto niini. Mapahimutang lang kini dinha sa

karaang abogon nga denominasyonhong mga bato ug madugtra, apan dili gayud kini mahaturan og Kinabuhi. Oo, sir. Oo, sir.

<sup>381</sup> Mahilig og mga kalingawan, “Mga mahigugmaon sa kalingawan labi kay sa paghigugma sa Dios.” Grabe! Apan, mga maantigo sila. Sila’y doble nga mas maantigo pa kay sa—kay sa nianang usa pa ka klase. Sigurado. Maantigo, edukado, mga matinguhaon sa kaalam, sama kang Eva kaniadto, ug nasinati usab nila ang nasinati niadtong maong babaye, sa eksakto gayud. Mao kana ang Kamatuoran.

<sup>382</sup> Unsaon man pagkabuhi sa usa ka lirio, unsaon man pagkabuhi ug pagtubo sa usa ka Binhi sa lirio, sa dihang sa katubigan man kini nagatubo, dayon patuboon mo kini diha sa usa sa nianang mga abogon nga denominasyon? Unsaon man pagkatubo niini dinha, nga sa Tubig man kini nagatubo. Ang Tubig mao ang Espiritu. “Aduna sila og dagway sa pagkadiosnon, apan ginapanghimakak ang gahum sa Espiritu.” Kita n’yo? Bisan pa og mahulog ang Pulong kanila, dili gihapon Kini makatubo. Dili gyud Kini makatubo. Sama lang nga atua ang Pulong kang Eva kaniadto, apan dili gyud Kini makatubo. Ngano man? Gidawat man niya ang kaalam, ang kaalam ni Satanas. Miabot ang Pulong kanila. Nahulog man ang Pulong kanila. Sigurado, nahulog Kini kanila. Oo, sir. Aron unta motubo. . . Kini, nahulog man Kini kanila. Madungog man nila ang Pulong nga giwali.

<sup>383</sup> Nakakita na ba kamo og mga tawo nga anaa pirmi nagalingkod sa simbahan, apan wala gyud gihapon pagkabago? Mowali ka sa mga kababayan-an mahitungod sa mubo nga buhok; molabay lang, ang mga tuig, mubo ra sa gihapon ang ilang mga buhok. Magsulti ka sa mga kalalaken-an mahitungod sa pagpanigarilyo, sa mga kababayan-an mahitungod sa pag-inum-inom; padayon ra silang mag-inum-inom, mao ra gihapon. Mora ka lang nagabubo og tubig sa likod sa usa ka pato. Wala gyud kini’y lugar nga pagatuboan. Kita n’yo? Mao kana ang mga mawilihon og kalingawan, popularidad, “Bueno, ginabuhat man gani sa uban pang mga kababayan-an, buhaton ko pud.” Wala ko’y labot kung unsa ma’y ginabuhat nila. Katungdanan mo ang pagsunod sa Pulong sa Dios. Husto kana. Kita n’yo?

<sup>384</sup> Bisan pa nga nahulog ang Pulong diha kanila, dili Kini mahimong motubo. Tungod kini sa kaalam ni Satanas, kita n’yo, busa nahimo na lang og denominasyonhong abog. Dili sila makatoo sa Mga Hebreohanon 13:8, tungod nga nagmapasigarbohon gayud na sa kaalam, wala gayu’y unsa man nga pagatuboan Niini. Kita n’yo? Unsaon man nila sa pag-too sa Mga Hebreohanon 13:8, “Si Jesus Cristo mao ra sa gihapon kagahapon, karon, ug hangtud sa kahangturan”? Dili gyud mahimo. Kita n’yo?

385 Oh, moingon sila nga ginatoohan kono nila Kini. Oh, sultihi gani sila Niana, moingon sila, “Sigurado, ginatoohan gyud namo Kini.” Kung ingon-ana ipakita n’yo kanako ang mga bunga niini. Ipakita kini kanako. Ipakita n’yo kanako nga gibuhat gyud ninyo. Ipakita n’yo kanako kung ang iglesia nga inyong ginatambongan ginawali ba, ug ginabuhat ba ang mga ginabuhat kaniadto sa unang apostolikanhong Iglesia, nga nagatoo sa Pulong.

386 Gituis n’yo ang inyong pagpangbautismo. Ipamugos n’yo pa ang inyong mga ebidensiya. Ginahimo n’yo kini nga motakdo sa kung unsa nga matang sa kredo; imbis nga dawaton lang ang Pulong, imbis nga tugotan lang nga ipamunga sa Pulong ang kaugalingon Niining bunga. Nagahimo kamo og butang nga sa tan-aw n’yo mao ang angay n’yong buhaton, aron nga magpatungha kaninyo og usa ka kapanghimatuoran bahin Niini. Ug mahimo ni Satanas ang paghubad sa matag kapanghimatuoran nga gusto ninyong ipatungha. Sigurado, mahimo niya, mahimo gayud niya. Apan dili niya mahimong ipamunga ang Pulong. Mao kana’y usa ka butang nga nagapaso kaniya. Dili gayud niya mahimo kana. Oo, sir. Oh, oo.

387 Karon tan-awa ninyo si Cain ug si Abel. Pareho silang sinsero. Nakuha ni Cain, ang iyang kaalam, sa iyang inahan nga iglesia, si Eva. Mao kadto ang inahan niya. Pila man ang nakahibalo nga si Eva mao’y inahan ni Cain? [Nagaingon ang kongregasyon, “Amen.”—Ed.] Sigurado. Bueno. Sama sa iyang inahan, migamit siya og pagpangatarungan, kita n’yo, kaalam, kaugalingon niyang kaalam. Naghimo siya og maanindot nga halad; aduna siya’y mga bulak. Aduna pa siya’y bunga sa yuta. Miingon, “Bueno, karon, sigurado gayud, kita mo,” ingon niya, “ang Dios. . .” Sama ra kadto nga miingon si Satanas kang—kang Eva, “Sigurado gayud, sigurado gayud. . .” “Siguradong dawaton sa Dios ang akong halad. Maanindot nga halaran ang akong gibuhat. Gibuhat ko kini nga matahum kaayo. Dinayandayanan gayud kini.”

388 Sama ra niining umaabot nga Pasko sa Pagkabanhaw, mogasto sila og minilyon ka mga dolyares, sa tibuok nasud, aron lang magbutang og mga bulak sa Pasko sa Pagkabanhaw sa pipila ka mga altar. Wala man gihimo ang altar alang sa mga bulak; alang kini sa halad. Kita n’yo? Nagapakita lang kana sa mao ra gihapon nga espiritu ni Cain kaniadto, kita n’yo, mao ra gihapon—gihapon nga yawa kaniadto didto sa Eden. Kita n’yo?

389 Unsa—unsa ma’y nahitabo? Nagdahum si Cain, “Sigurado gayud. . .” Kabalo mo sinsero gayud ang maong tawo, tungod kay nagakahulogan kadto og Kinabuhi ug kamatayon, alang kaniya.

390 Ug, kana nga mga tawo, ayaw ninyo hunahunaa nga nagpakaaron-ingnon lang kana sila. Mga sinsero sila. Moingon



mo, “Kung ingon-ana, mamahimo silang sinsero ug unya sayup diay?” Mao gayud. Mahimong moinom ang usa ka tawo og hilong arsenic, nga sinserong gahunahuna nga castor oil ang ginainom niya o kung unsa man, unsa mang ubang butang. Kita n’yo? Ang pagkasinsero; dili ingon niana kana. Ang Kamatuoran, dili ang pagkasinsero. Kamatuoran!

<sup>391</sup> Ang mga kababayan-an didto sa Africa, ginahalad nila ang ilang mga masuso nga bata ngadto sa mga dios-dios, nga mga buaya. Ingon niana ba kamo ka sinsero? Dili. Pagkadaghan kanila ang motindog didto, nga mga Intsik, ginabali ang ilang mga bukog, alang sa mga dios-dios sa kusina! Ug unsa man usab kadtong mga Mohammedan ug mga atua didto, kadtong mga nagalakaw sa kalayo? Ug magbutang og bisan unsa na lang, oh, pangtusokon ang mga panit, diha sa ilang baba, ug pangtahion ang ilang baba.

<sup>392</sup> Ug ang uban pa kanila mangbutang og tukog diha sa . . . May nakita gani ko nga estatwa didto, usa ka gamay’ng pigurin, pamaagi niya kadto sa paghalad ngadto sa iyang dios-dios, sa pagdahum nga makaadto siya sa Langit. Butangan sa ilang pari og tukog ang iyang baba, nga nakahikot kini palibot sa iyang ulo, pinaagi og kadena; hangtud paubos, ipagapus ang iyang mga kamot diha sa iyang likod, gipakadenahan usab ang iyang mga tiil. Dili na siya makainom, makasulti, makakaon, ni bisan unsa pa man, hangtud nga mamatay na lang siya.

<sup>393</sup> Nakakita na ba kamo og si si kinsa man nga Cristohanon nga nagasakripisyo og ingon niana? Dili man gani mo motoo sa Kamatuoran, sa Pulong. Kita n’yo?

<sup>394</sup> Karon, “Katahum,” ingon niya, “siguradong dawaton gyud kini sa Dios. Tan-awa ninyo kung unsa ka nindot ang akong altar.”

<sup>395</sup> Nakita n’yo ba ang mao ra sa gihapon nga espiritu karon, sa kaalam? “Bueno, kung magtukod kita og dakung denominasyon, siguradong dawaton gyud kita sa Dios.” Wala gyud Siya’y ubang dawaton gawas sa Iyang Pulong. Wala. Kita n’yo?

<sup>396</sup> “Bueno,” moingon sila, “karon, tan-awa, Igsoong Branham, kung kami—kung makapadala lang kami og *ingon* ka daghang mga ministro kada tuig. Ang pang-misyon namong programa, niadtong miaging tuig, miabot og sobra usa ka gatus ka libo ka mga dolyares.” Mahimong maayo man kana, igsoon, apan patay kamo hangtud nga pagailhon ninyo kana nga Pulong ug magduol Niini. Eksakto gayud.

<sup>397</sup> “Aba, Igsoong Branham, ang among iglesia! Unsa ba’y hunahuna mo sa imong kaugalingon, usa ka man lang ka tawo nga ang utok ingon ka gamay sa mani?”

<sup>398</sup> Tinuod kana. Karon, eksakto gayud kana. Tinuod man kana. Apan, bisan unsa pa man ko, magapabilin ako nianang

Pulong. Magatubo Kini sa kung unsa man, sa umaabot nga adlaw. Kita n'yo? Magpabilin lang gayud nianang Pulong, bisan unsa pa man. Wala man kita og bisan unsa gawas lamang niining gamay'ng tabernakulo dinhi. Mao lang man kini ang gikinahanglan nato, sa pagka-karon, usa ka dapit nga mapahimutangan, tungod kay nagahulat man kita nga moabot na si Jesus.

<sup>399</sup> Wala kita nangandoy og daku nga denominasyon nga kinahanglan mogasto gyud og minilyon matag tuig, sa pagpatukod og mga bilding ug mga butang nga sama niana; ug samtang may mga tawong nagapaningkamot sa pagwali sa Pulong, nagaantus intawon didto, nga walay makaon, ug ingon-anang mga butang. Unsa na ma'y nagakahitabo sa mga tawo karon? Wala na'y... Oh, daw sa kinahanglan gayud nga mahigmata na ang mga tawo.

<sup>400</sup> Apan, may mga tawo nga mahimo rang dawaton ang Katolisismo, ingon niana ka buta nga mahimong dawaton ang bisan unsa na lang. Sultihan ko kamo sa Kamatuoran. Ang si bisan kinsa nga makahimo ra sa pagtulon niana, mahimo—mahimong... “Manggialamon nga mga tawo,” dili ikatingala, nga miingon ang Biblia, “bisan ang mga hari sa yuta nakapakighilawas uban kaniya.” Ug ang manggialamon nga mga tawo, nga dunay kahibalo, kita n'yo, ug naabot nila kana, sila nga mga pari, manggialamon nga mga tawo. Oh, aba, kung hisgotan lang ang pagka-edukado? Aba, kinahanglan gyud nilang magtuon og pila ka mga katuigan, mga katuigan, mga katuigan, ug mga katuigan.

<sup>401</sup> Ginaingon nila nga wala kono sila nakigpuyo uban niadtong mga madre. Kung ingon-ana gusto kong pangutan-on kamo og usa ka butang. Nganong wala na lang sila nagpakapon kung ingon-ana? Uh-huh. Uh-huh. Uh-huh. “Sila ang Pangasaw-onon, ingon nila. Ang mga madre kono ang Pangasaw-onon. Ug sila na man kono ang Pamanhonon, siyempre, nakita n'yo.” Husto kana. Pangluokon niadtong Madre Superyora ang mga bata ug ipangtambog sila didto sa lungag nga apog. Dili kamo motoo niini? Paminawa ninyo ang usa nga nakasaksi gayud niadto, nga gikan na didto, nga nagpamatuod bahin niini. Ingon pa, “Karon sige, bisan ipadakop pa ako ninyo tungod sa balaod.”

<sup>402</sup> Ug miingon, “Buhaton namo ang mao rang butang nga gibuhat sa mga tawo didto sa Rusya, ang mao rang butang nga gibuhat sa mga taga-didto sa Mexico. Ibutyag namo kana nga butang, aron nga makaabot kini sa gobyerno.”

<sup>403</sup> Apan unsaon man ninyo pagbuhat niana karon nga anaa man dinha mismo sa gobyerno ang pangulo niini? Kita n'yo? Kita n'yo? Kinahanglan nga mamatuman gayud ang Kasulatan, “Nag-organisa sila og usa ka imahe dinhi dapit, alang nianang mapintas nga mananap nga nagalingkod dinha. Ug naghiusa

silang duha ug gihatagan og kagahum kining mapintas nga mananap, aron makasulti kini.” Oh, igsoon, dili gayud mausab kana nga Pulong. Dili komunismo ang magahari, kondili ang Romanismo. Uh-huh.

<sup>404</sup> Karon tan-awa ninyo dinhi. Miingon si Cain, “Siguradong dawaton Niya ang akong halad.” Apan unsa man nga matang sa halad? Ingon niya, “Naghimo ako og halad.” Apan unsa man kadto nga matang sa halad? Kinabuhing botanika: mga tanum, mga bulak, mga utanon. Kinabuhing botanika, (unsa?) wala ma’y pag-antus niana, walay pagbayad.

<sup>405</sup> Dili gusto sa mga tawo mag-antus. Mao kana ang nagakahitabo sa karon. Moduol lang sila, moduol lang sila ug motoo niini nga Pulong, kung dili nila kinahanglan nga manggawas sa ilang iglesia, kung dili sila bugalbugalan, biaybiayon. Dili gayud. Gusto nila og kinabuhing botanika, usa ka matang sa kaalam. “Bueno, *kini* nga kinabuhi maingon man usab ka maayo Niana.” Dili. Ipakita ko kaninyo kung hain kana gikan, sa pipila ka minuto, kon itugot sa Ginoo.

Apan, “Si Abel, tungod sa pagtoo.” Himaya!

<sup>406</sup> Si Cain, pinaagi og kaalam, miingon, “Siguradong dawaton kini sa Dios. Ania’y usa ka altar. Aduna ako’y iglesia.” Ingon niana man ang iglesia, usa ka halaran, dapit nga pagasimbahan. Bueno. “Aduna na ako’y altar. Magasimba ako nga ingon ka sinsero sama sa igsoon ko. Ug aduna pa ako og maanindot nga butang dinhi para niini. Siguradong dawaton kini sa Dios.” Ingon niana usab ang gisulti sa yawa ngadto sa iyang inahan; mao ra nga bakak, mao ra nga kaalam.

<sup>407</sup> Karon, si Abel. Miingon ang Mga Hebreohanon 11:

*Tungod sa pagtoo si Abel naghalad sa Dios og usa ka halad nga labing maayo kay sa kang Cain, . . . siya bisan patay na, apan nagasulti.*

<sup>408</sup> Kita n’yo? “Si Abel. . .” Pinaagi sa unsa? Sa kaalam ba? Pinaagi ba sa teolohiya? “Tungod sa pagtoo naghalad sa Dios og usa ka halad nga labing maayo.” Tungod sa pagtoo sa unsa? Tungod sa pagtoo sa unsa? Sa . . . Hain man niya nabatongan ang iyang pagtoo?

<sup>409</sup> Didto, iyang amahan ug inahan ra man ang atua didto, siya ug ang igsoon niya sa inahan, giunsa man pagkahitabo niadto? Asa man—asa kaha niya nakuha kadto? Sa unsa man nga nakabaton siya og pagtoo? Pagtoo ba sa botanika, pagtoo ba sa *ingon-nimi*? Dili, sir. Nakabaton siya og pagtoo sa Pulong. Tungod, gusto niyang mahibaloan kon nganong napahigawas siya sa tanaman. “Ngano kaha nga gipalayas kami?”

<sup>410</sup> Moingon siguro ang inahan, “Tungod kay naminaw man gud ko sa bakak sa yawa. Tungod kay *kini* nga batang lalaki dinhi

nahimugso man gud sa *ingon-ani-ug-ingon-ana* nga paagi, mao nga gipagawas kita sa Dios.”

<sup>411</sup> “Bueno,” ingon siya, “Dili gani ako makaduol diha sa ganghaan. Aduna man gud og Querubin didto, nga dunay espada, nga nagabantay niadtong Kahoy sa Kinabuhi.” Busa, pinaagi gayud sa pagtoo!

<sup>412</sup> Kita n’yo, pinaagi og kaalam, naghalad si Cain, kabalo na mo, nga wala nanghibalo sa Pulong, kondili sa hunahuna lang, pinaagi og kaalam. Naghimo siya og usa ka maanindot nga dapit, ug gihimo kadto nga maanyag ug matahum.

<sup>413</sup> Apan, “Si Abel,” wala gyu’y nagsulti kaniya, ha, usa lamang siya ka bata, “pinaagi og pagtoo nakita niya nga dili kadto kinabuhing botanika; kondili usa kadto ka pagpakighilawas, pinaagi sa dugo.” Tan-awa, igsoon. Sulayi ninyong labanga Kana, usa ka higayon.

<sup>414</sup> Pinaagi og pagtoo nakita ra gihapon kini sa Iyang mga anak. Karon wala gayud Niya gitudlo kini pinaagi sa kung unsa nga kaalam. Wala kini nagaabot pinaagi og kaalam. Nagaabot kini pinaagi og pagtoo. Miingon ang Biblia, “Si Abel, tungod sa pagtoo.”

Unsa ma’y gihalad niya? Dugo, gikan sa buhi nga kinabuhi, kinabuhi sa mananap.

<sup>415</sup> Mga mananap man kita, kita mismo. Kita’y mga mainit og dugo nga mga mananap. Husto gayud kana. Mas hataas nga matang sa linalang, pinakahataas nga mananap, apan adunay kalag nga anaa sa sulod. Mao kana ang kinabuhi.

<sup>416</sup> Karon matikdi ninyo. Pinaagi og pagtoo nakita ni Abel ang kapadayagan, ang panan-awon, ug nagdala og usa ka buhi, nagadagayday nga dugo, tungod kay anaa man sa dugo ang kinabuhi.

<sup>417</sup> Anaa sa lindog ang kinabuhi sa—sa bulak. Ug kinabuhing botanika kini, nga walay pagbati. Nanghinaut ko nga motuhop gyud kini. [Nagaingon ang kongregasyon, “Amen.”—Ed.]

<sup>418</sup> “Si Abel, tungod sa pagtoo,” nagpabilin siya sa Pulong. Pinaagi og pagtoo, dili nga pinaagi og kaalam. “Pinaagi og pagtoo nakita niya nga pagpakighilawas kadto, dugo.” Nagagikan ang selula sa dugo diha sa lalaki. Aduna sa lalaki ang selula sa dugo diha sa semilya. Ang hemoglobin mao’y dugo, nga nagagikan sa lalaki. Ug nasayod si Adan nga dili kadto mga mansanas, ug mga peras, ug mga patatas, o unsa man, ang nagpahinungdan nga gipagawas sila sa tanaman sa Eden, nga nagpahinungdan sa sala. Pagpakighilawas kadto, dugo, ug mao nga naghalad si Abel og dugo. Gibuhat niya kadto pinaagi og pagtoo, dili pinaagi og kaalam.

<sup>419</sup> Unsaon man sa usa ka tawo, pinaagi og kaalam, nga masabtan kini, sa dihang ang tibuok Biblia ug ang tibuok

Iglesia sa Dios natukod man ibabaw sa Balaanong kapadayagan, pinaagi og pagtoo? “Ibabaw niining bato Akong pagatukoron ang Akong Iglesia.” Kita n’yo?

<sup>420</sup> Huh! “Oh,” moingon sila, “sigurado, nagatoo man kami Niana.” Kung ingon-ana hain man ang Kinabuhi ni Cristo sa ingon-anang mga porma? Hain man ang Kinabuhi ni Cristo? Ikaduha. . . Mahimo ninyo tingaling isulat ang pipila niini nga mga Kasulatan. Kita n’yo? Hain man ang Kinabuhi? Kung. . . Moingon sila, “Bueno, nagatoo kami. Nagatoo kami. Nagatoo kami.” Kung nagatoo gyud kamo, nan. . .

<sup>421</sup> Miingon si Jesus, “Kini nga mga ilhanan maganunot,” dili ingon nga tingali’g maganunot, “kini maganunot kanila nga nagatoo.” Miingon si Jesus, “Kung ang usa ka tawo nagatoo Kanako, ang mga buhat nga Akong ginabuhat, pagabuhaton usab niya ang mga niini. Siya nga nagatoo Kanako, ang mga buhat nga Akong ginabuhat pagabuhaton usab niya.”

<sup>422</sup> Dili nga magbinuang lang siya. Pagabuhaton gayud niya kini. Unsaon man kana nga mamahitabo? Sanglit, anaa na man ang mismong Kinabuhi nga nga iya ni Cristo, diha kaninyo. Dili kini magapamunga og unsa man nga kaalam; dili gyud kini motubo dinha. Isalikway gyud una niini ang kaalam, aron dawaton ang—ang pagtoo. Pagtoo sa Pulong, dili nga kaalam diha sa Pulong. Pagtoo sa Pulong!

<sup>423</sup> Si Satanas gani aduna ma’y mas labaw nga kaalam sa Pulong kay sa kang bisan kinsa nga mga magwawali, hiusahon pa man ang tanang magwawali, mga pari ug tanan na.

<sup>424</sup> Adunay mas labaw nga kaalam, apan dili siya mamahimong magkaaduna og pagtoo. Buhion man sa pagtoo Kini. Pahinulsulon man siya sa pagtoo, pahawaon man siya sa pagtoo gikan sa iyang organisasyon. Hum! Apan aduna man siya’y kaalam, mao nga nagapabilin gyud siya dinha. Bueno.

<sup>425</sup> “Apan si Abel pinaagi og pagtoo nakita niya nga usa kadto ka pagpakighilawas, ug mao nga naghalad siya og dugo, dugo sa kinabuhi, ug gidawat kadto sa Dios.”

<sup>426</sup> Karon, sa Ikaduhang Timoteo 2, 3, giingon dinha nga. . . Karon miabot kanila ang Pulong. Apan nangahulog lang Kini sa dili-maayong yuta. Nakita n’yo? “Aduna sila og dagway sa pagkadiosnon, apan ginapanghimakak ang gahum niini,” gahum sa Espiritu. Ikaduhang Timoteo 3, kung ginasulat ninyo kini. Bueno. “Nagabaton og dagway sa pagkadiosnon.”

<sup>427</sup> Ang mga ilhanan sa Balaang Espiritu sa Kinabuhing Walay Katapusan, ginapanghimakak nila Kana. “Dili man kinahanglan nga magsulti og laing mga dila ang mga tawo. Dili. Wala ma’y ingon-anang butang sama sa Balaanong pagpang-ayo, bautismo sa Espiritu Santo. Ang ingon-anang mga butang para lang kana sa mga apostoles kaniadto.” Dagway lang ang nabatonan!

428 Miingon si Pablo, nga nagapropesiya niini. “Sa kaulahi-ang mga adlaw, sa kaulahi-ang mga panahon, mahitabo kini nga mga butang.” Dili sa ilang mga adlaw kaniadto. “Ug ang Espiritu nagaingon sa dayag: sa kaulahi-ang mga adlaw, kaulahi-ang mga panahon, ang uban managpamiya gikan sa Pagtoo,” ug tanan na nianang mga butanga. Kita n’yo? Tan-awa ninyo, “Nagabaton og dagway sa pagkadiosnon.”

429 Karon, unsaon man pagtubo sa mga ilhanan sa Balaang Espiritu sa Kinabuhing Walay Katapusan diha nianang eklesiastikal nga abog, diin wala gyu’y Espiritu sa tubig, man lang? Kita n’yo? Dili gayud mahimong motubo diha sa mga kaumahan sa denominasyong kalingawan, ug kaalam, ug pagsadya-sadya. Unsaon man pagtubo sa mga ilhanan ug mga katingalahan nga iya sa buhi nga Dios diha sa usa ka—usa ka babaye nga walay kaligdong aron manglihok ingon nga usa ka maugdang nga gining? Gusto kong ipangutana kana kaninyo. Unsaon man pagtubo Niini diha sa usa ka lalaki nga motindog sa usa ka pulpito ug, tungod nga kinahanglan siyang may panginabuhian o tungod sa kung unsang pang-denominasyon nga pabor, igasalikway niya ang Kamatuoran sa Dios? Unsaon man pagnunot sa espirituhanong mga ilhanan dinha? Dili gayud mahimo.

430 Unsaon man—unsaon man pagtubo Niini diha sa usa ka magwawali nga siya man ang mag-una-una sa iyang denominasyon ngadto, sa mga paghubohubo, didto sa mga baybayon? Ug dinhi niadtong miaging gabii, sa usa ka lugar nga naagian ko lang kagabii, sa usa ka parokya, ug aduna sila’y dakung kumbira sa pagsayaw-sayaw didto, ug kon unsa na lang ang ginabuhat, unsaon man pagtungha sa mga bunga sa Espiritu sa ingon-anang lugara? Napahimutang man gud kini ibabaw sa usa ka eklesiastikal nga bato, husto kana, ug dili ngadto sa walog sa mga pagpanglutos, aron pagabugalbugalan ug pagabiaybiayon.

431 Nagapangabundlay gyud og ayo ang lirio. Nahinumduman ninyo ang akong wali dili pa lang dugay, pipila na ka tuig ang milabay, mahitungod kang Mr. Lirio. Nagapangabudlay siya. Ngani, miingon si Jesus, “Kung giunsa niya...sa pagpangabudlay, ni magkalinyas, apan nagaingon ako kaninyo: nga si Solomon, sa tibuok niyang himaya, wala makabisti sama sa usa niini.” Kung unsa nga ang lirio nagapangabudlay, aron sa paghimo sa iyang kaugalingon nga maanyag, (alang sa unsa?) aron lang nga makapanghatag. Ginasimhot sa mga tawong nagaagi ang iyang kahumot. [Nagahanggab si Igsoong Branham sa iyang ilong—Ed.] Motugdon ang buyog sa kinasuloran niya mismo ug mangkuha og dugos gikan kaniya. Basta lang niya nga ginahatag kini nga walay bayad. Nagapangabudlay siya, aron lang nga mahimo kini.

<sup>432</sup> Alleлуйah! Ingon niana ang usa ka tinuod nga tawo sa Dios, Pastor Lirio, Rev. Mr. Lirio, oo, sir, nagakugi sa Pulong, nagayukbo sa pag-ampo ug nagatuaw sa Dios, “Dios, dili ko makita kung motakdo ba *kini dinhi, niini*. Kinahanglan nga moabot kini pinaagi sa Pulong.” Pagnakita ninyo kini, ug gihatag na sa Dios kaninyo, nan umadto kamo nga walay bayad. Dili nga magpaabot pa sa dagkung panagtigum nga igapahigayon, “Kung makagarantiya kamo kanako og linibo ka mga dolyares, moadto ako.” Dili ingon-ana, kinahanglan wala’y bayad, “Kung sa Timbuktu man o asa man kini, Dios, kung asa Mo gustong ipugas ko ang Binhi, igapugas ko Kini nga walay bayad.” Alleлуйah!

<sup>433</sup> Miingon si Jesus, “Si Solomon, sa tibuok niyang himaya, wala makabisti nga sama niini.” Miingon, “Palandunga ninyo ang mga lirio.”

<sup>434</sup> Ang makaluluoy’ng gamay’ng linalang, giantus ang tanang butang, gipahiagum kaniya ang bisan unsa na lang, ug gibugalbugalan ug gibiyaybiayan. Ug gisipa pa siya pagawas sa dakung eklesiastikanhong iglesia, ug gibansagan siya sa tanan na lang nga matang sa mahugaw’ng mga ngalan. Apan nagpabilin gayud siya nianang Pulong, nagapangabudlay, adlaw ug gabii, nagpahimutang lang sa maong walog. Unsa? Siya’y—siya’y anaa sa usa ka dapit diin makainom siya gikan sa “mga kasapaan sa Tubig.” Nagapangabudlay, (alang sa unsa?) aron makapanghatag niini. “Nadawat ninyong walay bayad, ihatag nga walay bayad.” Oo, sir. Oh, grabe!

Unsaon man pagtubo niini diha sa abogon nga yuta sa ibabaw nianang eklesiastikanhanhong bato?

<sup>435</sup> Ang mga anak ni Cain mga manggialamon, siyentipiko. Tan-awa ninyo ang mga anak ni Cain karon sa diha nga nagapanungha sila. Tan-awon nato sila sa makadiyut. Ang mga anak ni Cain, unsa man sila? Mga magtutukod, mga imbentor, mga bantugang tawo sa siyensiya. Aduna sila og kaalam. Kita n’yo? Sila—sila—nanagtukod sila og mga bilding, ug nanaghimo og puthaw, ug nanagtimpla og mga kasangkapan. Sila’y mga siyentista, utokan, edukado, ug relihiyoso.

<sup>436</sup> Apan unsa ba’y gipamunga niadtong tanum sa kaalam? Kamatayon, ngadto sa tibuok kaliwatan, sa diha nga miabot ang paghukom sa Dios. Husto ba kana? [Nagaingon ang kongregasyon, “Amen.”—Ed.] Unsa ma’y gibuhat—unsa ma’y gibuhat sa maong grupo? Namunga og kamatayon. Bisan pa, sa tanan nilang kaalam ug pagka-utokan, unsa ma’y nahitabo? Nangamatay sila. Nangamatay ang matag usa kanila sa paghukom sa Dios. Tinuod ba kana? [“Amen.”] Mao’y giingon sa Dios. Sila’y mga utokan, hataas ang edukasyon, mga hanas, relihiyoso, mga hawud gayud. Utokan, edukado, nanagsalig sa ilang kaalam, ug gipatay pud ang tibuok kaliwatan sa tawo.

437 Mao ra gihapon ang ginabuhat nila karon, ang ilang mga bomba atomika ug ingon-anang mga butang, nga gipanghimo niining utokan nga mga siyentista ug pagagun-obon—pagagun-obon gayud sa niining mga butang ang tibuok kaliwatan. Aduna pa gani sila og nabilin nga radyosyon sa hangin karon. Kini’y—kini’y... Masunog gayud ang inyong mga mata, ug magpahinungdan og kanser kaninyo, ug tanan na. Ilang—ginapabuto nila kini, sa kadagatan, ug dili na nila kini makit-an pa. “Pagpabuthon nila kini, pagagun-obon niini ang tibuok kalibutan,” ingon nila. “Mangasunog ang mga tawo, nga nakatapat pa ang ilang mga unod.”

438 Dili ikatingala, nga miingon ang Biblia, “Ug pagakaonon sa mga langgam sa kalangitan ang unod sa mga kapitan,” ug uban pa; mangadugta, tungod sa radyosyon, ug tanang uban pa.

439 Ginabuhat nila kini, sila mismo, pinaagi sa ilang maantigo nga kaalam. Mao kana’y hinungdan nga miabot ang kamatayon: tungod niining maantigong kaalam. Magpakayano lang, toohi ang Pulong sa Dios, ug aron mabuhi. Gamita ang inyong kaalam, ug mamatay gyud kamo. Bueno. Sa pagpang-ani, sa katapusang panahon, mangamatay gyud sila.

440 Bueno, ang mga anak ni Abel mga kabus lamang nga, mga mag-uuma, mga magbalantay sa karnero; mga pastor, kabalo na mo. Mga magbalantay sa karnero, mga mag-uuma, mapainubsanon, wala nagapamahayag nga mga maantigo sila, kondili nagapabilin lamang sila sa Pulong. Unsa ma’y gipamunga nila sa katapusang panahon? Usa ka propeta. Oo. Usa ka propeta, alang sa unsa? Ingon nga mga ilhanan sa kaulahiang panahon.

441 Sa dihang mitindog si Noe sa pultahan, niadtong arka nga ginabuhat, ingon siya, “Adunay moabot, nga ulan.” Gitawag siya nga usa ka panatiko, apan usa siya ka propeta. Amen. Unsa ma’y gibuhat niya kaniadto? Naghatud siya og kaluwasan ngadto kanila nga nagatoo, ug kanila nga gustong makalingkawas. Ingon niana ang ginapamunga sa mga mapainubsanon, dili-dukado nga kaliwatan, nga mitoo sa pagtoo. Ang uban nga nanagpanoo sa kahibalo, naghatud hinoon sila og kamatayon, ngadto sa tibuok kaliwatan. Unsa ma’y—unsa ma’y gibuhat sa mga mapainubsanon pinaagi og pagtoo? Naghatud og kaluwasan, usa ka propeta sa Ginoo, nga naghatag kanila og usa ka ilhanan nga atua na sila niadtong tungora sa katapusang panahon.

442 Sa hunahuna n’yo motoo kaha niadto ang mga edukado? Kusmuran ka lang nila ug molakaw palayo, moingon, “Asa man diay magagikan ang ulan? Pamatud-i kanako sa siyentipikanhong pamaagi kung aduna ba gyu’y tubig sa ibabaw didto.” Mao kana ang mga siyentista, pundok sa mga manggialamon, nagapaninguha, nga pamatud-an



nila sa siyentipikanhong pamaagi nga wala kono'y Dios. Nagapaninguha gayud!

<sup>443</sup> Sa dihang nakuha *kana* nga hulagway kaniadto, nakatindog gyud sila sa ilang mga ginalingkoran. Dili gyud makasabot ang maong tawo. Miingon, “Adunay sa kung unsa nga Kahayag ang miigo sa lente.” Ang ila mismong siyentipikong instrumento, ang nakakuha niining hulagway, sa kamera. Sama sa giingon ni George Lacy, ingon niya, “Sir,” miingon, “dili mokodak og sikolohiya kini nga kamera. Miigo gayud ang maong Kahayag sa lente. Nakudakan Kini mismo.” Miingon, “Kung unsa man Kini, dili ko makasulti kaninyo, apan anaa gyud Kini dinha.” Miingon, “Isulat ko ang akong ngalan nganhi niini.” Gisulat niya. Ug nakita n’yo usab kadto, kamo mismo. Oo, sir. Anaa kadto sa FBI. Kita n’yo?

<sup>444</sup> Ang atong Dios, sa niining kaulahiing adlaw, dili magabiya og usa ka bato nga wala-nabalintuwad, apan kung aduna man Siya’y igapakita dili kini madawat niining kalibutana. Padayon nga nanagtubo ang kaalam ug kahibalo, nanag-usbong sa kahanginan nga sama sa mga langaw, ug—ug mga jet plane, ug ang mga panggubat sa ilalum sa tubig. Ug tanan na nga matang sa kadautan, ug mga pagkinabuhi diha sa kasal-anan, naninguha pagbuhat og butang nga magapanalipod kanila.

<sup>445</sup> Apan adunay usa lamang ka butang: ang pagkamatarung sa Dios nga nagatindog diha sa Pultahan sa Arka. Kinsa man ang Pultahan? Miingon si Cristo, “Ako mao ang Pultahan ngadto sa toril sa mga karnero.” Ginabasa ko lang ang akong teksto. “Magapatalinghug ang Akong karnero sa Akong Tingog. Sa usa ka dumuloong dili sila monunot.” Ayaw gayud kamo pagpatuis aron mosunod sa usa sa nianang mga organisasyon dinha. Mogawas gyud siya dinha, sa ingon ka sigurado gayud. “Pagakuhaon Ko sila gikan sa maong panon, ug pangunahan Ko sila. Magapanguna Ako kanila.” Amen. “Maila nila nga Ako kini. Walay ni usa nga nagalakaw sama Kanako, walay ni usa nga nagabuhat sa mga butang nga ginabuhat Ko,” moingon Siya. Amen.

<sup>446</sup> “Rabbi, karon hingsayran na namo nga nagagikan Ikaw sa Dios, tungod kay walay tawong makabuhat niining mga milagro nga Imong gipangbuhat gawas lamang kon ang Dios anaa uban kaniya.” Kita n’yo? Husto kana. Mao kana ang pagsugid ni Nicodemo. Mao kana.

<sup>447</sup> Namunga kadtong gamay’ng mapainubsanon nga kaliwat og usa ka propeta. Ug kadto nga propeta, sa kaulahiing mga adlaw sa mga anak ni Abel, namunga og usa ka propeta nga nagpakita og pang-kaulahiing adlaw nga mga ilhanan ug nagpasidaan.

<sup>448</sup> Mao ra usab gihapon karon, sa pagtoo ko. “Ang adunay igdulogog, kinahanglan magpatalinghug sa ginaingon sa Espiritu nganhi kanato.”

449 Busa, kita n'yo, dili gyud mahimong motubo ang Binhi nga Pulong sa Kinabuhi sa ingon-anang matang sa kahimtangan sa kaalam. Dili gayud mahimo.

450 Adunay pagtoo si Moises ug si Josue kaniadto sa Pulong. Apan gusto sa uban nga magsayaw-sayaw ug panghuboan ang mga kababayen-an; mao usab si Korah, (ngano man?) tungod sa iyang pang-Egiptohanong kaalam. Dili gusto ni Moises og ingon- niana.

451 Tan-awa ninyo ang mga Korah sa karong panahon, nagapasayon-sayon lang, nagasayaw-sayaw, tibuok gabiing naga-party-party; ang mga kababayen-an: mugbo og buhok, mugbo og mga bisti, bisan unsa na lang. “Wala ma’y diperensya niana. Okey lang man kana.” Dili kana husto. Nagaingon ang Pulong nga dili gyud kana husto. Oo. Wala gyu’y kabag-ohan. Kita n’yo?

452 Bisan pa gikabautismohan na ang matag usa kanila, ang matag usa, si Korah ug ang tanan gikabautismohan na, nagapakita lang nga anaa na sad kanang eklesiastikanhong tipo pag-usab.

Moingon kamo, “Nabautismohan ba diay sila?”

453 Unang Mga Taga-Corinto 10:1 hangtud 2. Basahon lang nato kini. Atong . . . Nasayod ko nga halos udto na, apan dili pa man siguro mapagtong ang paniudto. Tingali’g madugay-dugay pa kini nga paniudto, kung padayon kita nga pagapakaonon sa Ginoo. Kita n’yo? Unang Mga Taga-Corinto 10. Karon tan-awa ninyo dinhi. Unang Mga Taga-Corinto 10:1 hangtud 2, nakita ko na. Karon, nakita ko usab ang Ikaduhang Mga Taga-Corinto. Unang Mga Taga-Corinto 10:1 hangtud 2.

*Kay, mga igsoon, dili ako buot—dili ako buot nga dili ninyo hibaloan, nga ang atong . . . tanan natong mga ginikanan nahianha sa ilalum sa panganod, ug silang tanan milatas sa taliwala sa dagat;*

*Ug silang tanan gikabautismohan ngadto kang Moises diha sa panganod ug sa dagat;*

454 Nabautismohan si Korah kaniadto sa mao ra nga bautismo nga sama ra pud sa uban pa kanila. Apan unsa ma’y gitinguha niyang buhaton? Basta tugotan lang nga mangsayaw ang mga kababayen-an, ug mag-inum-inom og diyutay’ng bino ug maglipaylipay og diyutay, panghuboan sila ug managpanapaw, ug buhaton ang mga ingon niana. Nasayod mo nga miingon ang Biblia nga gibuhat nila kadto. Gikuha nila kadtong mga kababayen-an ug gipahubo kanila ang ilang mga bisti, ug gipasayaw sila, ug ingon-anang mga butang. Ug nasuko gayud si Moises kanila. Mahinumduman ba ninyo kana? [Nagaingon ang kongregasyon, “Amen.”—Ed.] Ngano man? Kauban man nila si Dr. Korah, nga adunay kaalam. Miingon siya, “Dalhon ko

kamo og balik sa Egipto.” Didto man gud unta silang angay, napaingon.

<sup>455</sup> Apan, si Igsoong Moises, sa dihang mikanaug na siya, lahi gayud. Nagpabilin siya ug si Josue sa Pulong. Nagsaad ang Dios; nagpabilin gyud sila niini. Bueno.

<sup>456</sup> Ang uban usab gusto ra nga magsayaw-sayaw ug maghubo-hubo sa ilang mga bisti, ug tungod kadto, sa kaalam ni Korah. Ug gikabautismohan na man unta ang tanan, ang matag usa kanila.

<sup>457</sup> Ang Israel ug Moab. Oh, bag-ohay ko lang...inyong... Nahisgotan ko na kana, kaniadto. Dili na nato kana pagahisgotan pa. Kinahanglan ko nang dalion. Bueno. Ang Israel ug Moab, kabalo na mo kung unsa kadto didto. Ang usa, ingon ka maayo gayud, adunay kaalam, dagku kaayo ang mga denominasyon. Ang laing usa pa, kabus ra, walay giapilan nga unsa mang denominasyon.

<sup>458</sup> Dayon, usa niana ka adlaw; mao kini ang pagahisgotan ko karon sa dili pa nato tapuson. Usa niana ka adlaw, kining duha ka bantugan nga mga kapanguhaan, o mga gahum, nagtagbo alang sa usa ka pagpakigsangka sa Pulong sa Dios.

<sup>459</sup> Karon paadto na kita sa pinaka-importanteng bahin. Mahimo man natong mobalik. Mahimo kong maghisgot og usa pa ka dosena. Mahimo ko man pud nga motindog dinhi sulod sa usa ka semana, apan dili gyud gihapon igo nga mahisgotan ko bisan ang mabaw ra nga bahin niini, aron nga mapamatud-an ko kini mismo, kining ginahisgotan ko. Apan nagalaum ko nga nakuha ninyo kini. Kita n’yo?

<sup>460</sup> Usa ka adlaw, miabot kini sa usa ka pagpakigsangka. Midangat ang kaalam ug pagtoo ngadto sa usa ka pagpakigsangka. Nagtagbo si Jesus ug si Satanas. Husto kana. Nagtagbo si Jesus ug si Satanas. Kining duha ka dagkung mga puwersa, kaalam ug kahibalo, midangat sa usa ka pagpakigsangka. Kita n’yo?

<sup>461</sup> Karon, pareho silang migamit sa Pulong. Husto ba? [Nagaingon ang kongregasyon, “Amen.”—Ed.] Oh, igsoon, nagakaanindot na kini, para kanako. Kita n’yo? Ayaw ninyo kini sipyata, karon. Oh! Pag-ingon mo, “Dios, ablihi ang kasingkasing ko.” [“Dios, ablihi ang kasingkasing ko.”]

<sup>462</sup> Pareho silang migamit og Pulong sa Dios, mao ra nga Biblia. Apan dili Kini magpulos sa usa ka dili-nakabig nga agianan. Siguradong dili. Dili gayud. Pareho silang migamit sa Pulong sa Dios. Apan gigamit Kini ni Satanas pinaagi og intelektuwal nga kahibalo, kita n’yo, usa ka intelektuwal nga kahibalo, ug wala gyud Kadto magpulos.

<sup>463</sup> Aduna pa ko’y usa ka Kasulatan dinhi. Makadisturbo ba kung basahon ko kini? [Nagaingon ang kongregasyon, “Dili.”—Ed.] Ablihan nato ang Mga Hebreohanon, sa ika-

4 nga kapitulo, sa gilayon, sa makadiyut lang. Gusto kong basahon kini. Maayo kaayo kini para kanako, dinhi mismo, sa Mga Hebreohanon 4. Ug ablihan nato sa Hebreohanon 4, ug magsugod, sa 1 hangtud 2.

*Busa mangahadlok kita, kay tingali unya, sanglit may saad nga gibilin... aron makasulod sa iyang kapahulayan, may kinsa kaninyo nga daw dili makakab-ut niini.*

*Kay sa pagkamatuod ginawali usab kanato ang maayong balita, ingon usab kanila: apan ang pulong nga hingdunggan wala nila pagpusli, tungod kay wala pagubani sa (kahibalo, kaalam ba?) pagtoo niadtong... sa pagtoo niadtong mga (unsa man?) nanagpakadungog.*

<sup>464</sup> Mahimo n'yong mabatonan ang tanang Pulong, mahimo n'yong mahibaloan ang Pulong gikan A hangtud Z, ug dili gyud gihapon Kini magpulos kaninyo. Nakakita na ba kamo og mga tawong gigamit ang Pulong ug ginapaningkamotan nga magpulos Kini, moingon, "Igsoon, himaya sa Dios"? Dili gayud Kini magpulos. Dili mo man gud puedeng binuangan ang Pulong. Dili, dili. Dili, dili. Bisan unsa pa ang ginapahayag ninyo, ginapamatud-an sa Pulong ang Kaugalingon Niini. Bisan unsa pa'y igapahayag ninyo, ang Pulong mismo ang magapamatuod. Husto kana.

<sup>465</sup> Karon, nasayod si Satanas sa Pulong. Hingsayran niya Kini gikan A hangtud Z. Bueno, kabalo ba mo? Mahunahuna ko, kung aduna siya'y digri, tingali'g moabot og upat o lima ka mga panid sa papel ang iyang mga titulo, "Dr., Rev., Elder, Ph., L.L., Q.D.," isulat n'yo na ang tanang alpabeto. Anaa pa gani siya'y digri sa Biblia. Nahibaloan niya ang matag Pulong Niini. Sigurado gayud. Kita n'yo? Busa, miingon si Satanas, "Karon, kahibalo ako sa Pulong." Kabalo ko nga hingsayran niya ang Pulong sa dihang miduol siya kaniadto kang Eva. Busa, nagkaaduna siya Niini pinaagi og intelektuwal nga kahibalo, apan wala gyud Kini nagpulos.

<sup>466</sup> Nasayod si Jesus Niini pinaagi og pagtoo, sa kapadayagan sa Pulong sa Dios nga anaa sa Iyaha Mismong gikatagana nang daan nga Kinabuhi. Himaya! Nagalaum ko nga mituhop gyud kini sa inyong kasingkasing. Nasayod gyud si Jesus kung Kinsa Siya. Si Satanas naman wala gyud kabalo. Nasayod si Jesus nga usa Siya ka predestinadong Binuhat sa Dios, nga ang Dios Mismo nadayag diha Kaniya. Dili Siya ang nagapamuhat sa maong mga buhat. Ang Amahan kadto nga mipuyo diha Kaniya. Amen.

<sup>467</sup> Pasagdi nga molupad ang yawa uban ang tanan niyang teolohiya. Si Jesus; nasayod pud si Satanas Niini. Hingsayran niya ang Pulong. Karon, mahimo gani niyang isulti ang Kasulatan nga walay tan-aw tan-aw, aba, mora gayud og Bibliang nagalakaw. Mahimo gyud niyang ilitok Kini nga sama

*niana*. [Paspas nga ginapapiti ni Igsoong Branham ang iyang tudlo sa pila ka mga higayon—Ed.] Kita n'yo?

<sup>468</sup> Apan nagpuyo lang sa gihapon si Jesus, kay nasayod man Siya kon asa Siya nagabarug. Nasayod Siya nga Siya ang predestinadong, “gipatay nga Cordero sa wala pa ang pagkatukod sa kalibutan.” Nasayod Siya nga Siya kanang maong Persona. Oh! Oh, igsoon! “Ang adunay igdulog, kinahanglan magpatalinghug.” Hingsayran na Niya nga Siya’y predestinado alang niana, ug sa ingon-anang paagi Niya nahibaloan ang Pulong. Kita n'yo? Ug namuhat Kadto. Sigurado.

<sup>469</sup> Nasayod usab si Satanas Niini pinaagi og kaalam. Apan napakyas lang. Gisulti pud niya ang mao rang Pulong nga gisulti ni Jesus, sa mao ra nga Biblia. Gisulti niya kadtong gikan sa Mga Salmo. “Magahatag Siya . . . Nahisulat na,” ingon si Satanas, “Siya magahatag og sugo sa Iyang mga Manulonda mahitungod Kanimo, kay tingali unya mahipangdol Mo ang Imong usa ka tiil sa bato. Pagasapnayon Ka nila.”

Miingon Siya, “Ug nahisulat usab kini . . .” Oh! Kita n'yo?

Nasayod si Satanas Niini pinaagi ra sa kahibalo.

<sup>470</sup> Apan nasayod gyud si Jesus Niini pinaagi og kasinatian. Nasayod Siya Niini pinaagi sa kapadayagan. Hingsayran Niya nga Siya mao ang Anak sa Dios nga moanhi sa kalibutan. Nasayod Siya sa Iyang ginabarugan. Hingsayran Niya nga gipakatawo Siya niining kalibutana alang niana nga katuyoan. Ug mao kana’y hinungdan nga makapamuhat ang Pulong sa Dios pinaagi Kaniya, tungod kay hingsayran man Niya kung unsa gayud Siya. Himaya! Nasabtan na ba ninyo kini? [Nagaingon ang kongregasyon, “Amen.”—Ed.] Hingsayran Niya kung unsa Siya.

<sup>471</sup> Si Satanas usab, luyo niini, nasayod pud siya kung unsa siya. Ug nasayod siya nga dili gyud niya magamit, ang iyang kaalam, sa Pulong, tungod kay ang Pulong mao man ang Dios. Nasabtan ba ninyo kini? [Nagaingon ang kongregasyon, “Amen.”—Ed.]

<sup>472</sup> Karon, kung nasayod si Jesus kon si Kinsa Siya . . . Usa Siya ka predestinadong Binuhat nga napailalum sa panahon. Nagatoo ba kamo niana? [Nagaingon ang kongregasyon, “Amen.”—Ed.] Si Jesus, ingon nga mao ang lawas, hingsayran Niya nga Siya mao ang predestinadong Pulong, ang Persona sa Dios nga magabarug niadtong adlaw, aron mamahimong Halad alang sa kasal-anan. Ug naila Niya ang Iyang kaaway. (Maingon sa gikawali ko na, pipila na ka Dominggo ang milabay.) Naila Niya ang Iyang kaaway; ug hingbaloan Niya kung si Kinsa Siya. Busa, nagtagbo kining duha ka dagkung puwersa, ang kahibalo ug pagtoo. Nasayod si Jesus kung si Kinsa Siya.

473 Nahibalooan ni Satanang ang Biblia sa ingon ka hanas nga sama ni Jesus, apan wala gihapon Kini magpulos kang Satanang. Kita n'yo?

474 Bisan unsa pa kadaghan nga kahibalo aduna kamo, dili kana magpulos. Karon, dalha kana ngadto niining pipila ka dagkung organisasyon. Hunahunaa ninyo kini, sa makadiyut. Moingon sila, "Bueno, aduna man kami'y Pulong." Ipakita n'yo kanako kung magapamuhay ba kana. Kamong mga Katoliko, ginaingon ninyo nga kamo ang orihinal. Tan-awon nato. Ipakita n'yo kanako ang inyong mga buhat, nga walay inyong... O, ipakita n'yo kanako ang inyong mga buhat, pinaagi sa, o, nga walay pagtoo ninyo, ug ipakita ko usab kaninyo ang mga buhat ko, pinaagi sa akong pagtoo. Kita n'yo? Tan-awa ninyo kung unsa gyu'y gisulti sa Pulong.

475 Mahimo ba kamong magtanum og binhi nga dili niini maipakita kung unsa kini, kung motubo na kini? Mahimo ba kamong magtanum og lugas sa mais unya dili magapamunga og mais, inig tubo na niini? Mahimo ba kamong magtanum og patatas unya dili magapamunga og patatas? Mahimo ba kamong magtanum og bulak unya dili diay magapamulak og mao ra nga matang sa bulak? Kita n'yo?

476 Kung ingon-ana, pag-naipugas na kaninyo, ug ang Binhi sa Dios anaa na sa inyong kasingkasing, igapamunga gayud Niini Kana. Miingon si Jesus, "Pagabuhaton niya ang Akong mga buhat, kung nagatoo siya Kanako." Kung ginaingon niya nga nagatoo siya Niini, ug ang mga niini wala naganunot kaniya, nan usa siya ka bakakon. "Ang nagatoo Kanako, ang mga buhat nga Akong ginabuhay pagabuhaton usab niya; gani mas labaw pa niini, kay Ako moadto sa Akong Amahan." Aba, lig-on Kini! Dili lang unta kini mopaingon sa digyas nga dapit ug mahulog, ngadto sa ibabaw sa usa ka bato sa kung asa man! Mangahulog unta sila didto sa walog aron nga dili Kini mapalid sa hangin, ug dili Kini pagadagiton sa mga langgam, aron motubo gyud Kini.

477 Tipigi Kini diha sa kinasuloran sa inyong kasingkasing. Miingon si David, "Sa akong kasingkasing ginatipigan ko ang Imong kasugoan," aron walay ni usa ka denominasyon ang makaagaw Niini, dili Kini mahimong dagiton sa mga langgam. "Ginatipigan ko Kini *dinhi*. Nagapalandong ako Niini, adlaw ug gabii. Nahisulat Kini sa mga poste sa akong higdaanan ug sa bisan asa. Anaa Kini kanako, nahigot Kini sa akong mga tudlo. Anaa Kini sa..."

478 Ug miingon si Jesus, "Ang imong ngalan anaa sa palad sa Akong kamot." Busa, unsaon, unsaon pa man sa paghikalimot niini? Dili gayud. Karon, bueno.

479 Kung ingon-ana, kung gibuntog na ni Jesus si Satanang pinaagi og pagtoo, nga nahibalo sa Iya Mismong Kaugalingon, ug ingon nga Siya usa ka predestinadong Binuhay. Andam na

ba mo? [Nagaingon ang kongregasyon, “Amen.”—Ed.] Unsa man usab karon ang mahitungod sa Pangasaw-onon ni Jesus Cristo nga gipili nang daan? Nagatoo ba kamo nga gipili nang daan ang Pangasaw-onon? [“Amen.”] Ang gipili nang daan nga Pangasaw-onon ni Cristo karon, ang Iglesia, ang Binhi nga Pulong, ug ang tanang gikasaad sa Dios nga igabutang sa Iglesia, anaa na Kini mismo karon. Anaa na Kini Niini karon. Nahan-ay na ang tanan. Gikahatag na ang Balaang Espiritu. Gipugas na ang Binhi. Nagahayag na ang pang-gabii nga mga Kahayag. Ang ilhanan sa Sodoma, nga gisaad ni Jesus, ania na gyud, ug ang Malaquias 4. Usa ka gipili nang daan nga Iglesia!

Oh, ang yawa!

<sup>480</sup> Iglesia sa buhi nga Dios, dinhi ug sa mga nagapaminaw sa teyp, usab, kahibalo ba mo kung asa kamo nagabarug? Nahibalo ba mo nga gitawag kamo sa Dios, nga nagahari na ang Espiritu Santo sa inyong kasingkasing, ug nga tinuod gayud ang matag Pulong sa Dios nganha kaninyo? [Nagaingon ang kongregasyon, “Amen.”—Ed.] Oh, igsoon! Unsaon pa man ni Satanas sa pagbarug batok niana? Unsaon man niya pagpahunong niana sa pagtubo? Unsaon man niya pagpahunong niana nga mga ilhanan sa pagnunot Niini? Aba, mahimo n’yo silang ibalibag sa bilangoan. Sila, kung mahimo n’yo man, dili ko igsapayan kung unsa ma’y ginabuhat ninyo, ug human na ninyong gisulayan nga buhaton kini. Nangadugta na gani sila sulod sa mga bilangoan. Gipakaon sila sa mga leon. Gipanaggabas sila. Gipanaghiwahiwa sila. Apan dili gyud ninyo mapatay Kini, oo, ang usa ka Iglesia nga gipili nang daan. “Kadtong Iyang mga giila nang daan,” sama sa gibuhat Niya kang Jesus, “Iyang gitawag. Kadtong Iyang mga gitawag, Iyang gimatarung. Ug kadtong Iyang mga gimatarung, Iyang gihimiya, gipili nang daan.”

<sup>481</sup> Ug karon, sa kaulahiang mga adlaw, napugas na ang matag binhi; anaa na ang tanan sa angay nga kahimtang niini, anaa na ang kalibutan sa angay nga kahimtang niini, husto na ang panahon, anaa na ang Iglesia sa kahan-ayan Niini, ang Binhi, ang pang-gabiing Kahayag, ang mga ilhanan nga sama sa Iyang giingon, “Maingon kaniadto sa mga adlaw sa Sodoma.” Ang usa ka Manulonda sa Dios, ang Balaang Espiritu, nga ania na mikanaug, nagapanglihok, nagapamuhat sa mga ilhanan nga gibuhat Niya kaniadto. Si Malaquias 4 nga gisaad Niyang igapadala Niya, sa kaulahiang mga adlaw, Iya kangang gisaad. Ug makita na nato ang tanan niana karon mismo. Asa? Asa man? [Nagaingon ang kongregasyon, “Amen.”—Ed.]

Amen. Amen. Amen. Amen. Amen.

Gihigugma n’yo ba Siya? Amen.

<sup>482</sup> Sigurado, dinhi mismo sa kaulahiang mga adlaw, ang usa ka gipili nang daan nga Iglesia, nanghibalo gayud kung asa

silang nagabarug, nga gipugasan og Binhi, ang Balaang Espiritu sa Iglesia.

Satanas, bantay ka.

<sup>483</sup> Unsa ma'y nahitabo? Kadiyut na lang. Unsa ma'y nahitabo, sa tanang butang nga gikasaad Niini, bisan ang mga saad bahin sa Malaquias 4?

<sup>484</sup> Unsa—unsa ma'y gibuhath ni Satanang kaniadtong nahinagbo niya si Jesus? Milupad siya ngadto Kaniya, uban ang tanan niyang eklesiastikal nga puwersa. “Nahibalo man ako sa Pulong, usab,” ug milupad siya ngadto Kaniya. Kadtong denominasyonhong abog nga aduna siya! Gilitok nato Kini ngadto kaniya; apan wala gyud siya og unsa man nga Kahayag. Mikalagiw gayud siya! Mas abtik pa siyang mikalagiw kay sa niadtong milupad siya. Ngano man? Mitugpa man siya niadtong usa ka gatus ka bilyon nga boltahe sa Kabli didto. Nasunog ang iyang mga balhibo. Mikalagiw gyud siya palayo Kaniya. Mipahawa gayud siya gikan Kaniya, tungod kay kadtong maong Kabli aduna ma'y boltahe Kadto.

<sup>485</sup> Hinumdumi ninyo, nga adunay kabli si Satanang, usab. Apan, bisan unsa pa ka nindot sa tumbaga sa maong kabli, ug wala gihapon og kuryente sa sulod niana, patay kana. Dili kana magamit. Bisan parehas ra nga kabli.

<sup>486</sup> Ang usa niini nagakuha og enerhiya gikan sa Dynamo, ug ang laing usa pa wala'y koneksyon, man lang, Husto kana. Mao kana'y hinungdan nga moandar lang Kini diha sa usa ka gipili nang daan nga sudlanan. Mao kana'y hinungdan nga moandar lamang ang Pulong sa kung asa Kini angay nakakonekta. Angay'ng nakakonekta sa asa, sa denominasyon ba? Dili, sir. Usa kana ka patay nga saksakanan, “Adunay dagway sa pagkadiosnon, apan ginapanghimakak ang gahum niini.” Apan pag-nakakonekta sa Pulong, nga dili gayud mahanaw, makapamunga kini og mao rang gahum nga aduna Kaniya. Dinha kini angay'ng nakakonekta. Himaya!

Amen. Amen.

Gihigugma ba ninyo Siya? [Nagaingon ang kongregasyon, “Amen.”—Ed.] Alagaron ba ninyo Siya? [“Amen.”] Amen. Sigurado.

<sup>487</sup> Dili nga nakakonekta sa kung unsa man nga organisasyon, kondili nakakonekta gyud ngadto sa—sa—sa—sa Dynamo dinhi. Igsoon, sultihan ta ka, nagaandar mismo Kini, tungod kay nakakonekta man Kini, sa mao ra nga Pulong.

<sup>488</sup> Nakakonekta man ang Moab, usab; ug ang Israel, pud. Apan ang Moab wala na'y lain kondili usa ra ka pundok sa patay nga mga kredo ug mini nga propeta.

<sup>489</sup> Apan ang Israel aduna gayu'y usa ka gibunalan nga bato, usa ka tumbaga nga serpente, usa ka Haligi nga Kalayo,



alleluyah, mga ilhanan nga iya sa buhi nga Dios. Amen. Eksakto gayud. Nagpulos Kadto. Nganon man? Nakakonekta man Kadto sa pagtoo. Oo, sir. Dili sa kahibalo, dili sa kung unsa nga kredo sa tawo; kondili sa pagtoo ngadto sa Pulong, sa Pulong Mismo. Nagagikan ang Kinabuhi sa Pulong. “Ang Akong Pulong Kinabuhi.” Nagagikan kadto nga kuryente sa Pulong.

<sup>490</sup> Mikalagiw si Satanas, sa gilayon. Wala gyud magpulos ang iyang teolohikanhong abog didto. Walay kuryente ang kabli ni Satanas. Patay man gud kadto nga mga kredo. Wala. Wala gayu’y kuryente.

<sup>491</sup> Karon, kita n’yo, mao ra man unta nga kabli. Gigamit ni Jesus ang Pulong sa Amahan; gigamit usab ni Satanas ang Pulong sa Amahan. Si Satanas mao’y Satanas. Si Jesus mao ang Dios, mao kana ang kalainan, mao kana ang Tinuod. Ang usa kredo, ug ang laing Usa mao ang Pulong. Ang usa Tinuod, ug ang laing usa mini. Ang usa makapamunga niini; ang laing usa usab dili makapamunga niini. Nasabtan ba ninyo kini? [Nagaingon ang kongregasyon, “Amen.”—Ed.] Parehas ra nga matang sa kabli, ha, husto kana, parehas ra nga mga kabli. Mga Hebreohanon 2, bag-ohay lang natong. . . O, Hebreohanon 4:2, bag-ohay lang natong nahisgotan kini. Kita n’yo? Sama sa, denominasyonhong, sama sa ginaingon sa mga denominasyon, pinaagi og kaalam. Kita n’yo? Ang mga denominasyon, pinaagi og kaalam, ginaingon nila kini, “Milabay na ang mga adlaw sa kuryente.”

Gihigugma ba ninyo Siya? Amen.

Alagaron ba ninyo Siya? Amen.

Ginatooan ba ninyo Siya? Amen.

Amen. Amen.

Ginatooan ko Siya. Oo, sir. Ang *Amen* nagakahulogan og “hinaut unta.”

<sup>492</sup> Ginoo, akong pag-ampo, karong buntaga, kuhaa ang matag magtotoo dinhi, ug biraha siya ngadto sa maong kuryente. Oh! Butangi siya og Kinabuhi, tugoti nga makahagong siya ug maidan-ag niya ang himaya sa Dios. Oo, sir. Ipaandar ang kuryente.

<sup>493</sup> Kahibalo ba mo kung unsay ginatooan ko? Gipugas na ang Binhi (Nagatoo ba kamo niana?) [Nagaingon ang kongregasyon, “Amen.”—Ed.] alang nianang halangdong Iglesia. Sama ra sa mga kabli nga napahimutang na sa tibuok bilding, ang matag suksokanan gisulayan na pinaagi sa Pulong, oh, grabe, gisulayan na pinaagi sa Pulong ang matag saksokanan. “Ayaw kamo paghikurat sa magasilaob nga kalisdanan nga magaabot. Kini aron sa pagsulay kaninyo.”

<sup>494</sup> Kung aduna ma’y gamay’ng sayup sa pagkakonekta sa kabli dinha, mo-ground gyud kini, ug mobuto ang tibuok switch. Dili gusto ang Dios og ingon-niana sa Iyang Iglesia. Kinahanglan

nga walay mangbuto nga switch ug walay mangbuto nga fuse sa niining kaulahiing mga adlaw. Wala, sir.

<sup>495</sup> Mobalik Siya ug soldahon kini dinha mismo. Oo, sir. Bueno. Naplastar na ang matag suga sa puwesto niini. Ang bugtong butang, na lang nga ginahulat mao ang pagbalik sa Ginoo aron pagabuksan ang switch. Husto kana. Oo, sir. Sa Pulong! Sigurado. Mamahimong karon na mismo, igsoon. Kung nagkinahanglan ka og kaayohan, pindota lang ang maong switch. Mao lang gyud kana ang kinahanglan mong buhaton, kung aduna man ka'y husto nga kabli. Kung mo-ground ang. . . "Kung naga-ground man ang linya sa imong kuryente, ug ang mga koneksyon, usab, nangawala sa pagkakonekta kang Jesus, sultihan ta ka kung unsay pagabuhaton." Amen. Husto kana.

<sup>496</sup> Karon, moingon ang denominasyonhong kaalam, "Milabay na ang mga adlaw sa milagro." Kung ingon-ana wala'y kuryente sa maong mga kabli.

<sup>497</sup> Apan nasayod ang pagtoo sa mas maayo. Mabati nila kini. Makita nila nga nagapamuhat kini. Nasayod sila nga nagasiga kini. Nasayod sila kung unsay ginabuhat niini. Ang pagtoo mao ang kuryente, mao gayud ang kuryente, ang Espiritu.

Ug ang kaalam usab mao ang denominasyonhong mga porma.

<sup>498</sup> Gisulayan ni Satanas kaniadto nga tintalon si Jesus, aron mosimang sa Pulong sa Amahan. Ania ang kung unsay gibuhay niya. Gisulayan niyang ipakita Kaniya ang iyang bantugan, dagkung eklesiastikanhong mga organisasyon sa yuta. Apan wala gayud niya natintal Siya. "Umari ka ug magpahisakup kanako. Himoon ko ikaw'ng obispo nga labaw pa kanilang tanan."

<sup>499</sup> "Nahisulat na. . ." ang ingon ni Jesus. Oo, sir. Dili gayud Siya matintal ni Satanas. Dili, sir. Mas labaw pa Siya niana. Ug, si Jesus mao ang Pulong. Aduna Siya'y pagtoo sa pagpakahibalo sa Iyang Kaugalingon mismo, nga Siya mao ang Pulong.

<sup>500</sup> Sama ni Moises. Aba, nasayod gyud si Moises kaniadto kung si kinsa siya. Nasayod si Moises nga alagad siya sa Dios, hingsayran niya nga gitawag siya sa Dios. Nasayod siya kung unsay pagabuhaton niya. Mao kana'y hinungdan nga wala siya nahadlok sa kung unsay gisulti ni Satanas. Gisulayan siyang tintalon ni Satanas, gihadlok siya aron mapasimang niini. Apan, wala gayud. Nasayod si Moises kung asa siya nagabarug. Husto kana.

Karon kinahanglan ko nang dalion. Molaktaw na ko og, daghang mga panid, dinhi.

<sup>501</sup> Si Pablo. Gusto kong hisgotan ang usa ka butang dinhi, sa dili pa ang pagtapos. Giklaro ni Pablo kaniadto ngadto sa iyang bahin nga Pangasaw-onon nga igapresentar niya. May

bahin sa Pangasaw-onon nga igapresentar ni Pablo. Nagatoo ba kamo niana? [Nagaingon ang kongregasyon, “Amen.”—Ed.] Giklaro ni Pablo ngadto sa iyang bahin nga Pangasaw-onon nga igapresentar niya kang Jesus Cristo sa kaulahiing mga adlaw, ang mahitungod sa kaalam o pagtoo.

<sup>502</sup> Mobasa lang kita og diyutay. Gusto kong ablihan ninyo sa Unang Mga Taga-Corinto, sa ika-4 nga kapitulo. Unang Mga Taga-Corinto, sa ika-4 nga kapitulo, basahon nato kini. Ug magatapos na kita sa—sa pipila ka gutlo na lang, kon itugot sa Ginoo. Unang Mga Taga-Corinto, sa ika-4 nga kapitulo, ug gusto kong basahon ang ika-18 hangtud sa ika-20 nga bersekulo. Sige. Ania na.

*Ang uban kaninyo diha nanagpaburot kaayo sa ilang kaugalingon, nga daw—nga daw dili ako moanha diha kaninyo.*

*Apan ako moanha diha kaninyo sa dili madugay, kon itugot man sa Ginoo, ug unya ako nang masuta, dili ang sinultihan sa bisan kinsa niining maong mga tigpaburot, kondili ang ilang gahum.*

<sup>503</sup> Kabalo mo, gikinahanglan...Karon, mao kadto ang iglesiang Romano nga misugod na sa pagtipas, niadtong panahon mismo, misugod na sa pagbiya. Kita n'yo? Hingsayran niya...Kabalo na mo, miingon ang Biblia, “Nanghawa sila gikan kanato, tungod kay dili man sila ato,” nakita n'yo. Husto kana.

*Kay ang gingharian sa Dios wala diha sa pulong, kondili anaa sa gahum.*

<sup>504</sup> Kita n'yo, “Wala diha sa Pulong.” Moingon, “Bueno, ako, edukado ako, igsoon. Mas daghan ako og edukasyon kay sa nabatongan mo. Ako—usa ako ka pari. Ako...” Wala gyud kana'y ni usa ka kahilambigitan Niini. Wala kana nagapalahi kanimo kung ikaw usa ra ka “baboy,” o unsa man; kita n'yo, kita n'yo, wala gyud kana'y unsa man nga kahilambigitan Niini. Kita n'yo? Daghan man kaayo og kahibalo ang yawa, usab. Kita n'yo? Bueno. Kita n'yo?

*Kay ang gingharian sa Dios dili...pulong, kondili... gahum. Kita n'yo?*

*Unsa ba ang buot ninyo kung ingon-ana? moanha ba ako kaninyo nga may puspus, o sa gugma, o sa... espiritu sa kaaghup?*

<sup>505</sup> Karon, sa ika-2 nga kapitulo. Gusto kong humanon kini, sa makadiyut na, lang, sa dili pa kita matapos. Sa ika-2 nga kapitulo; mobalhin kita sa laing panid. Sugdan nato dinhi mismo sa ika-1. Karon tan-awa ninyo, si Pablo, kung unsay ginaingon niya sa Pangasaw-onon karon. Igapresentar niya kini nga bahin sa Pangasaw-onon ngadto kang Cristo, ug buut niya

nga mahibalo sila. Karon, hinumdumi ninyo, adunay sa kung unsa nga matang sa kahibalo si Pablo. Utokan siya, nagkaaduna siya niana, apan kinahanglan niyang “hikalimtan kini,” ingon niya. Aduna siya’y tanan na nga matang sa mga digri ug edukasyon, apan gikinahanglan gyud niyang hikalimtan kadto, karon, tan-awa, aron nga maila niya si Cristo.

*Ug ako, mga igsoon, sa pag-anha ko kaninyo, mianha, wala ako moanha nga may mahapsay nga pagpamulong o kaalam. Kita n’yo? Wala ako mianha nga adunay kaalam, sa pagmantala kaninyo sa pagpamatuod sa Dios.*

506 “Ako si Dr. *Ingon-ani-ug-ingon-ana*, ug anaa na kanako ang tanan. Ako. . . Gikatudloan kami sa mga seminaryo, ug *ingon-ani-ug-ingon-ana*”? Dili, dili. Ang ingon ni Pablo, “Wala ako mianha kaninyo nga ingon-niana, nga adunay kaalam.” Karon, ug unsa ma’y. . .

Unsa man kining teksto ko? *Kaalam Batok Pagtoo*. Kita n’yo?

507 “Wala ako mianha kaninyo sa kaalam,” ingon ni Pablo, “nga nagamantala kaninyo sa pagpamatuod sa Dios pinaagi og kaalam, nga nagaingon, ‘Karon tan-awa ninyo. Sultihan ko kamo. Nakat-onan namo sa seminaryo nga milabay na ang mga adlaw sa milagro. Nakat-onan namo sa seminaryo nga dili man gyud *Ingon-niini* ang ginapasabot niining mga butanga.” Ang ingon niya, “Wala ako mianha nga sama niana, mga igsoon.” Karon unsa man gyu’y gisulti niya?

*Kay gituyo ko ang dili pagkahibalo sa bisan unsa nga anaa kaninyo, gawas kang Jesus. . . ug kaniya nga gilansang sa krus.*

*Ug (kung) ako uban kaninyo sa kaluya, ug sa kahadlok, ug sa dakung kasakitan ako nakig-uban kaninyo.*

*Ug ang akong pulong ug ang akong pagwali wala sa mga madanihong pulong sa kaalam sa tawo, . . .*

508 Huh? Sama sa giingon ni Booth Clibborn, “Ayo?” Si kinsa ba ang nagapanuktok?

Wala ako mianha kaninyo nga adunay pang-seminaryong *kaalam*, kondili sa *pagpadayag sa Espiritu ug sa gahum*:

*Aron ang inyong (p-a-g-t-o-o) pagtoo dili ikapatukod diha sa kaalam sa mga tawo, kondili diha sa gahum sa Dios.*

509 [Nagataghoy si Igsoong Branham—Ed.] “Whew!” Amen. Nagatoo ba kamo niini? [Nagaingon ang kongregasyon, “Amen.”]

*Aron ang inyong pagtoo dili ikapatukod diha sa kaalam sa kung unsa nga organisasyon, kondili diha sa gahum sa Dios.*

510 Pagtoo diha sa gahum sa Dios! Ang inyong mga paglaum dili . . .

511 Nagsangka na kining duha ka kakuhaan sukad pa kaniadto sa Eden; ang pagtoo sa Dios batok sa kaalam ni Satanas. Gipanghimatud-an na sa Dios, sa tanang mga kapanahonan, nga dili Kini puedeng mosagol. Kinahanglan nga nahimulag gyud Kini, aron motubo.

512 Karon, sa pagdali, mobasa lang ako og—og usa o duha ka pulong, bahin sa matag usa niini, hisgotan ko lang ang pipila ka mga butang nga naisulat ko dinhi.

513 Usa ka hingpit nga tipo si Esau ug si Jacob: pareho silang, relihiyoso; silang duha, kaluha.

514 Si Esau mao ang eklesiastikanhong tipo. Usa siya ka tawo nga maantigo. Aduna—aduna siya’y maayong baruganan sa moralidad ug mga butang nga ingon-ana, apan para kaniya wala niya kinahaglana ang pagkapanganay.

515 Si Jacob usab dili niya igsapayan kung unsa ma’y buhaton niya, aron lang maangkon niya ang pagkapanganay. Ug samtang nga kauban pa sila, dili gyud sila makapamunga. Husto ba? Batok man gud ang usa ngadto sa usa pa.

516 Nasabtan n’yo ba kini? [Nagaingon ang kongregasyon, “Amen.”—Ed.] Amen. “Panggula kamo gikan niini. Magpalain kamo,” ang ingon sa Dios. “Ug ayaw na kamo paghikap sa ilang mga butang nga mahugaw. Pagahinangpon Ko kamo.” Kita n’yo?

517 Kinahanglan nga ihimulag ni Jacob ang iyang kaugalingon gikan sa denominasyonhon niyang igsoon ayha siya pagapanalanganin sa Dios. Gisultihan usab sa Dios si Abraham kaniadto sa mao rang butang.

Israel; ug Moab.

518 Mibarug ang upat ka gatus ka mga propeta sa Israel sa atubangan ni Micheas kaniadto. Ug gihimulag ni Micheas ang iyang kaugalingon gikan kanila, ug gidawat ang Pulong sa Ginoo, ug Dinha midapig.

519 Si Moises, ug si Korah, mao ra gihapon, dili puede nga mag-uban. Kinahanglan nilang magbulag. Tinuod ba kana? [Nagaingon ang kongregasyon, “Amen.”—Ed.]

520 Si Abraham; ug si Lot usab. Usa ka relihiyosong tawo si Lot, tipo sa usa ka pormal nga iglesia. Apan samtang nakig-uban si Abraham kang Lot, ngani mipanaw siya nga kauban kini sulod sa pipila ka mga tuig. Apan Iyang . . . dili siya pagapanalanganin sa Dios hangtud nga bug-os siyang motuman Kaniya ug ihimulag

ang iyang kaugalingon gikan kang Lot, ang denominasyonhong iglesia. Dayon, sa diha nga gihimulag na ni Abraham ang iyang kaugalingon ug mibiya didto, aron molakaw nga mag-inusara, miingon ang Dios, “Karon, Abraham, tumindog ka. Tan-aw sa sidlakan, kasadpan, amihanan, habagatan.” Miingon, “Imoha kana tanan.” Apan wala Niya gibuhat kadto hangtud nga bug-os na ni Abraham gihimulag ang iyang kaugalingon. Husto gayud kana.

<sup>521</sup> Dili mahimong panalanginan sa Dios kaniadto si Seth hangtud nga gipahimulag Niya siya gikan kang Cain. Gimarkahan Niya si Cain ug gipaadto siya ngadto sa yuta sa Nod. Ug si Cain, pinaagi sa iyang maantigo nga kaalam, nahimong siyentista ug tanang uban pa, nagpatungha og ingon-anang mga bunga. Ug si Seth, tungod sa iyang pagkamatarung, ug gugma ug pagtoo sa Pulong sa Dios, nagpatungha siya og bunga nga namunga og usa ka propeta nga nagpasidaan sa kaulahiya adlaw, husto kana, nagluwas sa matag magtotoo. Ug gilaglag sa kaalam ang matag usa kanila kaniadto. Sila, tanan sila, nangamatay. Ang matag usa, bisan unsa pa kadaghan sa mga digri og sikolohiya ang nabatonan nila, ug uban pa, nangamatay sila sa mga paghukom sa Dios.

<sup>522</sup> Ug ang tanan nga gawas sa tinuod, nga natawo na pag-usab sa Espiritu sa Dios, nga nagatoo sa matag Pulong Niini ug nagabarug mismo Niini, mangamatay gayud sa mga paghukom sa Dios. Makita ninyo kining gagmay’ng mga tigpakiaykiay nga nagalakaw sa dalan, ug ang tanan niining unsa na lang nga ginapangbuhat, ug mga nagapatuyang nga sama niana, timani ninyo, mga wala kana’y lain kondili kahimanan lamang alang sa paghukom. Madugta ra kana. Madugta gayud. Gikatagana na gyud kana nga madugta. Mga kababayen-an, pagmata na kamo.

<sup>523</sup> Aduna ko’y gamay’ng testimonyo, apan wala na man ko’y panahon aron isulti kini, mahatungod sa usa ka batan-ong babaye dinhi dili pa lang dugay, sa California. Nagadrayb ako kaniadto, nagahulat nga matawag ngadto sa tolda. Aduna ko’y nalabyan didto, nga usa ka gamay’ng. . . Kadto—makauulaw gyud kadto. Sa walay pagduhaduha, usa gayud ka maanyag nga batan-ong babaye. Ug nagalakaw-lakaw siya didto, nga nagakiaykiay, nagasul-ob og gamay’ng kalo nga pang-cowboy, naka-botas ug adunay mga borlas, ug nagakiaykiay diha sa dalan. Nagapanaghoy kaniya ang matag lalaki, ug nagapangamay, silang tanan nga ingon niana.

<sup>524</sup> Naghunahuna ko, “Tingali’g angay lang nga mohunong usa’ ako, tungod usa man ako ka magwawali. Kung kauban ko lang si Meda niadto, gusto kong buhaton kadto. Ingon, “Tan-awa, igsoon, gusto kong sultihan ikaw og usa ka butang. Mahimong maanyag gayud ikaw. Mapamatud-an mo man kana. Kita mo? Mahimo mong mapahunong ang mga sakyanan, ug mokiaykiay dinhi, ug managhoy ang mga lalaki nga mora’g

mga lobo, bisan unsa na lang. Apan usa sa niining mga adlaw, kanang imong lawas, pagakamangan kana og mga insekto ug mga ulod ug pagaut-oton kana. Ug tingali'g sulod sa unom ka semana gikan karon mamaingon niana na kana, nagakadugta, nga napahimutang na didto sa lubnganan. Apan kanang kalag nga anaa sa sulod mo, nga gilamian sa nianang kailibgon, magkinabuhi kana sa impiyerno sa yawa sulod—sulod sa daghang mga kapanahonan nga umalabot.”

<sup>525</sup> Si Moises; ug si Korah. Si Lot; ug si Abraham. Si Juan Bautista; ug ang mga maniningil sa buhis. Si Jesus; ug ang denominasyong mga iglesia sa Iyang mga adlaw. Kita n'yo? Pagtoo; kaalam.

Bueno, mahimong manindog ang mga sacerdote kaniadto, moingon, “Kami. . .”

Ingon Siya, “Oo.”

“Aduna kami og *ingon-ani*. Oh, ang among ginikanan, gibuhat namo ang *ingon-ani-ug-ingon-ana*.”

<sup>526</sup> Miingon, “Oo. Kamo, tungod sa inyong mga tradisyon, inyong gipaka-walay pulos ang mga kasugoan sa Dios, gipaka-Doktrina sa inyong pagpanudlo ang mga kalagdaan nga hinimo sa tawo.”

<sup>527</sup> Nanag-ingon kini, “Bueno, si kinsa Ka man, aron tudloan kami? Sa unsang tulonghaan Ka man gikan?”

<sup>528</sup> Ingon Siya, “Ang mga buhat nga Akong ginabuhat, nagapamatuod Kanako. Kung wala Ko ginabuhat ang mga buhat sa Mesias, nan ayaw Ako toohi. Ug kung ginabuhat Ko ang mga buhat sa Mesias, nan mahibaloan ninyo, toohi ninyo ang maong mga buhat.” Ingon pa, “Sila ang nagapamatuod Kanako. Kung wala Ko man ginabuhat ang mga buhat, nan ayaw kini toohi.”

<sup>529</sup> Aduna na'y ingon-niadto nga mga denominasyon, usab, didto kaniadto, nga dala-dala ang ilang kaalam. Si Jesus usab aduna og pagtoo. Pagtoo sa unsa? Sa kung unsa gayud Siya; Anak sa Dios. Kita n'yo? Bueno.

<sup>530</sup> Si San Martin; sa iglesiang Romano, sa mga adlaw sa repormasyon kaniadto. Apan ang buot kong ipasabot nga kaniadtong, sila, kaniadtong wala pa sila napaingon sa paganong Roma, kaniadtong misugod na kining nahimong iglesiang Romano. Mibarug si Martin didto ug nagprotesta sa dogma sa iglesiang Katoliko; nagbuhat og mga ilhanan, ug mga katingalahan, ug mga milagro. Ug—ug ang iyang mga iglesia, silang tanan, nanagsulti og laing mga dila, ug nanagpropesiya, ug dagkung mga butang. Ug anaa kaniya ang gahum sa Dios. Gibanhaw niya ang mga patay ug giayo ang mga masakiton, ug tanang uban pa. Ug atua ang iglesiang Katoliko didto, nagprotesta kaniya nga ingon-ana, ug naninguha gayud nga

sunogon siya, ug bisan unsa na lang. Unsa man kadto? Kaalam; pagtoo. Pareho ra sa karon.

<sup>531</sup> Paminawon nato ang pinakapurong-purong nga bahin sa tanan niini. Zacarias 4:6 kon diin ako magatapos, dinhi mismo. Miingon ang Biblia, “Dili pinaagi sa gahum, dili pinaagi sa kusog, kondili pinaagi sa Akong Espiritu, miingon ang Ginoo. Dili pinaagi sa kaalam, dili pinaagi sa kahibalo, dili pinaagi sa denominasyon, kondili pinaagi sa Akong Espiritu Akong (unsa man?) hataga’g-gahum ang Akong Pulong.” Gipugas Kini ngadto sa mga tinun-an, dayon miabot ang Espiritu aron hataga’g-gahum ang Pulong. Kita n’yo? “Dili pinaagi sa gahum, dili pinaagi sa kusog, dili pinaagi sa kaalam, dili pinaagi sa salabutan, dili pinaagi sa *ingon-ani*, dili pinaagi sa *ingon-ana*, kondili pinaagi sa Akong Espiritu pagahatagan Ko og gahum ang Akong Pulong. Pinaagi sa Akong Espiritu, miingon ang Ginoo.” Ang Tubig sa Pulong sa pagtoo ang maoy nagahatag og gahum sa Pulong sa Dios ug nagapalihok Niini.

<sup>532</sup> Unsa kaha ang modaug? Daw sa, pagka-karon, siyempre, mora’g kaalam ang magpulos. Apan, dili. Dili gayud.

<sup>533</sup> Daw sa, pagka-karon, nga ang gamay’ng Iglesia nga nagatoo sa tibuok nga Pulong sa Dios ang mao’y—mao’y anaa sa minorya. Apan ayaw kamo pagkabalaka. Miingon ang Biblia, “Ayaw’g kahadlok, diyutay’ng Panon. Sa maayong kabubut-on kini sa inyong Amahan nga igahatag kaninyo ang Ginghamarian.” Uh-huh. Husto kana. Kita n’yo? Ug ayaw kamo kahadlok. Magpabilin lang sa pagtoo. Magpabilin gayud sa Pulong. Ayaw ninyo pagbiya-i ang Pulong. Pagpabilin diha mismo sa Pulong.

Gihigugma ba ninyo Siya? Amen.

Alagaron ba ninyo Siya? Amen.

Toohan ba ninyo Siya? Amen.

Amen. Amen.

Kantahon nato kini.

Gihigugma ba ninyo Siya? [Nagaingon ang kongregasyon, “Amen.”—Ed.]

Alagaron ba ninyo Siya? Amen.

Ginatoohan ba ninyo Siya? Amen.

Amen. Amen.

Gihigugma ba ninyo Siya? Amen.

Alagaron ba ninyo Siya? Amen.

Toohan ba ninyo Siya? Amen.

Amen. Amen.

<sup>534</sup> Oh, gihigugma ko Siya! Dili ba kamo man usab? [Nagaingon ang kongregasyon, “Amen.”—Ed.] Unsa man kini? Pinaagi sa pagtoo, dili pinaagi sa kaalam! “Pinaagi sa pagtoo naluwas kita.” Husto ba kana? [“Amen.”] “Dili pinaagi sa kaalam, dili pinaagi sa kahibalo; pinaagi sa Akong Espiritu, miingon ang Ginoo.”



<sup>535</sup> Karon tugoti nga motuhop ang mga Niini sa kinasuloran sa Iglesia. Kanang tumbaga nga kabli, mao kana ang tigdala sa kuryente. Karon, ang aluminum nga kabli dili kana tigdala sa kuryente. Kita n'yo? Dili gayud. Dili. Dili tigdala sa kuryente ang usa ka gomang tubo; usa ra kana ka igpuputos sa kuryente. Usa pud ka igpuputos sa elektrisidad ang kahoy. Ngani dili nato gusto og unsa man nga mga pagputos sa elektirisidad. Daghan na kaayo 'ta og ingon-ana karon, ug nga nagapahinungdan og pagbulagbulag. Busa atong—ang gusto nato... Gusto nato og mga tigdala sa kuryente, natawo na pag-usab nga mga kalalaken-an ug mga kababayan-an nga nagatoo sa Pulong sa Dios.

<sup>536</sup> Karon, unsa ma'y giingon sa Dynamo? "Pangayo kamo sa Amahan og bisan unsa sa Akong Ngalan, pagabuhaton Ko kini."

<sup>537</sup> Ug unsa ma'y buhaton ninyo? Mosaksak dinha. Amen. Husto ba? [Nagaingon ang kongregasyon, "Amen."—Ed.] Isaksak lang, mao lang kana ang kinahanglan n'yong buhaton, ug magalatay na ang kuryente dinha mismo sa linya.

<sup>538</sup> Unsa ma'y mahitabo? Mosugod na nga motubo ang Pulong. "Ug siya mahisama sa kahoy nga natanum sa daplin sa kasapaan sa tubig; ang iyang mga dahon usab dili malaya; bisan unsa nga ginabuhat niya magamauswagon. Dili ingon-niana ang mga dautan."

<sup>539</sup> "Dili ingon-niana ang dautan." Karon, dili ingon nga, "ang makasasala," ha. "Ang dautan," kita n'yo, mao kana ang nagapamahayag, ug dautan man diay Niini, nakita n'yo. Husto kana. "Dili ingon-niana ang dautan. Dili sila mahimong motindog sa paghukom nga kauban ang mga matarung." Dili, sir. Dili gayud mahimo.

<sup>540</sup> Busa, miabot na ang panahon. Napugas na ang Binhi, gani, kadtong mga gipili nang daan. "Pagkapinili nang daan" mao lang kana ang bugtong paagi dinha. Mahimo kong ablihan ang Pinadayag 12, karon mismo, ug 13, ug pamatud-an kana kaninyo, nga kadto lamang mga gipili nang daan. Miingon ang Biblia, nga, "Kining anticristo nga moabotay sa kalibutan pagalimbongan ang tanan," (tanan), "ang tanan nga anaa ibabaw sa yuta, pinaagi niining mga denominasyon ug mga kredo. Pagalimbongan niya ang tanan nga anaa ibabaw sa yuta, ang matag usa kanila, gawas lang niadtong mga gipili nang daan sa wala pa ang pagkatukod sa kalibutan." Busa, igsoon, wala ka na gyu'y mahimo bahin niini. Pagsinggit lang og, "Amen." [Nagaingon ang kongregasyon, "Amen."—Ed.] Oh, grabe! Gusto ko kaayo kana. Oo, sir.

Gihigugma ba ninyo Siya? Amen.  
 Alagaron ba ninyo Siya? Amen.  
 Ginatooan ba ninyo Siya? Amen.  
 Amen. Amen.

541 Buut ko nga ipraktis ninyo kana og diyutay dinhi, kamong tanan. Gusto ko kana nga kanta. Dili ba kamo man usab? [Nagaingon ang kongregasyon, "Amen."—Ed.] Didto sa Phoenix, mao kana nga awit ang gisige namo og kanta sa panagtigum didto. Oh! Gusto ko kaayo kana. Gusto ko gyud kana. Kantahon nato kini pag-usab.

Gihigugma ba ninyo Siya? Amen.  
 Alagaron ba ninyo Siya? Amen.  
 Toohan ba ninyo Siya? Amen.  
 Amen. Amen.

542 Bueno, mahimo ra n'yong ipadayon ang pagkanta niana, kabalo mo. "Simbahon ba ninyo Siya?" Ug nagapadayon lang gyud silang tanan sa pagkanta, sa sige-sige. My! Nasugdan namo kana didto sa Phoenix; gusto gyud kaayo namo ang maong kanta. Oo, sir. "Amen. Amen. Amen."

Nakasaksak na ba kamo karong buntaga?  
 Amen.  
 Pislita ang switch. Amen.  
 Anaa na kaninyo ang kuryente. Amen.  
 Amen. Amen.  
 Karon motubo na Kini. Amen.  
 Magapamunga na. Amen.  
 Igapakita ra ninyo Kini. Amen.  
 Amen. Amen.


543 Oh, dili ba pagkaanindot niana? [Nagaingon ang kongregasyon, "Amen."—Ed.] Amen. Pagkaanindot gayud. Pasaylo-a ko kung napadugay ko kamong tanan dinhi, nga ingon na niining orasa, apan nalipay lang gyud ko og ayo, ako mismo, pagkaanindot gayud nga higayon. Bueno.

Pagkasunod Dominggo, diay, sa tanan nga ania . . .

544 Karon, karon moadto ako didto kang Igsoong Littlefield, aron magpaambit og diyutay'ng Pulong, tingali'g dalhon ra nako ang pipila niining Pulong dinhi ug igapugas Kini didto sa taliwala nila, sa church of God, nga sama niini dinhi. Ug tingali'g maghisgot lang ko didto bahin sa usa ka butang nga nahisgotan ko na dinhi. Siyempre, ginadapit kamo sa pagtambong didto. Apan gamay lang gayud ang simbahan nila didto, nga mosigo lang og kinse ka gatus. Bag-ohay ko lang gihalad kadto, ug mga pipila pa lang ka tuig ang milabay. Siguro magkaguot na gyud didto. Apan nagsaad na ako kang Igsoong Littlefield. Usa siya ka bililhon nga igsoon. Ug angay lang nga tumanon sa usa ka tawo ang iyang saad kung mahimo niya. Kon itugot sa Ginoo, moadto gyud ko didto.

545 Aduna gihapon og panimbahon dinhi sa tabernakulo. Kamo nga mga nagapanambong dinhi mismo sa tabernakulo, nga haduol lang dinhi ug unsa man, ug makahimo ra sa pag-anhi. Panganhi lang kamo.

<sup>546</sup> Ug dayon, sa sunod nga Domingo, hinumdumi ninyo, moanhi dinhi si Igsoong Arganbright kauban si Igsoong Rowe. Sigurado gayud nga malipay kamo kang Igsoong Rowe. [Blangko nga bahin sa teyp—Ed.] Bueno.

<sup>547</sup> Ihatag na nato ang panerbisyo karon kang Igsoong Neville, hibaloon nato kung unsay isulti niya kanato karon. Panalanginan kamo sa Ginoo. 

*KAALAM BATOK PAGTOO* CEB62-0401  
(Wisdom Versus Faith)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Abril 1, 1962, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)